

I / 50 .

28

Milik Departemen P dan K  
Tidak diperdagangkan  
Untuk umum

# Hikayat Bangta Kumari 1

Ramli Harun

Direktorat  
Kebudayaan

Departemen Pendidikan dan Kebudayaan

09012242

1/1

NIKAYAT  
BANGTA KUMARI

1



# HIKAYAT BANGTA KUMARI 1

Alih Aksara  
**RAMLI HARUN**

Departemen Pendidikan dan Kebudayaan  
**PROYEK PENERBITAN BUKU SASTRA**  
**INDONESIA DAN DAERAH**  
Jakarta 1984

Diterbitkan oleh  
Proyek Penerbitan Buku Sastra  
Indonesia dan Daerah

Hak pengarang dilindungi undang-undang

## **KATA PENGANTAR**

Bahagialah kita, bangsa Indonesia, bahwa hampir di setiap daerah di seluruh tanah air hingga kini masih tersimpan karya-karya sastra lama, yang pada hakikatnya adalah cagar budaya nasional kita. Kesemuanya itu merupakan tuangan pengalaman jiwa bangsa yang dapat dijadikan sumber penelitian bagi pembinaan dan pengembangan kebudayaan dan ilmu di segala bidang.

Karya sastra lama akan dapat memberikan khazanah ilmu pengetahuan yang beraneka macam ragamnya. Penggalian karya sastra lama yang tersebar di daerah-daerah ini, akan menghasilkan ciri-ciri khas kebudayaan daerah, yang meliputi pula pandangan hidup serta landasan falsafah yang mulia dan tinggi nilainya. Modal semacam itu, yang tersimpan dalam karya-karya sastra daerah, akhirnya akan dapat juga menunjang kekayaan sastra Indonesia pada umumnya.

Pemeliharaan, pembinaan, dan penggalian sastra daerah jelas akan besar sekali bantuannya dalam usaha kita untuk membina kebudayaan nasional pada umumnya, dan pengarahan pendidikan pada khususnya.

Saling pengertian antardaerah, yang sangat besar artinya bagi pemeliharaan kerukunan hidup antarsuku dan agama, akan dapat tercipta pula, bila sastra-sastra daerah yang termuat dalam karya-karya sastra lama itu, diterjemahkan atau diungkapkan dalam bahasa Indonesia. Dalam taraf pembangunan bangsa dewasa ini manusia-manusia Indonesia sungguh memerlukan sekali warisan rohaniah yang terkandung dalam sastra-sastra daerah itu. Kita yakin bahwa segala sesuatunya yang dapat tergali dari dalamnya tidak hanya akan berguna bagi daerah yang bersangkutan saja, melainkan juga akan dapat bermanfaat bagi seluruh bangsa Indonesia, bahkan lebih dari itu, ia akan dapat menjelma menjadi sumbangan yang khas sifatnya bagi pengembangan sastra dunia.

Sejalan dan seirama dengan pertimbangan tersebut di atas, kami sajikan pada kesempatan ini suatu karya sastra daerah Aceh, dengan harapan semoga dapat menjadi pengisi dan pelengkap dalam usaha menciptakan minat baca dan apresiasi masyarakat kita terhadap karya sastra, yang masih dirasa sangat terbatas.

Jakarta, 1984

**Proyek Penerbitan Buku Sastra  
Indonesia dan Daerah**

## PENGANTAR

Seperi dalam kata pengantar Hikayat Nabi Yusuf dan Hikayat Nabi Sulaiman, Ishak Peutua Gam dari Meureudu selain menyalin hikayat-hikayat Aceh juga telah mengarang sendiri beberapa hikayat Nabi. Naskah Hikayat Bangta Kumari ini merupakan hasil salinannya dari naskah lama. Menurut pengakuannya, di beberapa tempat ia telah merobah susunan kata-katanya. Hal ini dilakukan ada kalanya disebabkan naskah aslinya sudah tidak terang lagi ataupun karena menuruti selera bahasanya sendiri. Namun ia tidak merobah jalan ceritanya.

Naskah setebal 330 halaman dan berukuran 21x16 cm ini, kami dapati di rumah penyalinnya sendiri bulan Agustus 1983. Tulisannya jelas dan bahasanya cukup baik. Tiap halaman terdiri dari rata-rata dua puluh dua baris. Kami alih aksarakannya ke dalam huruf Latin sebagaimana adanya, dengan membaginya menjadi dua jilid, serta ringkasan ceritanya dalam bahasa Indonesia.

Oleh karena jalan cerita dalam jilid pertama labih padat dibandingkan dengan jilid dua, maka ringkasan cerita dalam jilid dua pun lebih sedikit.

Tema ceritanya banyak persamaannya dengan beberapa hikayat Aceh lainnya. Keadaan saling pengaruh dalam hikayat-hikayat Aceh kiranya akan menjadi bahan pembicaraan yang menarik bagi pengamat kesusastraan daerah.

Ramli Harun

## **RINGKASAN**

### **HIKAYAT BANGTA KUMARI**

#### **JILID I**

Zaman dahulu negeri Yaman diperintah oleh seorang raja bernama Tajul Baki. Meskipun sudah memperisterikan beberapa orang permaisuri baginda belum juga mendapat keturunan. Sesudah menikah dengan Putri Sakdum barulah baginda mendapat seorang putra yang diberi nama Rakna Bangta alias Bangta Kumari. Putra mahkota ini mendapat pendidikan agama dari seorang ulama. Beberapa waktu kemudian Putri Sakdum melahirkan seorang putri dan diberi nama Putri Lasun.

Pada suatu waktu Bangta Kumari terpengaruh oleh teman-teman sepergaulannya. Ia turut bermain judi. Tetapi ia cepat sadar akan perbuatannya yang tercela itu, namun ia tidak berani pulang ke istana karena takut kepada ayahnya. Baginda Tajul Baki amat gundah mengetahui kelakuan anaknya itu. Melalui seorang tua baginda menyerahkan sejumlah uang kepada Bangta Kumari sebagai modal untuk berdagang.

Setahun kemudian baginda jatuh sakit. Putranya dipanggil pulang dan menyampaikan lima macam nasihat kepadanya. Pertama tidak mengeluarkan kata-kata yang dapat menyenggung perasaan orang lain. Kedua tidak menaruh rahasia kepada orang perempuan. Ketiga tidak boleh berhutang kepada orang yang baru kaya. Keempat tidak berteman dengan orang yang tidak mempunyai kerabat, dan kelima tidak menyuruh orang bekerja sebelum ditentukan upahnya. Selesai berpesan dan berwasiat kepada putranya baginda Tajul Baki berpulang kerahmatullah. Bangta Kumari menggantikan ayahnya sebagai raja negeri Yaman.

Pada suatu hari Bangta Kumari membeli seekor burung bayan. Burung itu diserahkan kepada adiknya Putri Lasun untuk dipelihara. Ketika sedang diberi makan, burung bayan itu terlepas

dari tangan Bangta Silah yaitu suami Putri lasun. Bangta Kumari amat marah atas perbuatan iparnya itu. Ia memaki-makinya, tetapi Bangta Silah tidak dapat menerima makian Bangta Kumari. Kemudian Bangta Keumari mengatakan bahwa ia mengeluarkan kata-kata kasar, dengan maksud hendak menguji kebenaran nasihat almarhum ayahnya.

Pimpinan negeri Yaman diserahkan kepada Bangta Silah. Bangta Kumari pergi meninggalkan negeri untuk berkelana mencari pengalaman. Di sebuah desa bernama Duson Yaman, Bangta Kumari menyamar sebagai Leube Muda dan kawin dengan seorang gadis bernama Siti Uba.

Suatu ketika Siti Uba sakit. Ia ingin makan burung bayan. Disuruhnya suaminya mencuri burung bayan milik Bangta Keumari. Ia berjanji tidak akan menceritakan kepada siapa pun kalau suaminya dapat membawa burung bayan itu. Leube Muda pergi mengambil burung bayan di istananya. Burung itu dibawanya kepada Siti Uba bersama dengan seekor burung merpati. Yang dimasak ialah burung merpati. Siti Uba makan daging yang disangkanya burung bayan.

Untuk menguji kebenaran nasihat ayahnya, Bangta Kumari meminjam uang dari seorang kaya lama. Uang pinjaman itu dibelikannya dua bilah pedang. Yang sebilah diberikan kepada Lem Kumoriran yaitu kawannya dari orang kebanyakan dan yang satu lagi diberikan kepada Bangta Sawang yaitu temannya dari golongan bangsawan, yang mempunyai banyak kerabat. Kedua orang teman itu sudah berikrar dengan Bangta Keumari untuk sehidup semati sebagai saudara. Hari berikutnya Bangta Kumari mendatangi seorang tukang emas dan memesan sepasang subang untuk isterinya. Ongkosnya tidak ditentukan. Tiba pada hari yang dijanjikan, Bangta Kumari kembali mengambil subang pesanannya lalu membayar ongkos sebanyak sepuluh rial. Tukang emas tidak mau menerimanya. Bangta menambah lagi ongkosnya. Bahkan sesudah ditambah beberapa puluh rial lagi, tukang emas itu tidak juga mau menyerahkan subang itu. Akhirnya orang yang akan memaki subang itulah yang diminta sebagai ongkosnya. Bangta Kumari amat kecewa.

Putri Lason dan Bangta Silah sangat sedih mengetahui burung bayannya hilang. Bangta Silah sendiri turut mencarinya. Seorang panglima sampai di Duson Yaman. Ia berjanji akan mengambil Siti Uba sebagai isterinya jika ia dapat memberi keterangan tentang burung bayan raja yang hilang. Mendengar janji muluk Siti Uba

membuka rahasia bahwa suaminya yang mencuri burung raja dan sudah disebelihnya. Leube Muda ditangkap dan dihadapkan kepada raja. Orang kaya baru, mengetahui Leube Muda ditangkap datang pula menagih hutang. Leube Muda menyuruhnya menagih pada Siti Uba. Demikian pula dua orang temannya yang pernah mendapat hadiah pedang. Bangta Sawang datang hendak membela Leube Muda, sedangkan Lem Kumiran tidak menaruh perhatian sama sekali kepada Leube Muda, meskipun ia telah bersumpah setia dengannya.

Alangkah herannya Putri Lason dan Bangta Silah ketika melihat Bangta Kumari dalam pakaian samaran dibawa sebagai tertuduh. Bangta Kumari menjelaskan bahwa perbuatannya itu dilakukan semata-mata untuk menguji kebenaran nasihat almarhum ayahnya dan sebagai pengalaman bagi dirinya. Bangta Sawang diakui sebagai saudara mereka yang tertua dan tinggal bersama di istana. Beberapa hari kemudian Bangta Kumari pergi ke Duson Yaman. Di sana ia menyuruh burung bayan kembali ke Istana. Kemudian ia melunasi hutangnya kepada dua orang kaya yang berbeda watak itu. Selanjutnya ia pergi ke tukang emas. Sesudah membayar ongkos pembuatan, ia mengajak tukang emas itu ke rumah Siti Uba. Di sana Siti Uba dinikahkan dengan tukang emas yang memang menaruh hati kepadanya. Siti Uba sangat menyesal atas perbuatannya tetapi keputusan raja tak dapat dirobah.

Karena masih ingin menambah ilmu pengetahuan Bangta Kumari dengan ditemani Bangta Sawang, pergi lagi meninggalkan negeri Yaman. Mereka mendengar bahwa di negeri Biwan lama ada seorang ulama terkenal bernama Brahman yang ahli dalam berbagai ilmu. Ke sanalah mereka pergi belajar sambil berkhalwat. Dalam waktu singkat mereka telah menguasai banyak ilmu pengetahuan.

Negeri Biwan Lama mengalami malapetaka. Seekor burung garuda mengganas. Raja Batukiah kewalahan menghadapi garuda yang telah banyak membawa korban manusia dan hewan. Pengumuman dikeluarkan. Barangsiapa yang dapat membunuh garuda akan diberi hadiah berupa sebagian negeri berikut putrinya Din Syarifah.

Dengan menggunakan jaring kawat, burung garuda dapat ditangkap dan dibunuh oleh Bangta Kumari bersama Bangta Sawang. Sebelum mati garuda itu memuntahkan dua orang anak rak-

sasa yang masih hidup dari dalam perutnya. Kedua anak raksasa itu diserahkan kepada Brahman tempat mereka belajar. Rakyat datang berduyun-duyun ke tepi pantai menyaksikan bangkai burung garuda. Seorang menteri mencoba mengelabui raja dengan mengetahui bahwa dia adalah yang telah membunuh garuda itu. Tetapi baginda telah menyaksikan sendiri siapa yang telah membunuhnya. Putri Din Syarifah telah sah menjadi isteri salah seorang diantara dua orang Bangta. Mereka sepakat Bangta Sawang kawin lebih dulu tetapi Bangta Sawang tidak akan menikah sebelum Bangta Kumari mendapat jodoh. Mereka mendapat hadiah yang banyak dari rakyat karena telah berhasil membunuh garuda. Sebagian hadiah diserahkan kepada Brahman untuk biaya pemeliharaan anak raksasa. Mereka hendak pergi lagi ke negeri lain. Mengetahui hal itu atas desakan putri, Raja Batukiah tidak mengizinkan mereka pergi sebelum putrinya dinikahkan. Maka berlangsunglah pernikahan Putri Din Syarifah dengan Bangta Sawang.

Sesudah menikah, Bangta Sawang dan Bangta Kumari pergi meninggalkan negeri Biwan Lama. Tiada berapa lama dalam perlayaran mereka sampai di negeri Hindustan. Di sana mereka membuka usaha sebagai tukang emas.

Pada suatu hari putri Raja Sakdon Lila bernama Rakna Keumala bersama dengan tujuh orang dayang-dayangnya pergi ketemepat pandai emas Bangta Kumari. Pertemuan pertama membawa rasa saling cinta antara Bangta Kumari dan Rakna Keumala. Malam hari Bangta Kumari datang ke istana. Semua dayang-dayang tidur nyenyak, sehingga tidak ada orang mengetahui kedatangan Bangta Kumari. Dalam pertemuan itu mereka saling menyatakan cintanya.

Menjelang pagi Bangta Kumari pulang. Malam berikutnya pertemuan berlangsung lagi, dan demikian seterusnya tiap malam mereka bertemu di istana. Lama kelamaan kedatangan Bangta Kumari diketahui oleh Raja Sakdon. Baginda amat murka karena mengira putrinya sudah ternoda. Siasat diadakan untuk menuduh Bangta Kumari sebagai pencuri. Semua anak muda dalam negeri diundang Baginda ke istana. Rakna Keumala diminta oleh baginda untuk memilih salah seorang diantara mereka menjadi calon suaminya. Ketika Bangta Kumari masuk ia langsung ditangkap dengan tuduhan memasuki istana dan mencuri.

Karena mendapat firasat tidak baik burung bayan di istana negeri Yaman terbang ke Hindustan. Di sana ia mengetahui bahwa

Bangta Kumari berada dalam tahanan. Ia terbang kembali ke Yaman dan memberitahukan Putri Lason dan Bangta Silah. Putri Lason dan Bangta Silah tersinggung mendengar tindakan raja Sakdon. Seluruh rakyat dikerahkan untuk bersiap-siap berangkat ke negeri Hindustan.

Dalam pada itu Bangta Kumari telah berhasil membebaskan dirinya dari belenggu besi berkat ilmu yang dimilikinya. Ia menceritakan pengalamannya kepada Bangta Sawang. Sementara itu armada Bangta Silah telah mendarat di Pantai Hindustan. Karena dikira teman, Raja Sakdon menyambut baik kedatangan armada Bangta Silah dari Yaman. Bangta Kumari dan Bangta Silah datang pula menyambut. Mereka memutuskan untuk memberi pelajaran kepada Raja Sakdon Lila yang telah menghina Bangta Kumari. Maka pecahlah perang antara balatantara Bangta Kumari dengan Pasukan Raja Sakdon. Lama peperangan itu berlangsung namun tidak ada tanda-tanda pihak mana yang akan beroleh kemenangan.

**HIKAYAT  
BANGTA KUMARI**

**1**

**HIKAYAT  
BANGTA KUMARI**  
**I**

**BISMILLAHIRRAHMANIRRAHIM**

Alhamdulillah sigala pujoe  
Tuhan sidroe kadim baka  
Rahman Rahim Tuhan sidroe  
Keu geutanyoe bandum hamba

Nyang peujeuet sigala alam  
Sidroe Tuhan laen hana  
Manusia jen ngon hewan  
Allah Tuhan nyang po jeumba

Dum lat batat asoe alam  
Sidroe Tuhan dum nyang peuna  
Wajeb atueuh dum sikalian  
Sidroe Tuhan beutathee na

'Oh lheueh pujoe Khalikul'Alam  
Keu junjongan seulaweuet lon ba  
Seulaweuet saleuem atueuh Muhammad  
Pangulee umat dum sineuna

Ya Tuhanku neutamah rahmat  
Ateueh Muhammad saidil anbia  
Ateueh wareh atueuh sahbat  
Rahmat beule that neukaronya

Nabi Muhammad peusuroh Tuhan  
Jeuep-jeuep alam bansimua  
Ubak sigala hamba Tuhan  
Trok junjongan keupadanya

'Oh lheueh pujoe seulaweuet sudah  
Insya Allah beutroh pinta  
Lon meung surat saboh kisah  
Lon mohon bak Allah beusijahtra

Haba Jameun lon riwayat  
Cit ka trep that dilee masa  
Mudah-mudahan na manfaat  
Keu ibarat dum syeedara

Kareuna haba lam hikayat  
Meupat-pat sangat meuguna  
Le jeuet tatueng keu ibarat  
Meuhad-meuhad feucalitra

Lon mohon tulong bak Hadarat  
Beukek tamat ulon rika  
Ya Tuhan Ku Po Nyang Ahat  
Beutroh hajat pinta hamba

Hambaneu nyoe nyang hina that  
Laen tan pat lon meupinta  
Baranggajan nyang lon harap  
Ya hadarat cit bak gata

Neubri ate trang ngon teupat  
Neubri kuat Po keu hamba  
Lheueh meulakee ubak Tuhan  
Karangan laju lon mula

Teuma lon mat le ngon kalam  
Lon rakam keureutah safra  
Lon cok daweuet mirah hitam  
Ulon rakam seum sibanja

Cicem nuri paroh mirah  
Nyang cidah po cicem pala  
Bahle 'oh noe nyoe khuteubah  
Alkisah jinoe lon mula

'Ajayeb subhanallah  
Ngo lon kisah sidroe raja  
Raja jameun lon deungo gah  
That bit indah hana tara

Lon eupi han lon kalon tan  
Dilee tuan geucalitra  
Nama raja meuatoran  
Deungo teelan ulon rika

Nan geurasi lam buseutan  
Syahi alam raja raya  
Tajul Baki geuurohan  
That analan poteu raja

Hukom ade raja doli  
Tajul Baki that takwa  
Adepi that hana sakri  
Tajuk Baki raja raya

Nama naggroe Duson Yaman  
Di sinan teumpat neuraja  
Ureueng nanggroe datang keu nan  
Sulotan ade lagoina

Padum kapai keu nan dum troh  
Beude jicoh hana reuda  
Ureueng teuka nanggroe jeuoh  
Keu nan dum troh maniaga

Poteu raja duek di bale  
Hana lale su ramtaka  
Kapai teuka saleh pane  
Sangat rame beude lila

Ubak bujang neukheun sikrak  
Cuba tajak u kuala  
Lon ngo beude sangat gunjak  
Beudoh tajak tapareksa

Bujang beudoh jijak leugat  
Troph le siat u kuala  
Jicok sampan dayong leugat  
Jikarat bak kapai bahtra

Yoh goh lom troh bak jikasad  
Yo meutat-tat dalam dada  
Sabab jieu kapai le that  
Kadang meuhad musoh teuka

Bujang ka troh jipeureugi  
Dalam ate meunyum lia  
Jieu kapai jroh meuriti  
Bujang tandi tanyong lanja

Hobu langkah dumna tuan  
Pane jalan ho tahala  
Teuma seot ureueng datang  
Kamoe tuan maniaga

Lon keumeung jak bak nanggroe nyoe  
Meugan sinoe ade raja  
Bujang deungo dum hareutoe  
Seuot meunoe laju sigra

Peue meuneukat wahe teelan  
Peue na jalan pane taba  
Peue nyang na ka taba barang  
Peugah rijang he syeedara

Jak tateungoh dum u darat  
Jak bak deelat poteu raja  
Ureueng datang seuot leugat  
Dum meuneukat rukon ija

Lon meung jak duek bak peukan nyoe  
Meugah sinoe ade raja  
Teungku peugah ubak kamoe  
Wase sinoe pakri rupa

Teuma seuot teungku bujang  
Wase nyum sang bak siploh sa  
'Oh lheueh abeh geungieng barang  
Beudoh bujang woe bak raja

'Oh sare troh ubak deelat  
Ka jiangkat jaroe dua  
Ampon tuanku syah berdeelat  
Ureueng meukat keu noe teuka

Ka geuteungoh dum u peukan  
Syahi alam maniaga  
Bukon ureueng peurmusohan  
Deelat makam keu noe teuka

Geudeungo gah peukan rame  
Le that geume rukon ija  
Han peue sidek wahe doli  
Ureueng rame keu noe teuka

Padumna trep hana jiwoe  
Dum sinaroe maniaga  
Ureueng meukat kaya han soe  
Ureueng meubloe rame raya

Nyang meukat u deungon pisang  
Dim sibbarang abeh kaya  
Sabab ade uleebalang  
Meukat pisang ek bloe bahtra

Meukat campili wahe abang  
Dum sibbarang toke beusa  
Meukat ranup bek meuayang  
Jibloe subang nyang meucintra

Ek jibloe kreh nyang meudulang  
Ek jibloe blang troh meugunca  
Adat watee raja meuprang  
Jibloe tongkang deungon laba

Bahkeu 'oh noe ureueng meukat  
Bek panyang that hana gura

Ulon kisah raja deelat  
Ade sangat mat neuraca

Areuta makmu tangan murah  
Le seudeukah keu faki dumna  
Salah bacut he meutuah  
Raja meugah aneuk hana

Raja male aneukpi tan  
Sosah han ban poteu raja  
Nyankeu sosah di sulotan  
Adeuk badan sidroe hana

Adat mate abeh umu  
Soe gantoe du mat neuraca  
Poteu raja ate tunu  
Aneuk teungku sidroe hana

Han meusampe neukeurajeuen  
Dalam mideuen nanggroe raya  
Gop tueng dalam kuta mideuen  
Ngon cut buleuen gop hue hila

Ureueng laen kon kawom droe  
Dum sinaroe ureueng nyang na  
Poteu raja sosah han soe  
Aneuk nanggroe gop hue hila

Lon keuranjeuen han meusampe  
Ulon male aneuk hana  
Uroe malam ingat sabe  
Aneuk boh ate lakee beuna

Nanggroe luah hana lawan  
Deelat makam aneuk hana  
Teumpat keurajeu Duson Yaman  
Di sinan teumpat neuraja

Duson Yaman Nanggroe makmu  
Sayang taeu gantoe hana  
Meuntoe kadi ate seuu  
Sabab geueu ade raja

Tan meureubot jeuep daerah  
Dumpeue mudah raseuki na  
Bitpi meunan ulon peugah  
Raja sosah aneuk hana

Raja male aneukneu tan  
Kheundak Tuhan Po Nyang Esa  
Bak putroe nam aneukneu tan  
Syahi alam sosah raya

Raja gundah hana sakri  
Tajul Baki meusempeuna  
Toh amilan wahe akhi  
Bek sosah le poteu raja

Teuma seuot sidroe bujang  
Putroe nyum sang di sinan na  
Sidroe putroe teutap sinan  
Deelat makam neucré hana

Troh dua thon hana neucre  
Han Tuhan bri aneukneu na  
Hana aneuk sinan jadi  
Tajul Baki minah sana

Meunan-meunan jeuep-jeuep putroe  
Raja nanggroe aneuk hana  
Teutap haba tuan putroe  
Raja jinoe lon calitra

Padum lawet teuma dudoe  
Raja nanggroe laen keunira  
Bak putroe nam hana neuwoe  
Laen putroe neujak mita

Raja tanyong jeuep-jeuep nanggroe  
Ubak meuntroe ngon panglima  
Pat na meugah dalam nanggroe  
Biek-biek meuntroe ngon bentara

Sidroe meuntroe seuot yoh nyan  
Angkat tangan di jeumala

**Ampon deelat po junjongan  
Deungo lamansikrak haba**

**Ureueng binoe rupa cidah  
Nyo lawan sah po meukuta  
Hana jeuoh he deelat syah  
Lam daerah nanggroe raja**

**Na tuanku ureueng binoe  
Aneuk meuntroe jroh that rupa  
Rupa indah hana bagoe  
Cuba jinoe jak pareksa**

**Hana jarak tuan putroe  
Ngon meuligoe po meukuta  
Meunan narit sidroe meuntroe  
Raja nanggroe ate suka**

**Raja ingat rijang-rijang  
Bak nyum sang-sang ka di mata  
Lheueh neudeungo haba bujang  
Raja yoh nyan yue seuranta**

**Yue krah rakyat dalam camping  
Neyuyue tren laju beusigra  
Teuma teuka dum meuron-ron  
Keu nan jitren rame raya**

**Abeh teuka geusyik waki  
Meuntroe wadi ngon hariya  
Abeh nujum deungon kadi  
Dan lagi ulama beusa**

**Teuma sabda raja meugah  
Ubak syiah neupeuhaba  
Wahe teungku ngo lon peugah  
Neupeunikah kamoe dua**

**Deungon putroe rupa indah  
Ureueng meugah biek peutua  
Meunan raja ka neupeugah  
Neupeunikah le ulama**

'Oh lheueh nikah ka seuleusoe  
Syiah jinoe neubeuet do'a  
'Oh lheueh do'a rahop jaroe  
Geulakee droe dum sineuna

'Oh lheueh idin raja nanggroe  
Teuma geuwoe laju sigra  
Geusyik waki wadi meuntroe  
Dum sinaroe abeh gisa

Syiah kadipi ka neuwoe  
Tinggai putroe deungon raja  
Poteu raja ate rihon  
Hana neutren di istana

Sajan putroe putiek sukon  
Puteh sabon jroh that rupa  
Nama geukheun Putroe Sakdon  
Nyan judo phon deungon raja

Uroe malam meuwa meucom  
Deelat payong meuseusuka  
Hingga teuma haba nyang rab  
Bek panyang that lon calitra

Na dua thon sinan teutap  
Raja deelat ngon judonya  
Meuseusuka raja doli  
Ngon Putroe Ti Sakdon muda

Nyanpi hana aneuk neubri  
Tajul Baki sosah raya  
Bak simalam raja beuradu  
Lam keuleumbu tiree rawa

Neueh sapat ngon cut meulu  
Tuanku neupeugah haba  
Wahe adek karang bungong  
Lon tanyong sipatah kata

Kareuna ulon ngeut ngon bingong  
Jawueub keunong judo muda

Sikrak haba ulon sudi  
Tapeugah kri po jroh rupa

Kareuna ulon ka rab mate  
Dudoe pakri soe mee raja  
Lon nyoe sosah hana sakri  
He putroe Ti judo hamba

Sosah lon that dalam ate  
Saleh pakri he adekda  
Nyang lon tanyong cut meutuah  
Beutapeugah uleh gata

Teuma seuot putroe cidah  
Ka neupeugah ubak raja  
Na neudeungo wahe doli  
Lon peugah kri po meukuta

Jinoe tuanku neukhanduri  
Meuhie faki ngon ulama  
Neumeulakee ubak Rabbi  
Kadang neubri aneukneu na

Neusie keubeue ngon bubiri  
Alem faki yue meudo'a  
Bak ulama neyue mohon  
Keu noe yue tren faki dumna

Neusie lumo tumbon-tumbon  
Neuyue mohon bak Rabbana  
Geunap uroe peutang pagi  
He doli meukuta donya

Neubeuet do'a habibon najri  
Dan lagi ubak peundita  
Tujoh malam tujoh hari  
Wahe doli yue meudo'a

Meunan narit Putroe Siti  
Tajul Baki ate suka  
Ban putroe kheun raja pateh  
Teuma neueh sapat dua

Teungeut mangat raja areh  
Uroe mureh teuma jaga  
'Oh ban jaga raja deelat  
Neuyue leugat meuseuranta

Raja yue tet beude nubat  
Tanda rakyat neuyue teuka  
Cit ka dilee meunan adat  
Troph leugat raja raja

Sinoe meutum geutet nubat  
Sideh rakyat miseue geumpa  
Ureueng nanggroe jitren leugat  
Peunoh sarat mideuen raja

Tunong Baroh Timu Barat  
Ka troh leugat keu nan teuka  
Ladom jiba teubee meuon  
Jilason deungon u muda

'Oh ban sare troh u mideuen  
Teudong di leuen hana haba  
Hana tutopi meusidroe  
Wa ngon jaroe nibak dada

Teuma marit ureueng sidroe  
Ubak meuntroe ngon peutua  
Peukek seumbah tuan meuntroe  
Angkat jaroe di jeumala

**Deelat ampon tuanku droe**  
Dumna kamoe abeh teuka  
Keupeu tuanku pangge kamoe  
Siri nanggroe neuyue ngaza

Teuma sabda raja nanggroe  
Deungo kamoe bandum gata  
Hana nanggroe nyang meusugang  
Lom hana prang lon yue ngaza

Nyang lon pangge gata keu noe  
Hajat kamoe lakee do'a

Hajat ulon meung khanduri  
Dan lagi seudeukahpi na

Tasie kameng ngon bubiri  
Teuma lagi keubue raya  
Lumo tumbon kameng gasi  
Jinoe tasie dum nyang suka

'Oh lheueh titah raja doli  
Jipeubuet le laju sigra  
Jisie kameng ngon bubiri  
Keubeue lagi lumopi na

Ladom ureueng jitaguen bu  
Maseng laku jikeurija  
Ureueng rame han jeuet taeu  
Meujampu agam ngon dara

Keubeue lumo jisie le that  
Taguen leugat han peue kira  
Hingga teuma haba nyang rab  
Ase leungkap masak rata

Teuma jibet le khanduri  
Alem faki dum sineuna  
Bandum ureueng pajoh khanduri  
Meuntroe wadi rakyat dumna

'Oh sare lheueh meukhanduri  
Tajul Baki meusuara  
Wahe teungku alem faki  
Dan lagi bandum sineuna

Kareuna ulon aneuk cit tan  
Ubak Tuhan neumeupinta  
Neumeulakee ubak Tuhan  
Aneuk badan keu lon beuna

Teungku mohon ubak Allah  
Ngon meutuah babah gata  
Kadang-kadang neubri mudah  
Buet di Allah han troh juga

Meunan sabda raja nanggroe  
Han neubri woe dum ulama  
Tujoh malam tujoh uroe  
Raja nanggroe yue meudo'a

Ya Ilahi wa ya Rabbi  
Poku neubri ban lon pinta  
Beuna aneuk raja doli  
Ngon Putroe Ti Sakdon muda

Tujoh malam tujoh uroe  
Hana padoe lakee do'a  
Geulakee bak Tuhan sidroe  
Raja nanggroe aneuk beuna

'Oh sare troh tujoh uroe  
Teuma jinoe seungap do'a  
Poteu raja buka peutoe  
Seudeukah nyoe neubri sigra

Nyang ka soh limong boh geudong  
Raja bri dum keu ulama  
Alem faki that meuuntong  
Deelat payong bri areuta

Neubri bandum keu seudeukah  
Wang keureutah ngon rupia  
'Oh sare lheueh bri seudeukah  
Teungku syiah lakee gisa

Raja seuot han peue salah  
Teuma syiah neuwoe sigra  
'Oh leupah woe teungku syiah  
Raja meugah lon calitra

'Oh ka malam raja deelat  
Ngon cut ubat Sakdon muda  
Bak malam nyan neueh sapat  
Raja deelat hana jaga

Lop keuleumbu tujoh lapeh  
Raja eh lam tiree rawa

Bantai tika meutindeh-tindeh  
Bak raja eh han peue kira

Bangon laen han lon seubot  
Malee po cut ureueng baca  
Cit ka maklum wahe nyak cut  
Han peue seubot deungon nyata

Teuka ladat bak malam nyan  
Sulotan deungon judonya  
Bak malam nyan sret manikam  
Syahi alam raja raya

Padum lawet teuma dudoe  
Hame putroe judo raja  
Lahe hame tuan putroe  
Raja nanggroe ate suka

Siploh buleuen hame putroe  
Budak sidroe ka keulua  
Poteu raja jak u dapu  
Neujak eu budak baro na

Neungieng aneuk di tuanku  
Kon sigeutu ate suka  
Budak indah rupa neueu  
Sang budiu di antara

Lam-lam madeueng hana neuweh  
Raja gaseh putroe muda  
Masa madeueng Putroe Sakdon  
Peunoh geudong dum areuta

Rakyat teuka jeuep sagoe don  
Jijak kunjong judo raja  
Me haluan peue nyang layak  
Rakyat dum jak hana reuda

Ladom jime meuh ngon pirak  
Ban laku hak atueuh kada  
Nyang soh dilee ngo lon peugah  
Seudeukah neubri le raja

Saboh soh limong meugantoe  
Masa putroe madeueng keu bangta  
Geunap peuet ploh madeueng putroe  
Ureueng nanggroe abeh teuka

Padum lawet teuma dudoe  
Deungon putroe marit raja  
Wahe judo bungong meurak  
Deungo sikrak lon beurkata

Soe tarasi nama budak  
Soe nyang layak boh le gata  
Gata boh nan jinoe si nyak  
Nyang meusigak nibak rupa

Meunan neukheun Tajul Baki  
Teukhem Siti Sakdon muda  
Meunyo meunan wahe doli  
Bah lon rasi po meukuta

Ka teupike Putroe Siti  
Dalam ate tan keulua  
Beumeualeuet deungon doli  
Meunan pike putroe muda

Keumah pike Putroe Siti  
BANGTA KUMARI geuheu nama  
Meujan-jan Bangta Kumari  
Meujan lagi Rakna Bangta

Meunankeu hai wahe doli  
Bangta Kumari nanjih dua  
Bit that lisek Cut Putroe Ti  
Hana sakri utoh raya

Padum lawet teuma dudoe  
Rayek jinoe aneuk raja  
Rakna Bangta nyang samlakoe  
Ho siuroe rayek lanja

Tamse kulat ujeuen baroe  
Meunankeu proe hai umpama

Pakat raja deungon putroe  
Bangta jinoe geuboh gaca

Geuboh gaca wahe teelan  
Geupeukhatan Bangta muda  
Hana panyang lon peugah ban  
Meubek tan nak meuho haba

'Oh lheueh khatan po Bangta cut  
Neuyue jak beuet bak ulama  
Rakna Bangta intat laju  
Ubak teungku deyah raya

'Oh troh Bangta ubak teungku  
Peubeuet laju phon aleh ba  
Jeuet aleh ba ka neubalek  
Aleh han titek neuyue hija

Nyanpi ka jeuet bungong rubek  
Lom neubalek aleh atueuh a  
Aleh atueuh api neuturi  
Di miyup i di atueuh a

Nyanpi ka jeuet Banta ahli  
Neupeuturi bareh dua  
Siat ka jeuet neubeuet laju  
Galak teungku hana tara

Trang that ate bungong meulu  
Alhamdu teungku yue hija  
Nyanpi ka jeuet han trep lambat  
Ate trang that Rakna Bangta

Teungku peubeuet saboh Jumeu'at  
Ka tamat nibak juh'amma  
Tamat 'amma neubeuet tajam  
Aleh lam neupeuhija

Tujoh uroe bak aleh lam  
Abeh neufam tamat sigra  
Teungku pinah bak sayakuloh  
Neubeuet sunggoh Bangta muda

Limong uroe bak sayakuioh  
Hingga ka troh ubak tilka  
Meunan-meunan wahe sahbat  
Ka tamat Quruan raya

Tamat Quruan neubeuet kitab  
Bangta 'ajab hana tara  
Bangta alem le eleumee  
Neumeuguree bak ulama

Yakin ate bungong keumee  
Tuntut eleumee dum barang na  
Abeh dumpeue ka neutudum  
Miseue nujum Rakna Bangta

Eleumee peularehpi ka maklum  
Lom néuntueng eleumee peungila  
Teutap Bangta lam meununtut  
Le thah ka jeuet eleumee dumna

That trang ate samlokoe cut  
Neumeununtut bak ulama  
Hijo-hijo putik sukon  
Di dalam on hana nyata

Meuwoe kisah Putroe Sakdon  
Puteh sabon judo raja  
Padum lawet Bangta jak beuet  
Hame po cut ma po Bangta

Karonya Po Tuhan Makbud  
Troh meukeusud poteu raja  
Cukop buleuen hame putroe  
Aneuk sidroe Tuhan bri na

Lahe budak ureueng binoe  
Nyankeu adoe Rakna Bangta  
Rupa jroh that si nyak putroe  
Baranggasoe galak suka

Seunang ate raja nanggroe  
Deungan Putroe Sakdon muda

'Oh lheueh madeueng peuet ploh uroe  
Marit putroe deungon raja

Deelat ampon tuanku droe  
Si nyak nyoe soe taboh nama  
Jawueub raja teuma yoh nyan  
Tarasi nan uleh gata

Meunyo meunan po junjongan  
Ulon boh nan LASON nama  
Nyankue aneuk Putroe Lason  
Putroe Sakdon nama bunda

Got meualeuet akhe ngon phon  
Cut ma ubon neuboh nama  
Lason keu noe Lason keu deh  
Le soe gaseh aneuk raja

Rupapi jroh bungong puteh  
That peureuseh cahya muka  
Hingga teuma haba nyang toe  
Rayek jinoe aneuk raja

Rayek laju si nyak putroe  
Ho siuroe laju raya  
Rupa jroh that hana bagoe  
Nyankue adoe Rakna Bangta

Rakna Bangta lon hareutoe  
Nyang samlakoe aneuk raja  
Rakna Bangta adoe teungku  
Jak meukru-kru sabé muda

Jeuep-jeuep gampong Barat Timu  
Jiba laju aneuk raja  
Teuma meuthee ubak ayah  
Raja sosah hana tara

'Oh woe Bangta raja peugah  
Marit ayah keu po Bangta  
Wahe aneuk bintang timu  
Ngo sigeutu lon meuhaba

Bek he aneuk tameukru-kru  
Tameucandu akhe masa  
Akhe dudoe tameujudi  
He Kumari bijeh mata

Teuma seuot Bangta Kumari  
Wahe abi du lon raja  
Hana galak lon meujudi  
Bek Allah bri niet lam dada

Padum lawet wahe akhi  
Teuka judi nanggroe Bangta  
Jimeujudi jimeutaroh  
Ma teungku beh han peue kira

Rakna Bangta hana neujak  
Hana galak niet lam dada  
Rakna Bangta na nyang paleh  
Meunoe meudeh jipeuhaba

Ita tajak siat keu deh  
Bak sagoe jeh rame raya  
'Oh troh keu deh adoe teungku  
Jikheun laju ubak Bangta

Neubri ringget meudua boh  
Tuanku jroh bri keu hamba  
Bek neutakot he raja jroh  
Jeuet sireutoh peue neusangka

Leumah lumpoe lon pajoh bu  
He teungku got that rahasia  
Pruet lon tarek kon sigeutu  
Meunan teungku lumpoe hamba

Bek teumakot he tuanku  
Neubri laju wahe Bangta  
Neubeudoh le jak bak judi  
Bangta Kumari ka binasa

Neudong mantong wahe doli  
Cit meujudi buettan hamba

Ri nyang jitop teungku ampon  
Neueu lon ron mantong saja

Meunoe meudeh neungo jikheun  
Bangta hireuen neujak lanja  
Rakna Bangta troh bak judi  
Hana sakri galak suka

Yoh nyan rakan jimeujudi  
Bangta Kumari neudong saja  
Rakna Bangta teudong tahe  
Neueu talo si ceulaka

Na dua ploh abeh ringget  
Yoh nyan saket ate Bangta  
'Oh abeh nyan lom jilakee  
Piyoh dilee nyan di gata

Lheueh nibak nyan Bangta Kumari  
Meu'en judi laju sigra  
Ho nyang jitop ho nyang talo  
Sayang taeu aneuk raja

Na limong ploh nyang ka talo  
Han jeuet taeu jiron lanja  
Lapan reutoh talo sampie  
Siploh uroe meu'en saja

Rakna Bangta ate tutong  
Limong geudong ka seureupha  
Sepkeu dumnan ulon suson  
Han peue lon kheun panyang raya

Meunyo bak buet judi sabong  
Adat gunong ek seureupha  
Rakna Bangta sosah han soe  
Hana neuwoe le u tangga

U istana hana neuwoe  
Meuthee dudoe ubak raja  
Gop jak peugah he raja jroh  
Aneuk saboh judi seuba

Limong geudong meugah ka soh  
Abeh jiboh uleh Bangta  
Raja beungeh hana lawan  
Neupreh riwang nyan aneukda

Rakna Bangta bak uroe nyan  
Neuwoe rijang le u tangga  
U istana neukek laju  
U dapu keu deh neuhala

Poteu raja yoh nyan neueu  
Hana sapeue neumeuhaba  
Rakna Banta neupajoh bu  
Neungieng laku uleh raja

Sare lheueh bu Bangta seudang  
Neuheu rijang le ayahda  
Wahe aneuk bungong peukan  
Keu noe intan siat gata

Rakna Bangta peurab pantah  
Seumbah ayah duneu raja  
Teuma marit raja meugah  
Tanyong pantah bak aneukda

Wahe aneuk uleebalang  
Dumna meunang bijeh mata  
Di lon ateku that seunang  
Kudeungo nyan meunang gata

Pat geudong aneuk ka peunoh  
Samlakoe jroh peugah sigra  
Tabri aneuk meusireutoh  
Lon pajoh hareukat gata

He aneuk cut bek som bak lon  
Di phon cut kon lon peulara  
Raja kheun nyan Bangta takot  
Teukeujot neuplueng ban guda

Neugrop u leuen plueng ban ribot  
Teumakot keu poteu raja

Raja seutot let di likot  
Neupeutakot bek biasa

Ban sare toe ka teugageueng  
Neusuet peudeueng poteu raja  
Neupet mata neusuet peudeueng  
Laju neuplueng neulet Bangta

Rakna Bangta meunyum payah  
Neugrop pantah plueng meutaga  
Bitpi meunan neuplueng bagah  
Teuga ayah ureueng tuha

Rab troh neutak po samlakoe  
Raja nanggroe na keunira  
Le that ilah raja nanggroe  
Peureubah droe pura-pura

Pura-pura droe peureubah  
Khalifah le that bicara  
Rakna Bangta neuplueng bagah  
'Oh ban leupah neuwoe raja

Teutap raja di meuligoe  
Hana bagoe sosah teuka  
'Oh teupike keu aneuk droe  
Raja neumoe ro ie mata

Rakna Bangta neuplueng bunoe  
Hana neuwoe le utingga  
Padum lawet hana neuwoe  
Po samlakoe sosah teuka

Rakna Bangta ka teupike  
Dalam ate teulah raya  
Meu'en judipi hana le  
Neumoe sabe hana reuda

Dawok neumoe Bangta seudang  
Han meuban-ban ro ie mata  
Ingar nasib untong badan  
Bangta yoh nyan tumbok dada

Lompi geulet uleh ayah  
Bangta indah sang ka gila  
Teutap Bangta ate gundah  
Ulon kisah poteu raja

Bandua ngon Putroe Lason  
Deelat ampon ho kakanda  
Ho ka leupah cut bang ulon  
He du payong tan meugisa

Wahe aneuk bek teumanyong  
Bek he bungong teuoh Bangta  
Han jeuet ingat reuloh ate  
Sang beumate kamoe tuha

Meunan neukheun raja doli  
Cut Putroe Ti ate rugha  
Seungap putroe han le sudi  
Teutapi ka hitam muka

Han le marit putroe bungong  
Teuceungong hana le haba  
Seungap raja han le tuto  
Putroe tahe alet ie mata

Dalam atejih teusawo  
Dara baro pucat muka  
Putroe Lason kakeu neumoe  
Lam ate droe duka cita

Sang-sang han le Bangta seudang  
Meunan nyum sang Lason muda  
Saleh han le nyan cut abang  
Putroe seudang sang ka gila

Weueh that ate cut sambinoe  
Sang jimanoe ro ie mata  
Padum lawet teuma dudoe  
Raja nanggroe leumah bicara

Dawok ingat dalam ate  
Bangta Kumari han meuho ka

Sabab han tom na neuwoe le  
Geunap hari sosah raya

Teuma raja neumeupike  
Dalam ate kira-mira  
Keumah pakat deungon pike  
Raja hei le ureueng tuha

Ureueng tuha neuhei sidroe  
Neupeugah proe uleh raja  
Wahe teungku neujak keu noe  
Lon peugah proe ubak gata

Rakna Bangta hana jiwoe  
Lon peugah nyoe saboh rahsia  
Tame ringget limong reutoh  
He teungku beh uleh gata

Bek takheun-kheun hareuta droe  
Keu samlakoe tapeusiwa  
Tapeusiwa keu jih ringget  
Takheun bit-bit areuta gata

Bek na bacut tapeuteuntee  
Nak bek jithee areuta hamba  
Sang beukek top 'oh talakee  
Siploh lagee taboh dawa

Meunan neukheun raja deelat  
Beudoh leugat ureueng tuha  
Geujak laju ngon meukarat  
Ngon siat ka troh bak Bangta

'Oh sare troh geuduek le toe  
Geukheun meunoe ubak Bangta  
Wahe aneuk po samlakoe  
Tango kamoe bijeh mata

Pakon hana tahareukat  
Bek laloe that he aneukda  
Teuma seuot Bangta seudang  
Sira wayang narit seunda

Pakri neuyue lon hareukat  
Menoe leugat pangkai gata  
Neubri ringget meupeuet reutoh  
Bahle lon boh jinoe siwa

Meunan neukheun po Bangta cut  
Teuma seuot ureueng tuha  
Bek peuet reutoh nyan talakee  
Sikhan ribee bak ulon na

Sikhan ribee linong reutoh  
Puteh leusoh meunan kira  
Jinoe lon bri he aneuk beh  
Limong reutoh pangkai gata

Limong reutoh pangkai lon bri  
Hai Kumari maniaga  
Ujong ringget he Kumari  
Nam blah tabri teuma siwa

Lam sireutoh meunan tabri  
Kumari jak maniaga  
Abeh pakat deungon janji  
He puteh di bek meudawa

Yoh nyan Bangta neujak meukat  
Aneuk deelat maniaga  
Padum lawet Bangta meukat  
Lagot got that dalam banda

Umu sithon Bangta meukat  
Laba peuet lipat dua ribee ka  
Ka na laba dua ribee  
Nyang meuteuntee bak keunira

Bahle teutap 'oh nan dilee  
Lon kheun lagee poteu raja  
Tajul Baki raja nanggroe  
Neuheu jinoe ureueng tuha

Neuheu ureueng yoh saboh roe  
Neukheun meunoe uleh raja

Ubak Bangta tajak keu deh  
Ringget jeh talakee siwa

Meunan raja peugah meuceh  
Geujak keu deh ureueng tuha  
'Oh troh keu nan han jan piyoh  
Lapan ploh Bangta bri siwa

Han peue tanyong han peue teuoh  
Bangta jroh akai bicara  
Tan peue lakee wahe adoe  
Neubri jinoe le ngon siwa

Po Bangta jok ubak jaroe  
Hai kusyik nyoe siwa gata  
Lheueh sambot ringget u jaroe  
Laju geuwoe ureueng tuha

Ubak raja hingga sampoe  
Beuet jaroe di jeumala  
Nyoe na ringget bak Kumari  
Ka neubri he po meukuta

Teuma seuot Tajul Baki  
Neupeugah kri meunoe haba  
Mangat ate ulon tuan  
Meunyo meunan buet aneukda

Meunan narit po junjongan  
Geuwoe yoh nyan ureueng tuha  
Padum lawet teuma dudoe  
Raja nangroe lon calitra

Poteu raja yoh nyan saket  
Padum lawet meukat Bangta  
Raja saket that meularat  
Ka rab troh had ajai teuка

Ureueng tuha neuhei leugat  
Deungon siat ka troh sigra  
'Oh sare troh tuha keu nan  
Po junjongan neumeusabda

Wahe teungku gaseh sayang  
Neujak rijang ubak Bangta  
Neuyue gisa bangta indah  
Neupeugah ulon nadeu'a

Ureueng tuha beudoh pantah  
Geumeulangkah deungon sigra  
'Oh troh geujak bak Kumari  
Geupeugah kri saket raja

Beudoh jak woe Bangta sidi  
Jeh abi ka la'eh raya  
Raja sangat that meularat  
Jak woe leugat wahe Bangta

Ban neudeungo saket deelat  
Neudoe leugat Bangta muda  
'Oh troh neuwoe Bangta seudang  
Seumbah rijang teuot raja

Teuma neuduek sinan sajan  
Raja yoh nyan neumeusabda  
Raja marit teuma meunoe  
Deungo kamoe bijeh mata

Kareuna ulon ka rab mate  
Lon kheun mise ubak gata  
Ringget dilee limong reutoh  
He aneuk beh areuta hamba

Na tadeungo bungong keumang  
Beutasayang keu areuta  
Peue na di lon kupeuingat  
Saket mangat droeteu rasa

Wahe aneuk po samlakoe  
Nyang jinoe areuta gata  
Bek le pulang he samlakoe  
Areuta kamoe areuta gata

Nyang ka tabri laba dilee  
Bungong keumee keu ayahda

Nyoe ho aneuk dalam peutoe  
Lon kheun jinoe ubak gata

Wahe aneuk panyot tanglong  
Nyoe pat geudong nyang di gata  
Kareuna ulon ka rab mate  
Areuta han le nibak hamba

Adat aneuk tatiek u laot  
Hana sangkot he aneukda  
Han soe teugah putik rambot  
Lon ka mawot mate fana

Tinggai gata deungon Siti  
Kumari beumeubahgia  
Tadeungo lom he samlakoe  
Lon hareutoe ubak gata

Nyan pat dumpeue he aneuk droe  
Beugot jinoe tapeulara  
Mangat tinggai puteh licen  
Tameukawen wahe Bangta

Nyoe saboh trek lon boh mise  
He boh ate gata muda  
Wahe aneuk nyang that lon syen  
Tameukawen ri nyang suka

Di ayah han meuteumeung eu  
Bintang timu Rakna Bangta  
Meunan neukheun le tuanku  
Sret meutabu ngon ie mata

'Oh neudeungo haba ayah  
Bangta indah neumoe rugha  
Sret ie mata peunoh limpah  
Cut indah ingat keu bapa

Ingat ayah teupangge rahmat  
Ka 'oh nan had bak Rabbana  
Dawok neumoe amat sangat  
Ayah deelat ka nadeu'a

Lom ngon adoe Putroe Lason  
Putroe Sakdon sama juga  
Sret ie mata dum meuron-ron  
Ban ujeuen tren hana reuda

Bandum yoh nyan that syugolan  
Rasa karam langet donya  
Meunan putroe that sosahan  
Nyum teureuban buket dumna

Hana panyang lon atoran  
Putroe intan ka meumada  
Amma bakdu puteh lumat  
Nyoe nyang mangat nibak nyang ka

Tajul Baki lon riwayat  
That meularat saket raja  
Raja saket lam meuligoe  
Na lhee uroe bak calitra

Rakna Bangta nyang samlakoe  
Sapat sinoe ngon ayahda  
Bak masa nyan raja deelat  
Neubri amanat dum peukara

Wahe aneuk puteh lumat  
Lon amanat lom bak gata  
Lon peuingat yoh na kamoe  
Lon peurunoe bijeh mata

Beutapateh he samlakoe  
Narit kamoe ureueng tuha  
Ulon na troh nyan manikam  
Aneuk badan Rakna Bangta

Gata saboh aneuk agam  
Wahe intan cahya mata  
Beukit tafam he aneuk cut  
Han langsong buet akhe masa

Meunan raja neumeuteuoh  
Samlakoe jroh deungo haba

Poteu raja sira neumoe  
Ingar samlakoe mantong muda

Wahe aneuk jantong ate  
Lon kheun mise nyak bak gata  
Nyoe amanat he boh ate  
Beuta pike he aneukda

Limong peukara ulon peugah  
Tango beusah bijeh mata  
Nyang mula phon he meutuah  
Ngo lon peugah ubak gata

Narit umom bek meututo  
He aneuk e gata muda  
Bek tamarit nyang meuumom  
Han got bangon wahe Bangta

Boh deungon gop got deungon droe  
Boh ngon binoe got syeedara  
Bek meuumom he boh ate  
Tameupake akhe masa

Nyan ka saboh he Kumari  
Tango lagi nyang keudua  
Nyang keudua he nyak bungong  
Bak inong bek troh rahsia

Bek tapeugah nyang meuseuke  
He boh ate jeuet binasa  
Meunan wasiet raja doli  
Bangta Kumari neubri aja

Beutapateh he samlakoe  
Narit lon nyoe le hareuga  
Nyum sibara han geupeubloe  
He aneuk droe bek talupa

Yoh masa nyan wahe sahbat  
Neuamanat bak aneukda  
Si nyak putroe sinan sapat  
Aneuk deelat Lason muda

Adek Rakna Bangta Kumari

Aneuk doli raja raya

'Oh jideungo wasiet abi

Si Nyak Ti alet ie mata

Sinan dua duek meujudo

Putroe tahe ngieng bak Bangta

Teuma keulhee ngo lon ato

He adoe e ngo beurata

Cit lon peugah haba teuntee

Haba dilee raja raja

Ureueng tuha han sidroe thee

Tadeungo kee wahe kuya

Dua haba nyang ka teuntee

Wahe sampee lon calitra

Nyang keulhee lon neumeung peugah

Uleh ayah lom neukira

Keulhee haba raja peugah

Neuyue minah Lason muda

Bek jideungo uleh putroe

Neupeugah nyoe ubak Bangta

Ureueng laen bek meusidroe

Po samlakoe neubri aja

Bek jideungo dum aneuk droe

Salang Putroe Lason muda

Dumnan 'izat adoe bungong

Bek roh inong ngo rahsia

Rakna Bangta mangat ate

Nasihat neubri uleh raja

Teuma keulhee raja rawi

Bak Kumari neubri aja

Wahe aneuk uleebalang

Tameutang bijeh mata

Tameutang deungo lon kheun

Bek bak ureueng baro kaya

Tameuutang he Kumari  
Biek meubuni urueng kaya  
Teuma keupeuet aneuk badan  
Tameurakan lon peuhaba  
Tameurakan nyang meukawom  
He aneuk lon bijeh mata

Nyang aneuk ureueng tuha dilee  
Beuna tathee han jiboh gata  
Meunyo meunan he boh ate  
Jitem mate sajan gata

Tameurakan baranggasoe  
Akhe dudoe jiboh gata  
Nyan amanat lon nyang keupeuet  
Jinoe nyak cut nyang keulima

Nyang keulimong he bungong cret  
Taseumeugot wahe Bangta  
Taseumeugot nyak meutuah  
Takheun upah beumeuhingga

Bek takheun-kheun barang mudah  
Akhe teulah nyan tarasa  
Cit beuteuntee upah tabri  
He Kumari bijeh mata

'Oh nan haba Tajul Baki  
Wasiet neubri bak aneukda  
Rakna Bangta that neupakoe  
Dum sinaroe wasiet bapa

Lheueh nibak nyan padum uroe  
Raja nanggroe tinggai donya  
Kakeu mate Tajul Baki  
Ka troh janji ajai teuka

Meuka udep wajeb mate  
Baranggari nyang meunyawa  
'Oh ka troh had sampoe janji  
Bandum tacre deungon donya

Kakeu mate deelat payong  
Bajek sukon tingai dua  
Sidroe inong Putroe Lason  
Deungon aduen Rakna Bangta

Raja mate geuseumane  
Dum ureueng moe han ek kira  
'Oh lheueh ase geuseumane  
Pasoe jinoe lam keureunda

Geutanom le teuma leugat  
Miseue adat raja raja  
Ureueng nyang moe han peue surat  
Panyang that han ek calitra

Cit ka maklum rakan sahbat  
Mate deelat raja raya  
Ulon peugah haba nyang rab  
Bek panyang that glak tabaca

'Oh lheueh tanom raja deelat  
Jinoe sahbat geubileueng sa  
Kira uroe geukhanduri  
Buet Si Nyak Ti Lason muda

Phon nibak sa sampie tujoh  
Troph bak lhee ploh hana reuda  
Geusie kameng hana teudoh  
Keubeue meureugoh lumo raya

Ureueng nanggroe keu nan dum troh  
Jak pajoh khanduri raja  
Tiep-tiep uroe hana teudoh  
Ureueng pajoh talak hawa

Agam inong keu nan dum troh  
Tango kiroh kiam subra  
Raja mate ma teungku beh  
Troph sireutoh khanduri ka

Hingga teuma 'oh nan teudoh  
Bungong ipoh lon calitra

Lon seubot Bangta Kumari  
Ngon Putroe Ti Lason muda

Sinan teuduek di meuligoe  
Geunap uroe ro ie mata  
Han meusampe neupeutimang  
Ayah ngon nang ka neubungka

Teuduek 'oh nan dilee siat  
Jinoe ayat bah lon tuka  
Bek lagee sot kureueng mangat  
Bak lon ingat he syeedara

Bah lon balek dilee siat  
Wahe sahbat sang-sang gura  
Amma bakdu he syeedara  
Rakna Bangta lon hareutoe

Sinan teuduek sapat dua  
Ngon adekda Lason Putroe  
'Oh lheueh mate poteu raja  
Bak syeedara keu nan neuwoe

Sinan sabe ate suka  
Bak syeedara Lason Putroe  
Hana gundah meusigeutu  
Ate rindu malam uroe

Na sang bunda jipeulaku  
Si nyak bungsu got hareutoe  
That jigaseh keu syeedara  
Lason muda bayek budoe

Hana neuthee mate bunda  
Got syeedara si nyak putroe  
Padum lawet sinan teutap  
Neiduek sapat deungon adoe

Sidroe ureueng lon riwayat  
Deungo sahbat dum sinaroe  
Lam nanggroe nyan sidroe ureueng  
Saboh bayeuen jihareutoe

Jipeulara saboh bayeuen  
Jibri umpeuen geunap uroe  
Aneuk bayeuen jipeulara  
Hana nyang sa meunan ragoe

Ngon ceureudek hana tara  
Lom troh mata di bayeuen nyoe  
Ngon meutuah bayeuen rimba  
Treh areuta geunap uroe

Padum lawet akhe masa  
Jimeuseunda deungon po droe  
Wahe teungku cahya mata  
Han neukira le keu kamoe

Cintra meuek kхиeng lagoina  
Hana geuma lon duek sinoe  
Teugoh teungku le areuta  
Ate suka malam uroe

Sinja neueh di teungku jroh  
Neubeudoh 'oh leuho uroe  
Ulonceu nyoe han neusatoh  
Sang ka teuboh meunankeu proe

Meunan jikheun bayeuen rimba  
Beungeh raya di teungku nyoe  
Peue kapeugah bayeuen paleh  
Kuseumbeuleh kah uroe nyoe

Kukoh takue nyawong abeh  
Kutet keu deh dalam apui  
Meunan jikheun ngon gurantang  
Bayeuen rijang seuot meunoe

Bek neusie lon uleebalang  
Saboh panggang hana asoe  
Meunyoe beunci that keu hamba  
Keu Rakna Bangta neujak peubloe

Meunan bayeuen jiseumeugah  
That meutuah binatang nyoe

Sabab utoh bak seumeugah  
Sangat sosah di teungku nyoe

Teuma seuot ureueng po nyan  
Deungo kaman bayeuen pindoe  
Padum lagot kah hai bayeuen  
Cuba kakheun bak lon sidroe

Seuot bayeuen he teungku beh  
Riyeue siploh barangsoe bloe  
Bayeuen paleh that beurakah  
Jeuet kapeugah meudeh meunoe

Meukek lagot meusitahe  
Uroe nyoe le kujak peubloe  
Di ureueng po meunan jikheun  
Seuot bayeuen teuma meunoe

Bit he teungku bukon seunda  
Neuba sigra lon uroe nyoe  
Bayeuen ngon po teungoh meudawa  
Troph le Bangta keu nan sampoe

Troph le keu nan Bangta Kumari  
Deungo akhi lon hareutoe  
Hana meukon hana meukri  
Bangta Kumari keu nan sampoe

Ban jikalon uleh bayeuen  
Meunoe jikheun wahe adoe  
Wahe teungku deelat ampon  
Neutueng ulon tuanku droe

Bahle neubloe jinoe ulon  
Deelat ampon bek syen keu rugoe  
Meunan jikheun ubak Bangta  
Bayeuen rimba nyang that ragoe

Ban neudeungo meunan haba  
Neubloe lanja le samlakoe  
Neubloe bit-bit hana dawa  
Uleh Bangta Kumari nyoe

Han neutanyong padum na yum  
Baranggadum yoh nyan neubloe  
Siploh riyueue bayeue laju  
Ate rindu galak han soe

'Oh lheueh neubloe adoe teungku  
Teuma laju Bangta peuwoe  
Cit ka beuklam leumah rahsia  
Sang meutia Bangta peuwoe

Sang meutia jitiek u krueng  
Po Bangta tueng boh lam jaroe  
Po Bangta cok boh lam paleuet  
Bak adek cut neujok dudoe

Teuma jaga nibak teungeut  
Neuleung paleuet po samlakoe  
Sang-sang ka na dalam reugam  
Bangta seudang galak han soe

Teuma neujak laju curam  
Bak ureueng nyan po bayeuen nyoe  
Ban neulakee jibri sigra  
Suka cita hana bagoe

'Oh lheueh neubloe neuwoe rijang  
That sukaan po samlakoe  
Deungon cintra neuba sajan  
Bak cut intan laju neuwoe

Keu deh neuwoe deelat ampon  
Bak Cut Lason nyang adek droe  
'Oh sare troh woe u mideuen  
Meunoe neukheun bak cut putroe

Wahe nyak cut Putroe Lason  
Tadeungo lon wahe adoe  
Nyoe na saboh aneuk bayeuen  
Tapeuumpeuen he sambinoe

Bayeuen lon nyoe tapeulara  
Dua gata wahe putroe

Meunan neukheun Rakna Bangta  
Neucalitra ubak adoe

Lheueh nibak nyan Bangta Kumari  
Neukeumeung ci tuan putroe  
Narit meuumom jinoe lon ci  
Deungon Siti adek manoe

Bandua ngon Bangta Silah  
Judo nyang sah Lason Putroe  
Nyankeu judo putroe indah  
Ka lheueh nikah yoh saboh roe

Ulon cuba wasiet ayah  
Nyang neupeugah dilee baroe  
Bek deungon gop narit umom  
Han got bangon teuma dudoe

Bahle ngon droe nyang nyoe saboh  
Adat jipohpi keudroe-droe  
Meunan pike Rakna Bangta  
Mita dawa geunap uroe

Meunan leumah dalam ate  
Meunan pike po samlakoe  
Ureueng dua hana jithee  
Bungong keumee deungon lakoe

Hana neuthee Bangta Silah  
Le that ilah po samlakoe  
Hingga teuma lawet lawan  
Deungo teelan lon hareutoe

Grak teukeudi nibak Tuhan  
Lheueh bayeuen nyan bak siuroe  
Neujak keu nan Bangta Silah  
Ka neupeuhah cintra beusoe

Bak siuroe deungo lon kheun  
Cintra bayeuen di seuramoe  
Roh neupeuhah cintra bayeuen  
Ka neusurung keu nan jaroe

Deungon jaroe neumat bayeuen  
Neubri umpeuen leugat jinoe  
Umpeuen neubri deungon tangan  
Lheueh nibak nyan neusuet jaroe

Neusuet jaroe cintra teuhah  
Tuwo babah neutop bunoe  
Bayeuen teubiet jipo leupah  
Bangta Silah tahe keudroe

Di bayeuen nyan dilee nyang ka  
Euntreuk sinja teuma jiwoe  
Meunan sabé he syeedara  
Bayeuen Rimba sangat ragoé

Cit neupeulheueh Rakna Bangta  
'Oh ka sinja teuma jiwoe  
Rakna Bangta ate meebureuen  
Peulheuh bayeuen lakoe pütroe

'Oh neukalon han le bayeuen  
Hana peue kheun mangat asoe  
Mangat ate Rakna Bangta  
Trok ban pinta wahe adoe

Nyan phon neuci narit ayah  
Mita ilah meudeh meunoe  
Yoh nyan Bangta mita pike  
Deungon Cut Ti'nyang adek droe

Mangat ate hana tara  
Ka jeuet dawa bak siuroe  
Jeuet neumarit nyang meuumom  
Meunan bangon deungon adoe

Hana meungon mita masam  
Ngon parui nyan lakoe adoe  
Cit dilee kon neumita pi  
Bangta Kumari neuiem-iem droe

Bak uroe nyan wahe akhi  
Ka neuwoe le u meuligoe

Bangta Silahpi di sinan  
Bandua nyan po samlakoe

Rakna Bangta neukek langsong  
Neumarit phon deungon adoe  
E hai nyak cut Putroe Lason  
He bintang lhon cicem ho roe

Rakna Bangta beungehneu that  
Pirak lipat marit meunoe  
Wahe nyak cut putroe buleuen  
Ho ka bayeuen po sambinoe

Teuma seuot putroe buleuen  
Cicem bayeuen he dalem droe  
Putroe Lason su sang gambang  
Putroe seudang jikheun meunoe

He dalem cut uleebalang  
He cut abang ureueng lakoe  
Bayeuen ka lheueh he kakanda  
Kon geusaja tuanku droe

Bunoe beungoh geubri umpeuen  
Teuma bayeuen jipo keudroe  
Putroe Lason meunan neukheun  
Seuot aduen teuma meunoe

Peue kapeugah meunoe meudeh  
Kah bit paleh bandua droe  
Rakna Bangta neuceumarot  
Teuma seuot lakoe putroe

He teumuda bek kheun meunan  
Binatang nyan ulon gantoe  
Siploh laen jinoe lon bri  
He Kumari teumuda kamoe

Meuhan meunan ban nyang suka  
He teumuda tuanku droe  
Boh neuboh yum ban nyang suka  
He teumuda lon bri jinoe

Ulonteu bri ban nyang neukheun  
Meunyo bayeuen hana jiwoe  
Asai beujroh lon ngon aduen  
Ban nyang neukheun suka kamoe

Meunan neukheun Bangta Silah  
Seuot bagah po samlakoe  
Hom-hom teuma Bangta seuot  
Hom meudhot-dhot hana bagoe

Rakna Bangta neuceumarot  
Tan neuseuot lakoe putroe  
Trah siploh seun neuceumarot  
Ate meupot-pot po samlakoe

Teuma neukheun le Kumari  
Wahe Nyak Ti adek kamoe  
He Cut Lason nyak meutuah  
Paleh di kah lakoekeu nyoe

Neuceumarot sabe-sabe  
Neuseot le lakoe putroe  
Han ek saba lon bak ate  
Meunan sabe hana padoe

Bak neukira bahle mate  
Meunan pike lam ate droe  
Bangta Silah teuma seuot  
Mukaneu krot beungeh tuloe

Peue kareuna neuceumarot  
That meupot-pot peurab keu noe  
Bangta Silah ka meutat-tat  
Neumeung lumpat u seuramoe

Neusuet peudeueng neukeumeung tren  
Putroe Lason neueu jimoe  
Teuma neutak binteh rambat  
Beungehneu that hana bagoe

Yoh nyan tajo putroe seudang  
Nibak pinggang jimat lakoe

Wahe teungku uleebalang  
Ulon neucang he judo droe

Meunan jikheun putroe seudang  
Reuloh subang bak drop lakoe  
Rumoh putroe tatkala nyan  
Ureueng laen tan meusidroe

Hana soe thee peurdawaan  
Hana kiam wahe adoe  
Bangta Silah neumeung lawan  
Hana macam beungeh tuloe

Rakna Bangta yoh nyan neukheun  
Bak cut buleuen Lason Putroe  
Wahe adek Putroe Lason  
Keu noe tatreng nyak sambinoe

Hana bit-bit lon meudawa  
Tren adekda siat keu noe  
Meunan neukheun Rakna Bangta  
Deungo sigra judo putroe

Judo Siti deungo haba  
Peugah haba ubak adoe  
Rakna Bangta lom meututo  
Neudeungo su lakoe putroe

Rakna Bangta neuseumeugah  
Bangta Silah seunggap jinoe  
Tadeungo lon nyak meutuah  
Narit ayah yoh saboh roe

Ulonteu ci narit ayah  
He meuh mirah adek kamoe  
Beutadeungo he adekda  
Ulon cuba bak uroe nyoe

Surat amanat yoh na bapa  
Limong peukara wahe adoe  
Surat amanat ngon rahsia  
Rakna Bangta surat keudroe

Po Bangta jok bak syeedara  
Neuyue baca ubak lakoe  
Putroe peukek teuma sigra  
Jijok teuma bak judo droe

Bangta Silah teuma baca  
Neueu haba lam surat nyoe  
Abeh neungieng dum peukara  
Ate suka judo putroe

Bangta Silah baca abeh  
Ate puleh han le seungkoe  
Neutiek peudeueng dalam binteh  
Neutren keu deh u seuramoe

'Oh troh keu deh bak teumuda  
Meucom meuwa bandua droe  
Taeu tijoh ngon ie mata  
Bandua ka meunan bagoe

Bangta Silah marit sigra  
He kakanda pakon meunoe  
Pakon ngon lon neumeuseunda  
Han tom nyang ka dilee puroe

Meunan neukheun Bangta Silah  
Khem meuhah-hah po samlakoe  
Bek takira nyang ka leupah  
Lon ci ayah wahe adoe

Ulon cuba ban ayah kheun  
Lon thee bayeuen euntreuk jiwoe  
Pura-pura beungeh ulon  
Adek payong bek tapakoe

Teuduek 'oh nan saboh leua  
Rakna Bangta lon hareutoe  
Padum lawet akhe masa  
Rakna Bangta kheundak boh droe

Ka teupike dalam dada  
Bah lon bungka siat jinoe

Neuduek neudong ate rugha  
Kheun rahsia ubak adoe

He adek cut bungong sukon  
Leupah ulon bak uroe nyoe  
Lon meung bungka lon boh gampong  
Idin keu lon wahe adoe

Meuna umu bajek sukon  
Dudoe lon tren gisa keu noe  
Teuma seuot Putroe Lason  
Tadeungo lon he cut bang droe

Pakri neujak he kakanda  
Meutan gata teuboh nanggroe  
Meunan neukheun putroe muda  
Seuot Bangta teuma meunoe

Meunyo meunan he adekda  
Lon boh raja kaman jinoe  
Bahle lon boh judo gata  
He adekda raja nanggroe

Meunan neukheun Rakna Bangta  
Lason muda jawueb meunoe  
Putroe kheun hom nyan kaman hom  
Ban nyang meufom tuanku droe

Meunan narit Putroe Lason  
Teungku ampon lon hareutoe  
Neukrah rakyat ngon peutua  
Neuboh raja lakoe kamoe

Kadang rakyat han jirela  
He meukuta lakoe putroe  
Yoh nyan Bangta yue krah rakyat  
Troph le leugat keu nan sampie

Laju geutet beude nubat  
Troph le rakyat jeuoh ngon toe  
Tunong Baroh Timu Barat  
Ka meusapat dum sinaroe

'Oh ka abeh dum meusapat  
Geuangkat judo cut putroe  
Rakna Bangta nyang phon deelat  
Bandum rakyat seuon jaroe

Bangta Silah jinoe raya  
Parui Bangta judo putroe  
Lheueh geutabai bak keurajeen  
Intan buleuen nyang samlakoe

Kulah kama atueh ulee  
Mangat meuthee raja nanggroe  
Lheueh geudeelat meuhei sare  
Geutet beude kiam bunyoe

Tujoh seun tujoh tet meuriam  
Rasa karam leungo nanggroe  
Hingga abeh dumpeue leungkap  
Ban nyang adat reusam nanggroe

Teutap Raja Bangta Silah  
Mat peurintah dum sinaroe  
Raja Silah jroh that ade  
Mangat ate rakyat nanggroe

Dumna rakyat seunang ate  
Reubot tan le dalam nanggroe  
Tan le reubot ngon pancuri  
Sabong judi tan he adoe

Lawet keurajeen Bangta Silah  
Kon beurakah seunang nanggroe  
Nyang meumukah hukom gasi  
Nyang pancuri geukoh jaroe

Nyang meureubot jukom tupang  
Dum sibarang neuhareutoe  
Dumpeue neuyue sidek sasat  
Hukom teupat dalam nanggroe

Dumnan ade raja deelat  
Neuyue hareukat ureueng nanggroe

Jeuep meunasah neuyue seumeubeuct  
Pitrah jakeuet dum neupasoe

Teutap keurajeuen Bangta Silah  
Ulon kisah laen jinoe  
Rakna Bangta ulon peugah  
Kheundak langkah bungka jinoe

Teutap pike Rakna Bangta  
Kheundak bungka po samlakoe  
Neukeumeung jak ho langkah ba  
Bak syeedara jak peugah proe

He Cut Lason adek badan  
Lon beurjalan bak uroe nyoe  
Tinggai gata he buleuen trang  
Dua sajan ngon judo droe

Ban neudeungo narit meunan  
Neumoe yoh nyan Lason Putroe  
Neumoe bae putroe seudang  
Wahe cut bang ho neuboh droe

Bukon sayang nira lipah  
Trep takeubah masam keudroe  
Bukon sayang lon hana mbah  
Dalem leupah jeuep-jeuep nanggroe

Bukon sayang jeumpa mirah  
Cabeueng patah sret u bumoe  
Ma lon han le deungon ayah  
Cut bang leupah lom neuboh droe

Bukon sayang mirapati  
Cicem nuri ayeuen jaroe  
Leupah dalem neupeureugi  
Saleh pakri ulon jinoe

Bukon sayang Putroe Siti  
Karong wali hana sidroe  
Na cut abang Bangta Kumari  
Neupeureugi jeuep-jeuep nanggroe

Jeuetkeu dumnan haba bae  
Han ek ato panyang rampoe  
Rakna Bangta nyang meusyeuhu  
Neutren laju di meuligoe

Neujak sidroe teungku ampon  
Jeuep-jeuep jurong tamong jinoe  
'Oh abeh blang tamong jurong  
Jeuep-jeuep gampong jak samlakoe

Hingga troh bak saboh peukan  
Neubeurjalan laju sidroe  
Padum uroe neujak tajam  
Ka troh tuan saboh nanggroe

Saboh nanggroe Duson Yaman  
Geurasi nan he teungku droe  
Sampoe keu nan Bangta neujak  
Han that jarak ngon teumpat droe

Kira-kira limong uroe jak  
'Oh nan jarak wahe adoe  
Ka troh keu nan Bangta Kumari  
Han soe tukripi meusidroe

Rakna Bangta han taturi  
Wahe akhijisangka soe  
Hana soe thee aneuk raja  
Laen rupa neupeugot droe

Neungui ija nyang slap bangka  
Meunan rupa po samlakoe  
Ngon seunampai meuploh lapeh  
Ija puteh wahe adoe

'Oh gop tanyong soe nan gata  
Leube Muda neukheun nan droe  
Nyankeu nama Leube Muda  
Ka troh teuka bak nanggroe nyoe

Padum na trep keu nan Bangta  
Lalu teuka geusyik sagoe

Leube Muda meubri saleuem  
Meunoe neukheun wahe adoe

Assalam 'alaikum teungku geusyik  
Kamoe teutiek bak teumpat nyoe  
'Alaikum salam jawueeb geusyik  
Bungkoh geutiek meumat jaroe

Teungku geusyik peugah baten  
Sira khem-khem geupeugah proe  
Gata Leube lon peukawen  
Tanda lon syen ka troh keu noe

Bek han tatem leube Muda  
Nyang jroh rupa lon bri jinoe  
Teuma neutem han le dawa  
Han neukira le barangsoe

Neukheundak ci narit ayah  
Meunan leumah lam ate droe  
Nyang jeuet neutem Leube Muda  
Narit bapa neuci ujoe

Neupeukawen yoh nyan bit-bit  
Buet geusyik peutua sageo  
Sideh ase dara baro  
Geuba linto teuma sinoe

Ulon peugah dara baro  
Ngo lon ato mangat meusoe  
Nama geukheun Siti Uba  
Na sikada areuta droe

Han that gasien han that kaya  
Deungon rupapi jroh bagoe  
Keu jeunamee limong tahe  
He boh ate geuba jinoe

Neupeunikah uleh teungku  
Neukheun laju teuma meunoe  
Lon peunikah Siti Uba  
Keu gata nibak malam nyoe

Bangta seuot insya Allah  
Teungku syiah lheueh nyan neuwoe  
Leube Muda sinari dahsyah  
Sajan zeejah bak rumoh nyoe

Watee uroe jak u peukan  
Mita rakan wahe adoe  
Bandum ureueng jeuet keu rakan  
Le seunuban po samlakoe

Meuna siblet neueu ureueng  
'Oh meuteumeung meumat jaroe  
Dimnan lisek bungong sumpueng  
Ka rame dum nyang rakan droe

Teuduek 'oh noe dilee siat  
Jinoe ayat ulon tuka  
Nyang mate ya 'oh nan teutap  
Jinoe meuhad nyang udep a

Rakna Bangta teutap sinan  
Bak inong nyan Siti Uba  
Rakna Bangta wahe akhi  
Neukheundak ci som rahsia

Hana daya rot neuilah  
Peue lon peugah nyan rahsia  
Rakna Bangta ate sosah  
Hana ilah ngon bicara

Peuet blah buleuen Bangta sinan  
Bak masa nyan saket nisa  
Siti Uba yoh nyan saket  
Teuka ciret hana reuda

**H**ingga teuma padum lawet  
Teudol ciret Siri Uba  
Puleh saket ureueng binoe  
Jikheun meunoe bak judonya

Wahe teungku ureueng lakoe  
Ulonteu nyoe saket hawa

Keu sie bayeuen hawa lon that  
Jinoe leugak neujak mita

Ulon saket hana sakri  
Meuhan neubri putoh asa  
Meunan jikheun le esteuri  
Ka teukhem le Leube Muda  
Mangat ate Bangta Kumari  
Ka jeuet neuci narit bapa  
Ka jeuet neuci wasiet ayah  
Neupeugah haba rahsia

Meunan leumah dalam ate  
Teutap pike leuba Muda  
Yoh nyan Bangta ka neutanyong  
Ubak inong neupareksa

Wahe judo ureueng inong  
Lon teumanyong ubak gata  
Haba gata bunoe takheun  
Aneuk bayeuen tayue mita

Pat lon mita wahe buleuen  
Nyang na bayeuen nibak raja  
Nyang na meuhad nibak putroe  
Ayeuem jaroe Rakna Bangta

Pakri lon cok he sambinoe  
Meuthee dudoe mate hamba  
Meunan neukheun po samlakoe  
Ureueng binoe jaweueb haba

Meunyo meunan he teungku droe  
Neujak jinoe pantah sigra  
Bek tapeugah bak barangsoe  
Taiem droe geutanyoe dua

'Oh lheueh tasie taboh ulee  
Taboh bulee nyan le gata  
Bek jituri bek ureueng thee  
Neuboh bulee ngon keupala

Ureueng lingkapi cit meunan  
Tasie yoh nyan sigra-sigra  
Siti Uba marit meunan  
Seuot yoh nyan Leube Muda

Keupeue jithee le ureueng laen  
Kadang tatem peugah le gata  
Meunan neukheun po samalakoe  
Ureueng binoe seuot sigra

Han patot lon peugah lakoe  
Akhe dudoe teumeureuka  
Meulon peugah he teungku droe  
Teulah kamoe nyan ngon gata

Nyan dum teungku neutem ilah  
Kon paleh sah lon peuhaba  
Meunan jikheun ureueng binoe  
Ureueng lakoe jak meumita

Teuma seupot le ngon uroe  
Bandua droe meuseunia  
Teuma jaga beungoh uroe  
Bandua droe teubleut mata

Leube Muda marit meunoe  
Deungo kamoe he Nyak Uba  
Ulon kujak bak uroe nyoe  
Siplong uroe troh lon gisa

Suboh uroe laju neutren  
Goh lom makeuen neujak lanja  
'Oh watee bu baro makeuen  
Meunan geukheun lam calitra

Limong uroe sabe neujak  
Ka troh ubak Lason muda  
.oh troh keu nan neujak sidroe  
Seupot uroe le ho sinja

Jula malam raja teungeut  
Deungan po Cut Lason muda

Rakna Bangta jak reuen-mareuen  
Masa jameun he syeedara

Troh u rumoh tango lon kheun  
Neucok bayeuen dalam cintroe  
'Oh lheueh neucok peutren mameung  
Ka neubaplueng peuwoe lanja

Tatkala nyan deungo lon kheun  
Cicem bayeuen sosah raya  
Nyang jeuet sosah jisangka soe  
Teuma dudoe jithee Bangta

'Oh jithee muda samlakoe  
Ka jjiem droe bayeuen rimba  
Rakna Bangta neuwoe mameung  
Neume bayeuen tinggai cintra

Keubah cintra dalam uteuen  
Neuboh bayeuen dalam ija  
Teuma neubloe mirapati  
Bangta Kumari le bicara

Laju neusie neuboh gaki  
Dan lagi neuboh keupala  
Neuboh gaki deungon ulee  
Neuboh bulee sigra-sigra

Meunan macam neupeulagee  
Bek meuthëe bak ureueng lingka  
Siti Uba bek jituri  
Mirapati sie le Bangta

Meunan Bangta neuboh taki  
Bek meuri bak Siti Uba  
'Oh troh neuwoe neundong di leuen  
Troph bak rinyeun neuhei sigra

He Nyak Uba keu noe leugat  
Troph ban hajat napsu gata  
Sabab gata hawa bayeuen  
Dalam uteuen lon meuraba

Siti Uba teuma jikheun  
Ka jitanyong ulee ho ka  
Leube Muda jaweueb meunoe  
Tango kamoe wahe nisa

Peue tatanyong peue tasudi  
Nak bek meuri singoh lusa  
Meunan neukheun po samlakoe  
Ureueng binoe han le haba

Siti Uba teuma taguen  
Nyo bit bayeuen bak jisangka  
Hana jithee mirapati  
Keunong taki Leube Muda

'Oh masak nyan adoe teungku  
Jitaguen bu han teukira  
Jitaguen bu nam kai katoe  
Jitalak droe Siti Uba

abeh bandum pajoh keudroe  
Meukeu lakoe han peutaba  
Galak ate hana bagoe  
Mangat asoe puleh hawa

Siti Uba teuduek 'oh nan  
Lon karangan laen pula  
Leube Muda lon peugah ban  
Mita jalan laen pula

Bayeuen bunoe he teungku beh  
Keu deh geutroh atueuh para  
Leube Muda khun bak bayeuen  
E hai ulon deungo hamba

Kah kupeulheueh teuma jinoe  
Bek kawoe-woe ubak raja  
Watee malam kawoe keu noe  
'Oh uroe kajak lam rimba

Bak Cut Lason bek kawoe-woe  
Ingar keudroe kutueng nyawa

Meunan neukheun nyan neupeugah  
Jimeusumpah bayeuen rimba

Hana lon woe deumi Allah  
Meunyo salah bak meukuta  
Bayeuen rimba meunan jikheun  
Teuma neutren Leube Muda

Neujak laju troh u peukan  
Soe tupeue tan aneuk raja  
Sidroe ureueng hana jithee  
Jikheun teuntee Leube Muda

Bandum ureueng sang geutipee  
Laen lagee peugot rupa  
Aneuk raja jitupeue tan  
Droe geuboh nan Leube Muda

Leube Muda troh u peukan  
Jak meuutang yoh nyan sigra  
Na dua ploh neumeutang  
Bak urang nyang baro kaya

Deungon siwapi ka meuban  
Peurjanjian ureueng dua  
Lam siringget siwa sigupang  
Meunan teelan janji nyang ka

Keumah sinan bak ureueng nyan  
Beudoh sinan neujak lanja  
Teuma neujak Bangta Kumari  
Bak meubuni ureueng kaya

'Oh troh keu nan neupeugah kri  
Saleuem neubri peumulia  
Wahe teungku lon that alang  
Neupeu jampang siklep mata

Neupeuutang meulimong ploh  
He teungku beh gaseh hamba  
Lam sibuleuen he pangulee  
Limong sukee lon bri laba

Meunan neukheun wahe teelan  
Lakee pinjam keu beulanja  
Rakna Bangta jak meuutang  
Neumeuayang he syeedara

Bak droeneu le meuribee-ribbee  
Pura lakee neuci haba  
Sabab neuci wahe adoe  
Ringget bak droe peue takira

Dum simua neusom baten  
Dalam dihen aneuk raja  
Neusom kaya peuleumah gasien  
Lom he po lem droeneu hina

Peuhina droe Bangta seudang  
Bek jituban aneuk raja  
Teuma geubri geupeutang  
Lheueh nyan rijang woe u tangga

Leube Muda yoh nyan neuwoe  
U rumoh droe Siti Uba  
Hingga teuma singoh uroe  
Po Leube nyoe jak u banda

Neubloe peudeueng na dua boh  
Peudeueng jroh-jroh nyan bandua  
'Oh lheueh neubloe peudeueng jroh-jroh  
Lom neubeudoh neujak lanja

Laju neujak muda seudang  
Mita rakan soe nyang suka  
Peudeueng neubloe he adek beh  
Ngo beukhusuh lon calitra

Dua reutoh bandua boh  
Sangat that jroh indah rupa  
Teuma meuteumeung wahe adoe  
Baranggasoe ureueng muda

Neujok peudeueng keu nan saboh  
Niet ka neuboh lam kuala

Sang ka neutiek lam beurawang  
Bangta seudang meunan kira

Cit ka neuthee bangsa kureueng  
Neujok peudeueng cit neusaja  
Nyoe ulon bri wahe teelan  
Jeuet keu rakan lon ngon gata

Beukit gop pake di rot di blang  
Ka jeuet rakan na soe jaga  
Geutanyoe ka saboh ibu  
Sang saboh du he syeedara

Beujeuet geutanyoe adoe aduen  
Meunan neukheun Rakna Bangta  
Teuma seuot di ureueng nyan  
Sabet meunan he syeedara

Meunan nyang got he samlakoe  
Taeu dudoe jan na bahya  
Peudeueng dua han lon bri sret  
He adek cut meuna hamba

Jeuet takalon teuma dudoe  
Wahe adoe jan na bahya  
Meunan jikheun Lem Kumiran  
Meuna lawan bek roh gata

Neudeungo su hana sakri  
Cit ka neuci bak suara  
Leube Muda neuseuot le  
Bek he akhi teukabo ria

Kon teukabo wahe adoe  
Taeu dudoe jan na bahya  
Taci cang gop teuma sidroe  
Taeu ujoe pakri rupa

Meuhad gata taduek keudroe  
Bahle kamoe jipoh bila  
Jeuet taeu ngon mata ulee  
Taeu buet kee saboh masa

Meunan jikheun Lem Kumiran

Hana lawan bak ri rupa

Leube Muda seuot sikrak

Han patot hak narit gata

Hana patot ulon meutak

Hana cabak beuthat muda

Lem Kumiran seuot pantah

Kon beurakah tuto hamba

Taeu bit na ban lon peugah

He meutuah jan na bahya

Meunan jikheun Lem Kumiran

Nyang n.eurakan deungon Bangta

Nyang jeuet lon kheun Lem Kumiran

Hana lawan bak suara

Meubek lon kheun bak ureueng nyan

Got lon boh nan ri nyang suka

Teuma lon kheun Lem Kumiran

Keumah padan deungon Bangta

Bangta beudoh teuma neujak

Troh ubak aneuk bentara

Kira-kira han that jarak

Sikhan uroe jak troh neugisa

Leube Muda ka troh neujak

Meurumpak aneuk bentara

Nyankeu aneuk Bentara Blang

Bangta Sawang geukheun nama

Na taturi Bentara Blang

Nyan cut abang Keujruen Muda

Masa mate Bentara Blang

Bangta Sawang goh lom raya

Dumna wase abeh jitueng

Uloh Keujruen apa Bangta

Teuma jinoe han jipulang

Bangta Sawang sayang raya

Sabab aneuk uleebalang  
Alang-pialang he syeedara

Han that jijeuet seuon umpang  
Bangta Sawang aneuk Bentara  
Po Bangta cut lakee pulang  
Meukon jeuet prang deungon apa

Hana ilah neupuga prang  
Bangta Sawang tan beulanja  
Jeuetkeu dumnan ulon peutrang  
Lon peuriwang Leube Muda

Leube Muda ka troh keu nan  
Bak Bangta nyan ka troh teuka  
Meumat jaroe meujok bungkoh  
Ranup geupajoh sabe mulia

Ranup geupajoh goh lom bicah  
Buka babah Leube Muda  
Nyoel na dalem peudeueng ek beusoe  
Bungong jaroe dagang hina

Lon jak keu noe ngon jaroe soh  
Peudeueng saboh syarat mulia  
Beusoe ileue he adueh jroh  
Jampang meukoh bak-bak buga

Bangta Sawang laju seuot  
Nyo ban patot narit gata  
Di Kamoe nyoe m:alee sipu  
Adoe teungku meubak gata

Kru seumangat wahe adoe  
Bak kamoe atueh jeumala  
Nibak gata na sidumnoe  
Nibak kamoe han sapeue na

Lah ka tabri adek badan  
Toh pakri ban lon meudawa  
Meunan neukheun Bangta Sawang  
Seuot rijang Leube Muda

Bek meudawa he teungku cut  
Aduen seubot di lon gata  
Adat gop poh nyawong teusuet  
Jeuet tatuntut yum le gata

Kru seumangat he adoe cut  
Tuhan Makbud nyang peulara  
Meunan neukheun Bangta Sawang  
Neulakee riwang Rakna Bangta

Leube Muda laju neuwoe  
Sikhan uroe jalan safra  
Trok u rumoh po samlakoe  
Ubak binoe Siti Uba

Aneuk gunci mat u jaroe  
Ceu'iet peutoe le neubuka  
Leube cok meuh yoh nyan leugat  
Sibungkai brat bak lon kira

Ubak pande neuba rijang  
Peugot subang Siti Uba  
'Oh troh neujak ubak pande  
Saleuem neubri peumulia

Assalam 'alaikum dalem pande  
Lon teubade ubak gata  
'Alaikum salam he Leube cut  
Peue meukeusud Leube Muda

Peue na hajat tameukeusud  
Peugah ban buet ubak hamha  
Bangta seuot leumah-leumbot  
Na meukeusud dalem raja

Subang di lon nyang meukeusud  
Dalem peubuet laju sigra  
Cit beurijang dalem peubuet  
Beulheueh lam peuet uroe saja

Leube marit sunggoh-sunggoh  
Teungku utoh jawueb haba

Padum upah he adoe beh  
Takheun beutroh beumeuhingga

Padum keu lon upah tabri  
Neuseuot le Leube Muda  
Nyaṅg keu upah jeuet barangkri  
Bahle lon bri ban nyang suka

Baranggadum lon bri leugat  
Peue nyang hajat ulon peuna  
Han gata tem ulonteu tem  
Asai dalam beupueh hawa

Baranggadum lon peupeunoh  
Beukit singoh adat lusa  
Meunan adoe beukong janji  
Bit tatem bri ban lon pinta

Leube Muda jaweueb meunoe  
Tango kamoe bek syok sangka  
Pakri dalem han kong janji  
Taeu lagi singoh lusa

Meunan narit nibak Leube  
Seungap pande han le haba  
Teuma seuot utoh pande  
Ka meusampe napsu gata

Meunyo meunan beudoh jak woe  
Tajak keu noe lusa raya  
Leube Muda yoh nyan neuwoe  
Troh tanggoe bak Siti Uba

Troh had janji bak peuet uroe  
Tango jinoe lon calitra  
Leube Muda jak bak pande  
Tan geuturi aneuk raja

'Oh troh keu nan he boh ate  
Teukhem pande hana reuda  
That meukhak-khak pande teukhem  
Dalam dihen galak raya

Leube tanyong pakon takhem  
Wahe dalem peue di mata  
Hana sapeue wahe adoe  
Ka troh sampoe hajat gata

Meunan jikheun uleh pande  
Neutanyong le Leube Muda  
Meunyo ka lheueh he teungku droe  
Neujok keu noe laju sigra

Teuma pande beudoh rijang  
Geucok subang Leube Muda  
Leube Muda neujok riyeue  
Nyoel leupeue upah di gata

Neujok riyeue na siploh boh  
Pande kheun goh lom samporna  
Leube Muda baluem neuplch  
Dua ploh boh lom neuganda

Goh lom cit sep kheun po utoh  
Troph limong ploh neubri sigra  
Nyanpi goh sep lem pande kheun  
Tahe hireuen Rakna Bangta

Nyoel nyang ka troh ban ayah kheun  
Masa Jameuen ubak hamba  
Yue seumeugot meu'oh upah  
Bek meubantah akhe masa

Meunan pike Eangta indah  
Hana leumah nyan u lua  
Ubak pande ka neusasat  
Peugah leugat peue nyang suka

Wahe dalem kheun beuteupat  
Peue nyang hajat napsu gata  
Teuma pande seuot leugat  
Ban nyang teupat jimeuhaba

Nyoel ion marit ube seunang  
Hana wayang bukon seunda

Ureueng binoe nyang sok subang  
Tabri rijang keu noe taba

Dilee takheun jeuet barangkri  
Takheun tabri ban lon pinta  
Nyoe pat kutem meuhan tabri  
Malam hari nyan lon hawa

Meuhan tabri bek meuayang  
Han kupulang subang gata  
Utoh pande meunan peugah  
Gadoh ilah Leube Muda

Nyoe bit ka troh ban kheun ayah  
Hana ubah that sibeuna  
Meunan leumah dalam ate  
Hana lahe nyan u lua

Ban lon kheun nyan han keunong le  
Gadoh pike Rakna Bangta  
Adat riyeue nyan lapan ploh  
Kheun po t toh bek meuseunda

Peue nyang neukheun han le reumbang  
Teutap subang bak pandenya  
Han jipulang hana lagee  
Upah dilee putoh hana

Teuduek 'oh nan kaman dilee  
Tadeungo kee wahe cut ma  
Haba subang teutap dilee  
Lon peuteuntee laen pula

Timoh di leuen bak sitahon  
Lam keubon timoh bak jeumpa  
Amma bakdu teungku ampon  
Putroe Lason lon calitra

Nyoe lon teuoh bak asai phon  
Keu Cut Lason adek Bangta  
Bak malam nyan Putroe Lason  
Sang geuayon teungeut indra

Eh ngon judo puteh sabon  
Yoh woe aduen Rakna Bangta  
Uroe beungoh jaga ampon  
Ngon Cut Lason nyang jroh rupa

Jaga dilee Putroe Lason  
Laju neutren jak srah muka  
Lheueh srah muka putik sukcon  
Neuek langsung lom u tangga

'Oh sare troh u seuramoe  
Po sambinoe pucat muka  
Sabab bayeuen ka hana le  
Teuma ile ngon ie mata

Yoh nyan neumoe bungong pade  
Sosah ate hana tara  
Allah Tuhan Rabbon Kade  
Sabe-sabe di lon bala

'Oh woe dalem geupoh mate  
Bayeuen han le deungon cintra  
Putroe neumoe sangat sosah  
Bangta Silah tanyong sigra

Wahe nyak cut pakon gundah  
Lon eu limpah ngon ie mata  
Pakon tamoe he meuh mirah  
Cut indah soe carot gata

Putroe Lason seuot pantah  
Allah Allah po meukuta  
Bayeuen dalem ka hana le  
Sosah ate lon han tara

'Oh woe dalem geupoh mate  
Jinoe pakri toh bicara  
Sabab bayeuen ka jicuri  
Abeh jime deungon cintra

'Oh woe dalem saleh pakri  
He suami tanglong donya

Meunan narit putroe indah  
Teuhah babah Bangta muda

Teuma neukheun Bangta Silah  
Cut meutuah toh bicara  
Yoh nyan seuot Putroe Lason  
Neudeungo lon po meukuta

Na neudeungo teungku ampon  
Beutroh meuthon neuyue mita  
Meunan narit putroe indah  
Bangta Silah jaweueb sigra

Sabet meunan cut meutuah  
Ban tapeugah uleh gata  
Han lon harap aneuk nanggroe  
Bah lon keudroe lon jak mita

Meunan neukheun Bangta Silah  
Rakyat neukrah peh nukara  
Yue palee gong rakyat neukrah  
Dum barollah laju teuka

Lom neuyue tet beude nubat  
Nyan alamat raja raja  
'Oh ban meutum meuriam nubat  
Teuka rakyat ban ie raya

Ubak mideuen ka meusapat  
Jaroe angkat di jeumala  
Nyang peutua tanyong leugat  
Peue na hajat po meukuta

Deelat ampom po junjongan  
Keupeue laman neuseuranta  
Kamoe ka troh sikalian  
Ho surohan po meukuta

Teuma seuot Bangta Silah  
Ngo lon peugah ubak gata  
He petua tango lon kheun  
Gadoh bayeuen Rakna Bangta

Gaseh sayang gata bandum  
Jinoe bayeuen tajak mita  
Tajak seutot ho jibaplueng  
Boh lam uteuen got lam rimba

Kadang-kadang ek meuteumeung  
Geutanyoe bandum jak meumita  
Tajak mita bandum sare  
Ladom u gle dalam rimba

Beutroh u Kleng Samakandi  
Jeuep-jeuep neugri tajak mita  
Tajak seutot jeuep-jeuep nanggroe  
Baranggasoe cut ngon raya

Kon meugata dum sinaroe  
Ulonteu nyoe sama juga  
Meuhan meuteumeung han ulon woe  
Hareuem nanggroe han le raja

Bangta Silah meunan neukheun  
Sosah bandum nyang peutua  
Nyang jeuet sosah tango lon kheun  
Meutan bayeuen gadoh raja

Leumah pike teuma nyang jroh  
Jinoe beudoh jak meumita  
Taeu jijak Tunong Baroh  
Ladom ka troh dalam rimba

Nyang rot Baroh wahe akhi  
Taloe pasi geujak mita  
Nyang rot Tunong wahe aduen  
Dalam uteuen meuraba-raba

Nyang rot Timu wahe adoe  
Ujung nanggroe dalam rimba  
Nyang rot Barat troh u Meuse  
Geujak sabé jak meumita

Padum mate naga pajoh  
Allah hai beh rimueng seuba

Han ek peugah ureueng mate  
Rabbon Kade thee sibeuna

Teuma ladom jikheun meunoe  
Tadeungo nyoe wahe apa  
Bah tamita dalam nanggroe  
Aduen adoe bek lam rimba

Pane sinoe dalam uteuen  
Nyan sa rimueng badeuek naga  
Nyang bayeuen nyan ka jipeubloe  
Di nanggroe jitueng hareuga

Meunan pike ulon sidroe  
Bayeuen nyoe pancuri nyang ba  
Meunan geukheun ureueng sidroe  
Bansinaroe sama juga

Jimeukheun-kheun bit nyo meunan  
Geuwoe yoh nyan teuma sigra  
Abeh bandum teuma geuwoe  
Dalam nanggroe geujak mita

Taeu geujak jeuep-jeuep gampong  
Jeuep-jeuep jurong pageue buga  
Soe meurumpok ka geutanyong  
Agam inong geupareksa

Dum jiseuot wahe teungku  
Hana lon eu bukon seunda  
Jeuep-jeuep gampong meunan jikheun  
Han tom bayeuen jieu rupa

Abeh geujak jeuep-jeuep peukan  
Maseng kawan jak meumita  
Bangta Silah saboh kawan  
Jeuep-jeuep peukan geupeuteuka

Tan meuteumee wahe adoe  
Jeuep-jeuep nanggroe meuraba-raba  
Bangta Silah teuduek 'oh noe  
Laen jinoe lon calitra

Datok Meuntroe saboh kawan  
Dua sajan Tok Panglima  
Deungon rakyatpi le sajan  
Bandum teelan jak meumita

Hingga troh bak saboh peukan  
Bak gampong nyan Siti Uba  
Geupareksa dalam peukan  
Soe na tuan kalon rupa

Cicem bayeuen saboh hilang  
Ban saboh nyan meujak mita  
Hana soe eu dalam peukan  
Wahe teelan geukheun hana

Beudoh sinan jak lam gampong  
Jeuep-jeuep jurong tamong lanja  
Tamong rot noe teubiet rot deh  
Geukheun meuceh kawan raja

Jeuep-jeuep jurong tamong abeh  
Troh jurong jeh Siti Uba  
Siti Uba bak peungadeuen  
Jingeuk u leuen jieu rupa

Ngong ureueng jak dalam jurieng  
Ngieng ureueng jak dalam jurong  
Jangak ken deh jangak keu noe  
Tanyong meunoe peue ngieng gata  
Peue nyan taeu tangieng keu noe  
Di kamoe kon judo gata  
Gata bukon di lon lakoe  
Peue buet keu noe he ceulaka

Meunan jikheun dara pindoe  
Bak sinaroe ureueng nyan na  
Jieu ureueng meureutoh-reutoh  
Marit utoh Siti Uba

Yoh nyan Siti marit sunggoh  
He dalem beh peue tamita

Lon ngieng gata mata soseue  
Sang-sang taeu Siti Uba

Cuba takheun jinoe laju  
Peugah teungku peue jak mita  
Siti Uba meunan tanyong  
Jaweurb keunong Tok Panglima

Wahe adek peue tatanyong  
Lon ngieng inong nyang bahgia  
Nyang peureumai rupa cantek  
Jitem adek peugah haba

Nyang na rancak deungon lisek  
Inong bayek lon jak mita  
Panglima kheun he adoe jroh  
Bayeuen gadoh lon jak mita

Bayeuen raja dilee gadoh  
He po cut jroh bayek rupa  
Soe nyang na eu jitem pegah  
Bit meutuah jih bahgia

Sabab raja sangat sosah  
Soe nyang peugah jeuet keu nisa  
Adat agam neubri upah  
Nyang inong sah keu judonya

Meunan neukheun raja peugah  
He meutuah lon ngo haba  
Meunyo jitem peugah bayeuen  
Meunan neukheun poteu raja

Meunan neukheun po junjongan  
He budiman nyang jroh rupa  
Lem Panglima geukheun meunan  
Le amilan ngon bicara

Lon kheun meunan he meutuah  
Kon berakah pura-pura  
Kadang-kadang jitem peugah  
Meunan ilah Lem Panglima

Siti Uba mikhem sabe  
Dalam ate ka meuhad na  
Panglima ngieng teukhem Siti  
Geupeurab le keu nan sigra

Sabab neueu jikhem sabe  
Neukheun mise di nap mata  
Panglima kheun saboh panton  
Akhe ngon phon sangat gura

Aneuk beuraghoe sangat indah  
Rupa cidah lon eu rupa  
Nyang lon kheun nyoe nyak meutuah  
Saleh nyo sah judo raja

Sang-sang gata nyak sambinoe  
Raja kamoe judo gata  
Bayeuen raja soe nyang peugah  
Nyan judo sah po meukuta

Sang-sang beujeuet bak malam nyoe  
Bayeuen jinoe soe tem nyata  
Meuntroe tanyong sabe-sabe  
Dalam ate sang meuhad na

Cuba peugah puteh licen  
Sep lam baten bek u lúa  
Meutapeugah kon peue laen  
Neumeukawen uleh raja

Meutapagah wahe nyak Ti  
Meuhad jadi judo raja  
Narit kawen geukheun sabe  
Ka teupike Siti Uba

Meunan teuboh dalam ate  
Hana lahe nyan u lua  
Ureueng binoe iman la'eh  
Di nap gaseh di likot ceula

Nyankeu inong iman kureueng  
Tango lon kheun he syeedara

Sabab napso inong jahe  
Keu suami han jikira

Guna lakoe han jipike  
Dara jahe tan seutia  
Ka teupike inong bajeueng  
Ka meubayeuken dalam dada

Meukupeugah that meuuntong  
Meuhad ulon judo raja  
Siti Uba teuma jikheun  
Nyang cok bayeuen Leube Muda

Leube Muda judo ulon  
Nyan baro phon lakoe hamba  
Bayeuen han le teungku ampon  
Geubri keu lon masa hawa

Nyankeu inong iman kureueng  
Ate kingkeueng dalam dada  
Siti Uba lheueh jipajoh  
Teuma ho roh jicalitra

Nyankeu inong nyang that paleh  
Iman la'eh dalam dada  
Di lakoe dumnan jigaseh  
Mita keujih talak hawa

Leube Muda peutroh napsu  
Inong badu jicalitra  
Han jingat meusigeutu  
Guna teungku Leube Muda

Jikheun bayeuen ka lheueh geusie  
Keu lon geubri masa hawa  
Ka lon pajoh bayeuen doli  
Jipeugah kri bak Panglima

Siti Uba meunan jikheun  
Teukhem ureueng dum sineuna  
Keu lakoe droe sabab jikheun  
Nyankeu ureueng teukhem raya

Seunang ate poh beurakah  
Hana payah le jak mita  
Meunan bandum jiseumeugah  
Han le payah tuha muda

Seunang ate dum kafilah  
Khem meuhah-hah tango subra  
Lem Panglima lon teumanyoeng  
He nyak bungong soe nan gata

Siti Uba jawueub keunong  
Peue neutanyong dalem raja  
Nama ulon na neuturi  
Nan geurasi Siti Uba

Meunyo meunan nyak puteh di  
Suami soe geuheu nama  
Siti Uba seuot meunoe  
Lakoe kamoe Leube Muda

Nyang uroe nyoe goh lom geuwoe  
Geujak baroe goh meugisa  
Teungoh marit ureueng binoe  
Ka troh geuwoe Leube Muda

Hankeu na ek pulang subang  
Deungo abang lon calitra  
Uleh pande han jipulang  
Beungeh han ban geuwoe lanja

Hana jan troh gaki rinyeun  
Ka jikheunle Siti Uba  
Ka jipeugah mameung-mameung  
Jeh lakoe lon ka troh gisa

Jeh kon gop nyan ka troh geuwoe  
Di nap lakoe jipeuhaba  
Meuntroe kalon ka troh geuwoe  
Jimat taloe jidrop Muda

Boh bak gaki rante beusoe  
Bak jaroe rante teumaga

Jihue laju teungku ampon  
Ka neutanyong peue kareuna

Peuekeu sabab neudrop ulon  
Cuba neukheun peue kareuna  
Hana sapeue Panglima kheun  
Tacok bayeuen Rakna Bangta

Bangta tanyong soe na peugah  
Kheun beupantah lon ngo haba  
Bandum ureueng meunan peugah  
Jeuep-jeuep babah jibeurkata

Nyoe nyang ka troh ban kheun ayah  
Nyang neupeugah dilee masa  
Bek rahsia kheun bak inong  
Hana keunong rugoe teuka

Jinoe ka troh wahe bungong  
Buet inong teuhah rahsia  
Meunan leumah dalam ate  
Hana lahe nyan u lua

Rakna Bangta dalam rante  
Bungong pade laju jiba  
Han jituripi meusidroe  
Han jitusoe aneuk raja

Jikheun pakon kaboh taloe  
Sayang han soe Leube Muda  
Di ureueng bandum jimoe  
Jipeutoe bak Siti Uba

'Oh troh keu nan tanyong meunoe  
Pakon lakoe di kah dara  
Jiseuot le meunoe jikheun  
Geucok bayeuen areuta raja

Ureueng laen tanyong mameung  
Teuma bayeuen jino ho ka  
Ho ka geuba bayeuen utoh  
Pat gujak troh Leube Muda

Jiseuot le he cutda beh  
Ka lon pajoh masa hawa  
Jitanyong le pakri meuthee  
Ureueng jamee baro teuka

Siti Uba jawueub teuntee  
Kukheun le kee bak Panglima  
Ureueng laen tanyong pantah  
Jeuet ka peugah peue na laba

Peue na laba geubri keu kah  
Nyang ka peugah he Ti Uba  
Siti Uba rumeh teukhem  
Nyang jeuet po lem lon Peuhaba

Jeuet lon peugah cutda canden  
Neumeukawen lon le raja  
Siti Uba meunan jikheun  
Teukhem ureueng that meubura

Teukhem ureueng agam inong  
Narit keunong Siti Uba  
Kadeungo kee dara jalang  
Geupeuayang han kakira

Peue kapeugah mate geucang  
Peujayeh nan Lason muda  
Putroe Lason rupa indah  
Lagi meugah aneuk raja

Geutem boh nyan geumita kah  
Peue kapeugah nyang kon haba  
Meusalang droe muntah darah  
Katem peugah he ceulaka

Bandum ureueng meunan peugah  
Ka jimarах Siti Uba  
Bit that paleh aneuk jalang  
Hana sayang Leube Muda

Teuduek siat aneuk jalang  
Lon karangan aneuk raja

Rakna Bangta geuba laju  
Trok teungku bak ureueng kaya

Ka trok ureueng kaya baro  
Jitajo bak Leube Muda  
Jikheun Laju le jilakee  
Toh ringget kee ho ka taba

Sabab gata mate teuntee  
Pulang dilee ringget hamba  
Peue na beunda bri keu kamoe  
Takheun jinoe he syeedara

Leube Muda jaweueb meunoe  
Tajak jinoe bak Nyak Uba  
Di ureueng ba jipeusabet  
Pane ringget jih lam singkla

Ka hana le di gata ringget  
Kadang cit bit mate fana  
Kaya baro lom jjawueub  
Lon jak tuntut bak Nyak Uba

Leube Muda teuma seuot  
Meunan patot jakleh gisa  
Teuma geuwoe di ureueng nyan  
Karangan ho laen pula

Ureueng meubuni hana keu nan  
Sayang gop nyan Leube Muda  
Ureueng laen jitanyong kri  
Bak meubuni ureueng kaya

Lon ngo teungku na peuutang  
Tajak rijang teungoh geuba  
Pakon hana tapeureugi  
Tasudi bak Leube Muda

Teuma seuot di ureueng nyan  
Malee laman hana tara  
Soe le ringget deungon nyawong  
Kheun beukeunong uleh gata

Nyankeu ureueng nyang meubuni  
Hana jibri jeuheut nama  
Beuthat beule neupeuutang  
Gaseh sayang dalam dada

Rakna Bangta ka teupike  
Dalam ate tan u lúa  
Nyoe nyang ka troh ban kheun abi  
Meubacutpi tan meutuka

Nyang meubuni hana geujak  
Nyan mustahak kheun ayahda  
Dalam ate hana meugrak  
Dum neucubak wasiet bapa

Rakna Bangta geuba rijang  
Hana sayang aneuk raja  
Laju geuba rot dalam blang  
Bangta Sawang keu nan teuka

Bangta Sawang neujak leugat  
Peudeueng neumat dua deupa  
Taeu peudeueng jroh meulap-lap  
Neupeurab bak Leube Muda

Nyang meubuni meunan geukheun  
Han meudiyeung keu nan teuka  
Han jijak ingat keu untong  
Sret meugulong ngon ie mata

Leube Muda jihue leugat  
Sayangteu that aneuk raja  
Taeu jihue ngon jitulak  
Jirinthak jihila-hila

Bangta Sawang ngieng jirinthak  
Pakon cabak bandum gata  
Sayangneu that hana sakri  
Neuplueng lari na ban guda

'Oh troh keu nan wahe akhi  
Neutanyong le peue kareuna

Pakon gop nyoe peue na salah  
Cuba peugah peue na deesya

Ureueng laen seuot pantah  
Ngo lon peugah ubak gata  
Nyoe tadeungo jinoe lon kheun  
Geucok bayeuen areuta raja

Nyang bayeuen nyan he teungku cut  
Ka dalam pruet Siti Uba  
Jicok bayeuen raja nanggroe  
Judo Putroe Lason muda

Nyankeu salah gop nyoe sidroe  
Meuboh taloe teuma sigra  
Han jituri Bangta Silah  
Ureueng meugah aneuk raja

Bandum ureueng meunan peugah  
Beungeh leupah Sawang Bangta  
Meunyo meunan nyan tapeugah  
Bangta Silah jinoe ho ka

Poteu raja hana keu noe  
Laen nanggroe neujak mita  
Ka meuseupreuek saboh saho  
Rakyat meujo-jo jak meumita

Ladom keu deh ladom keu noe  
Ureueng nanggroe jak lam rimba  
Bangta Silah raja kamoe  
Hana keu noe sajan hamba

Meunan jikheun dum sinaroe  
Jihue jinoe Leube Muda  
Lem Kumiran teuduek sikrak  
Hana geujak ubak Bangta

Sabab babah leupah rancak  
Han geujeuet jak tan kreh bak pha  
Rakna Bangta jiba tajam  
Hana macam jihue hila

Teuma marit Bangta Sawang  
Neukheun rijang bak ureueng ba  
Adat tapeulheueh bek tapeuwoe  
Takheun meunoe bandum gata

Tapeugah hana meuteumeung  
Meunan takheun ubak raja  
Meunan takheun bak raja nanggroe  
Peulheueh jinoe uleh gata

Han tapateh ingat keudroe  
Kuseudoe bek jan kahei ma  
Jiseuot le teuma meunoe  
Tapoh kamoe adoe raja

Bahle ulon jinoe mate  
Han kuwoe le nyan u tangga  
Meunan jikheun bandum sare  
Neubasa le Leube Muda

Neubasa bak Bangta Sawang  
Bek tasagang bahle jiba  
Ngon isyarat wahe teelan  
Bangta Sawang tupeue basa

Leube Muda jiba rijang  
Bangta Sawangpi sireuta  
Limong ureo jiba sunggoh  
Hingga ka troh ubak raja

'Oh troh keu nan ubak mideuen  
Teuma jikheun meunoe haba  
Teuma marit sidroe ureueng  
Lam mideuen meuligoe raja

Beuet jaroe buju siplo  
Marit utoh nyang peutua  
Ho ka saleh cut ma ubon  
Po Cut Lason ho saleh ka

Saleh hana di meuligoe  
Po cut putroe tanglong donya

Kamoe bandum ka troh meuwoe  
Neutren keu noe po cut raja

Poteu raja goh lom neuwoe  
Tan ngon kamoe bak meupinta  
Neutren rijang laju keu noe  
Cut sambinoe judo raja

Bek le neuduek di meuligoe  
Hek that kamo hana tara  
Putroe Lason seuot laju  
Na lon teungku di istana

Panglima kheun teuma laju  
Ho tuanku raja muda  
Seuot putroe nyang juhari  
Goh keumbali po meukuta

Wahe po cut Putroe Siti  
Nyoe pancuri dalam singkla  
Nyakeu po cut nyang cok bayeuen  
Meunan geukheun le Panglima

Nyang jeuet po cut kamoe teumeung  
Peugah bak lon Siti Uba  
Nyankeu judo po pancuri  
Nan geurasni Siti Uba

Jih nyang peugah bunoe bak lon  
Cut ma ubon jih peuhaba  
Siti Uba nyankeu judo  
He po cut e jih ceulaka

Ban putroe ngo meunan laku  
Neutren laju di istana  
'Oh ban neueu le Cut Lason  
Sang-sang aduen Rakna Bangta

Sang-sang ka nyo sang-sang nyum kon  
'Oh neukalon surot lanja  
Putroe Lason neukheun meunoe  
Tango kamoe he Panglima

Ka neutanyong uleh putroe  
Raja nanggroe hana gisa  
Tajak seutot laju jinoe  
Bek trep neuwoe tapeuhaba

Takheun bayeuen ka meuteumeung  
Meunan takheun bak meukuta  
Panglima ngo narit meunan  
Beudoh yoh nyan pantah sigra

Limong uroe sabe geujak  
Ka meurumpak deungan raja  
Ban meuteumeung ka geudeelat  
Geukheun teupat meunoe haba

Si pancuri ka lam ikat  
Ampon deelat neujak gisa  
Lem Panglima nyang seumeugah  
Bangta Silah lom pareksa

He Panglima tango kamoe  
Na tapeuwoe bayeuen rimba  
Allah Allah tuanku beh  
Ka jipajoh po meukuta

Ka lheueh jisie ka jipajoh  
Aneuk biyoh talak hawa  
Ban neudeungo haba meunan  
Beungeh na ban uleue bisa

Bangta Silah beungehneu that  
Neuwoe leugat neupet mata  
Dua uroe neujak sunggoh  
Hingga troh u leuen istana

'Oh troh keu nan han peue sudi  
Bak pancuri neujak lanja  
'Oh rab keu nan wahe akhi  
Pancuri sang-sang teumuda

Bangta Silah ka neusurot  
U likot jarak nam deupa

Neuek laju u meuligoe  
Bak cut putroe neupareksa

Wahe judo cut sambinoe  
Tango kamoe po jroh rupa  
Pane ureueng lam beureukah  
He cut indah sang teumuda

Meunan neukheun Bangta Silah  
Seuot pantah putroe muda  
He tuanku uleebalang  
Di lonpi sang nyo kakanda

Meunan neukheun putroe seudang  
Tahe mandang ureueng dua  
Puleh tahe hireuen dahsyah  
Pakri ilah toh bicara

Teuma marit Bangta Silah  
He meuh mirah pakri daya  
Yoh nyan seuot tuan putroe  
Deungo kamoe po meukuta

Bak Panglima neuhareutoe  
U yup seuramoe neuyue singkla  
'Oh tan ureueng le meusidroe  
Ulon poh droe pura-pura

Keutam-keutum lon antok droe  
Neueu lon moe po meukuta  
Bek neukhem-khem he junjongan  
Neungiang mantong buettan hamba

Putroe Lason peugah meunan  
Neuyue yoh nyan bak Panglima  
He Panglima deungo kamoe  
Yup seuramoe keu deh taba

Ikat sinan yup seuramoe  
Beudoh tawoe bandum gata  
Bahle sinan siat jinoe  
Singoh uroe tapareksa

Panglima ba laju jinoe  
Yup seuramoe ka jisingkla  
Teuma geuwoe sikalian  
Teutap sinan Leube Muda

Hingga uroepi ka malam  
Lon peugah ban putroe muda  
Jingieng ureueng sidroe han le  
Bungong pade le bicara

Jiduek teuntang ureueng meurante  
Ka jimoe le putroe muda  
Jih di rumoh Bangta di yup  
Putroe cut le that bicara

Beukit nyang kon malee han jeuet  
Meunan po cut bak neukira  
He dalem cut bungong uroe  
Pakon meunoe he kakanda

Tatipee lon ka dua go  
He dalem po dalem raja  
Dilee sigo masa Jameun  
Peuleueh bayeuen dalam cintra

Rab neumeutak adoe aduen  
Parui geukheun ngon teumuda  
Sosah kamoe he dalem e  
Bungong kundo dalem raja

Pakon meunan neupeulagee  
Lon neutipee hana reuda  
Bak sangka lon ka meusampe  
'Oh lheueh mate ayah bunda

Meuna gata uleebalang  
Tapeutimang lon syeedara  
Nyoe di gata lon tabeunci  
'Ayeb keuji ka lon rasa

Meunan jikheun Putroe Siti  
Wahe doli dalem raja

Ka jipho droe sabe-sabe  
Ka teupike Rakna Bangta

'Oh teuingat dalam ate  
Jinoe pakri lon bicara  
'Oh jituri euntreuk kamoe  
Malee Putroe Lason muda

Di putroe tan teudoh neumoe  
Jipoh-poh droe hana reuda  
He kakanda aduen kamoe  
Pakon meunoe akai gata

Gadoh bayeuen lam meuligoe  
Roh lam taloe teuma gata  
Putroe jikheun meunoe meudeh  
Pihak areh putroe muda

Macam-macam jiboh reun teh  
Utoh abeh jimeurika  
Adat nyang kon han jeuet malee  
Hana jamee ureueng lingka

Meunyo aduen ka meusampe  
Hana peue le peugah haba  
Rakna Bangta neuseuot le  
He putroe Ti Lason muda

Bek tapoh droe wahe Nyang Ti  
Ulonteu ci narit bapa  
Ulon cuba wasiet ayah  
He meuh mirah bek le rugha

Meunan neukheun Bangta indah  
Peunoh limpah ngon ie mata  
Limong peukara lon ci sudah  
Bungong kipah bek le rugha

Meusigeutu hana ubah  
Ban kheun ayah han meutuka  
Saket mangat han lon turi  
Ka lheueh lon ci ka lon rasa

Meunan neukheun Bangta Kumari  
Bak Putroe Ti Lason muda  
Bak neusangka han jituri  
Uleh Siti adek Bangta

Han jitusoe bak neupike  
Dalam ate meunan kira  
Nyang jeuet teuma neupeugah kri  
Ka jituri bak neusangka

Hana neuthee keunong taki  
Lisek Siti nyang adekda  
Di putroe pura reuet-reuet ok  
Jiantok ulee jipura

Bangta deungo kawak-kawok  
Bungong tajok seuot sigra  
Ban neudeungo Bangta seuot  
Neutren po Cut Lason muda

Bangta Silah tren di likot  
Meukot deungon judonya  
'Oh troh keu nan han peue pike  
Neuploh rante laju sigra

Gaki jaroe buka rante  
Sireuta ile ngon ie mata  
Banta Silah angkat jaroe  
Ampon kamoe barang deesya

Banlhee ureueng yoh nyan geumoe  
Yup meuligoe hana reuda  
Lhee droe ureueng moe meuguncang  
Bangta Sawang keu nan teuka

Neueu ureueng moe that kiam  
Tanyong rijang peue kareuna  
Bangta Sawang tanyong meunoe  
Tuanku droe deungo hamba

Soe nan geuhei gop nyan sidroe  
Siri nanggroe asai mula

Di pat teumpat namaneu soe  
Neupeugah proe he meukuta

Bangta Silah seuot meunoe  
Dalem Putroe Lason muda  
Nyankeu aduen putroe indah  
Di ulon sah nyan teumuda

Meunan neukheun Bangta Silah  
Ile limpah ngon ie mata  
Bangta Sawang marit sikrak  
Neukheun ubak Rakna Bangta

He adek cut bungong meurak  
Pakon galak tameuseunda  
Pakon tuanku peungeut kamoe  
Neupeugot droe ureueng hina

Bak lon sangka dilee baroe  
Gata sidroe Leube Muda  
Rakna Bangta seuot pantah  
Lon ci ayah he kakanda

Ulonteu ci narit ayah  
Neupeugah limong peukara  
Nyang awai phon deungo lon kheun  
Yoh lheueh bayeuen dalam cintra

Teuma lheueh nyan wahe dalem  
Lon meukawen ngon Nyak Uba  
Siti Uba hawa bayeuen  
Nibak ulon jiyue mita

Ulonteu bri mirapati  
Dilee lawi saboh masa  
Bayeuen gata udep mantong  
Lon yue meusom bayeuen rimba

Teuntee udep mantong bayeuen  
He cut buleuen jinoe masa  
Na dua pat lon meuutang  
Lon meurakanpi na dua

Nibak pandepi na subang  
Han jipulang he adekda  
Abeh bandum Bangta peugah  
Narit ayah dilee mula

Bandum rugoe he meutuah  
Abeh sudah lon keurija  
Ka lheueh lon ci narit ayah  
Bandum teulah lon han tara

He Cut Lason adek badan  
Tango abang sikrak haba  
Nyoe kakanda Bangta Sawang  
Hi intan bek lupa-lupa

Bangta Silah Bangta Sawang  
Putroe intan Lason muda  
Lhee droe ureueng beuet jaroe  
Ampon kamoe ube nyang ka

Neupeumeuah dum sinaroe  
Salam kamoe po meukuta  
Rakna Bangta seuot meunoe  
Nibak kamoe hana deesya

Ampon bak Allah dan bak Nabi  
Bak lon akhi deesya hana  
Rakna Bangta lon hareutoe  
Ubak putroe nyang jroh rupa

Beutaturi Bangta Sawang  
Nyan cut abangteu nyang tuha  
Di donya kon troh akhirat  
Di lon meuhad nyan syeedara

Wahe adek Bangta Silah  
Di gata sah nyan teumuda  
Beugot adek nyan tapabah  
Aduente sah he syeedara

Meseue ulon meunan gop nyoe  
He adoe tapeumulia

Di lon gop nyan sang saboh du  
Saboh ibu meunan rupa

Bangta Silah deungo meunan  
Beudoh yoh nyan peumulia  
Hana bagoe muliaan  
Hana lawan galak suka

Sang ka udep teungku ayah  
Bangta Silah nyang adekda  
Meunan bangon ulon peugah  
Nyang meutuah Lason muda

Teuma geuk u meuligoe  
Banpeuet droe sajan sireuta  
Sapat sinan Bangta Silah  
That meutuah sisyedara

Geupeujamee Bangta Sawang  
Geubet idang raya-ray  
'Oh lheueh makeuen geubri salen  
Hana geusyen ureueng kaya

Bangta Sawang ka geusalen  
Haloh licen ija sutra  
Ngon kupiah nyang meutampok  
Lom geujok bajee meudokma

Padum ija puteh hijo  
Han jeuet taeu aneuk Bentara  
Teuma bungkoh boh ru mirah  
Han peue peugah meuh geuteumpa

Le that geubri macam-macam  
Wahe teelan yum meubara  
Bahle dumnan buet seumalen  
Ulee puseng bak meurika

Ulon peugah le ho laen  
Bek jeuet gigeng ureueng baca  
Hingga teuma lheueh nibak nyan  
Ureueng sinan dum ka teuka

Ureueng nanggroe dum troh keu nan  
Jijak yoh nyan ubak Bangta  
Jak hai ampon bak Kumari  
Dum barangri ureueng donya

Deesya bak drop dawa bayeuen  
Meunan geukheun lam calitra  
Nyang geurante dilee ureueng  
Nyankeu aduen Lason muda

Meunan meugah dum sibarang  
Uleebalang aneuk raja  
Wahe teungku dum sibarang  
Wahe abang deungo hamba

Meugah aneuk Tajul Baki  
Dalem Siti Lason muda  
Nyankeu nama Bangta Kumari  
Nama lagi Rakna Bangta

Nyang pancuri dalam taloe  
Aduen putroe nyang jroh rupa  
Abeh meugah jeuep-jeuep nanggroe  
Jeuoh ngon toe meuthee sigea

Meugah jeuoh jeuep-jeuep sagoe  
Sibarang proe meunan juga  
Meunan-meunan wahe teungku  
Meusyeuhu ban saboh donya

Ubak wadi deungan meuntroe  
Sibarang nyoe ureueng donya  
Abeh geujak dum sinaroe  
Meuteumeung nyoe deungan raja

'Oh troh keu nan geubet jaroe  
Lakee jinoe meuah deesya  
Panglima kheun deungan meuntroe  
Ampon kamoe po meukuta

Han lon turi han lon tusoe  
Bandum kamoe salah sangka

Rakna Bangta seuot meunoe  
Nibak kamoe hana deesya  
Bandum gata hana salah  
Kheundak Allah atueh hamba  
Meunan neukheun Bangta indah  
Rakyat Pantah woe u tangga

Rakna Bangta dum jipujoe  
Baranggasoe tuha muda  
Jikheun Bangta ureueng saleh  
Kureueng leubeh han neukira

Meunan jikheun jeuep-jeuep babah  
Troph meugah bak Siti Uba  
'Oh ban jithee di jih lakoe  
Aduen Putroe Lason muda

Rakna Bangta meugah han soe  
Teulah jinoe dara sula  
Hana meukon kujak peugah  
Paleh babah kee ceulaka

Adat meukon kujak peugah  
Ulon meugah raya nama  
Siti Uba ingat yoh meunan  
Teulah yoh nyan hana tara

Allah Allah Po lon Tuhan  
Ulon tuan tan bahgia  
Siti Uba teulah han soe  
Teuduek 'oh noe siat haba

Cit ka meunan tapaban roe  
Lon hareutoe Rakna Bangta  
Rakna Bangta meuwoe kisah  
Ka neupeugah bak syeedara

Bangta Sawang neuhei pantah  
Ka neupeugah meunoe haba  
He dalem cut Bangta Sawang  
He cut abang deungo hamba

Tadong sinoe beutroh sithon  
Sajan ulon bek neugisa  
Han troh sithon meunam buleuen  
Meunan neukheun Rakna Bangta

Bangta Sawang seuot pantah  
Insya Allah he adekda  
Ban kheun gata han lon ubah  
Ban tapeugah hana dawa

Rakna Bangta lon meuteuoh  
He dalem jroh deungo hamba  
Raya hajat lon cut abang  
Sabab utang he kakanda

Idin keu lon wahe abang  
Bayeue utang dilee mula  
Masa dilee lon meuutang  
Sikada ban he kakanda

Meunan neukheun po samlakoe  
Seuot Putroe Lason muda  
Adat neujak tuanku droe  
Bek trep neuwoe bak adekda

Han peue salah bungong geutoe  
Rijang lon woe keu noe gisa  
Abeh lawet siploh uroe  
Meubek na peue teuka mara

Keumah pakat deungan janji  
Bangta Kumari beudoh sigra  
Hana rakan po juhari  
Neupeureugi sidroe saja

'Oh meurumpok ureueng nanggroe  
Meumat jaroe deungan Bangta  
Ka jituri baranggasoe  
Jicom jaroe peumulia

Bangta neujak limong uroe  
Troph sampoe bak Siti Uba

Ban sare troh keu nan u leuen  
Leumah bayeuen neueu rupa

Jiwoe di gle cicem bayeuen  
Teuma neukheun uleh Bangta  
Katreu keu noe he ulon droe  
Ka troh kamoe jak tueng gata

'Oh ban jitren neukheun meunoe  
Keu deh kawoe ubak raja  
Nyang keu noe bek kawoe le  
Ulon tan le bak Nyak Uba

Bayeuen seuot insya Allah  
Ban nyang titah bak meukuta  
Singoh beungoh puteh uroe  
Keu deh lon woe ubak raja

Meunan jikheun bayeuen ragoe  
Bandua droe han le haba  
Hingga malam le ngon uroe  
Neukek jinoe le u tangga

Rakna Bangta ek meuteuntee  
Dalam juree Siti Uba  
Ban jikalon woe pangulee  
Hana lagee ate suka

Bakjisangka cit meusampe  
Meunan pike Siti Uba  
Ban sare troh wahe Nyak Ti  
Bak gaki jiseumbah Bangta

Kitaguen bu pantah rijang  
Eungkot reundang macam rupa  
Dalam dalong jiboh rijang  
Got jiidang hana nyang sa

Rakna Bangta seungap diam  
Hana kalam sapeue haba  
'Oh lheueh makeuen po samlakoe  
Neueh keudroe Bangta muda

Siti Uba ka jipeutoe  
Sajan lakoe eh beursama  
Rakna Bangta keh-keh kude  
Puleh ate bak jisangka

Jigaro-garo lon jiceupet  
Dara sulet le bicara  
Jisangka puleh ate saket  
Jiceupet taeu tan reuda

Lom jiceupet ngon jiurot  
Panyot jitot jimeujaga  
Sit Uba khadam lakoe  
Le that bagoe jipeurupa

Rakna Bangta cit neuiem droe  
Hana sapeue na suara  
Baranggadum jipeulaku  
Bak teungku han le meuguna

Han ek puleh ate tunu  
Han ek sibu ate luka  
Han ek peugah wahe adoe  
Jisiboe le Si Nyak Uba

Hingga beungoh uroe siang  
Bangta seudang beudoh sigra  
Rakna Bangta neutren rijang  
Bayeue utang dilee mula

Neujak laju Bangua Kumari  
Bak meubuni ureueng kaya  
'Oh troh keu nan han peue pike  
Jiseumbah le raja muda

Ka jithee aneuk sulotan  
Galak han ban ureueng donya  
Jipeuindah Bangta seudang  
Jroh hana ban peumulia

Rakna Bangta bayeue utang  
Marit rijang ureueng kaya  
Nyang meubuni jikheun yoh nyan  
Bek junjongan neubri laba

Ube pangkai mantong pulang  
Idin laman po meukuta  
Rakna Bangta seuot pantah  
Han jeuet ubah janji nyang ka

Tiep-tiep janji han jeuet ubah  
Nibak Allah han neurela  
Bek meudawa he teungku droe  
Lon bri jinoe ban sikada

Ureueng kaya seuot meunoe  
Deungo kamoe po meukuta  
Meunyo meunan tuanku beh  
Lam sireutoh lapan siwa

Ube jiplueng jinoe neuboh  
Bak lon sunggoh ate suka  
Teuma neubri ban jipeugah  
Utang ka glah aneuk raja

Neucré sinan Bangta indah  
Neulangkah bak baro kaya  
'Oh troh keu nan neujak sampie  
Neukheun meunoe Rakna Bangta

Ringget gata na bak kamoe  
Padum jinoe lon bri siwa  
Jiseuot le tuanku beh  
Jinoe neuboh janji nyang ka

Padum jiplueng lam sireutoh  
Tuanku beh neubri lanja  
Ban nyang janji yoh saboh roe  
Neubri jinoe bek meudawa

Bayeue laju dum nyang jikheun  
Raja jameun seunang raya

Neucré sinan lom beurjalan  
Lem Kumiran neujak mita

Meugah ka troh Bangta keu nan  
Lem Kumiran sosah raya  
Nyang jeuet sosah Lem Kumiran  
Malee han ban deungon Bangta

Jiplueng jarak sabab malee  
Bek meuteumee Bangta muda  
Kumiran plueng gaduh euntee  
Nyang jeuet malee leupah haba

Sabab narit sangat malee  
Masa dilee mula-mula  
Narit dilee yoh bri peudeueng  
Nyankeu ureueng beuhe raya

Sabab babah bulee basah  
Sabab lidah meusuara  
Abeh haba Lem Kumiran  
Abeh Kalam 'oh nan saja

Rakna Bangta leugat neujak  
Keu deh ubak pande teumpa  
Pande kalon Bangta seudang  
Yoh nyan rijang ka jisapa

Assalam 'alaikum deelat makam  
Bak lon tuan ka troh teuka  
Bangta seuot 'alaikum salam  
Trep that datang lon lam bahya

Jipeuindah jroh hana ban  
Bangta seudang aneuk raja  
Pande teumpa jikheun meunoe  
Tuanku droe ka troh teuka

Ka troh deelat neujak keu noe  
Na bak kamoe areuta raja  
Rakna Bangta seuot rijang  
Pasai subang pakri rupa

Teungku utoh jawueub laju  
Tuanku ban seunang gata  
He lem utoh meunoe napsu  
Tajak laju bak Nyak Uba

Teungku utoh geujak laju  
Ate kuyu hana tara  
Sira geujak ngieng u likot  
Nibak teuot ka jeuet geumpa

Sang ka deumam leungo atot  
That jitakot keu cut Bangta  
Nyum aruah ka hana le  
Utoh pande yo lagoina

Jipeujok droe ubak Rabbi  
Utoh pande sang ka fana  
Bandua droe geujak tajam  
Troh datang bak Siti Uba

'Oh troh keu nan Bangta seudang  
Neujok subang sigra-sigra  
Neuyue sok le rijang-rijang  
Ate girang si nyak dara

Siti Uba seunang ate  
Ka neubri subang meucintra  
Bak jisangka ka meusampe  
Hana le cre deungon Bangta

Nyang niet Bangta han jitu'oh  
Sang han ne'uboh si ceulaka  
Teuma marit po Bangta jroh  
Neuyue uroh geusyik peutua

Neuyue jak eu leugat jinoe  
Bandua droe troh le teuka  
Ka troh teungku na limong droe  
Neukheuh meunoe uleh Bangta

Wahe teungku banlimong droe  
Deungo kamoe sikrak haba  
Siti Uba judo kamoe  
Lon bri jinoe keu utoh teumpa

Jinoe lon bri jih keu utoh  
He teungku beh bukon seunda  
Sabab galak teungku utoh  
Ulon neutroh ban nyang hawa

Jinoe lon bri ban napsu droe  
Ureueng binoe Siti Uba  
Wahe teungku neupeunikah  
Hukom Allah nyang sibeuna

Siti Uba yoh nyan seuot  
Buet han patot po meukuta  
Han tom di gop tuanku droe  
Geubri binoe keu pandenya

Geujok inong nyan keu pande  
Bukon jahe po meukuta  
Siti Uba meunan jikheun  
Dumna ureueng deungo rata

Pakon deelat meunan macam  
Dalam alam di gop hana  
Pakri neujok asoe juree  
Hana malee po meukuta

Jimeututo sabab teulah  
Peunoh limpah ngon ie mata  
Ija bajee abeh basah  
Siulah ban ujeuen teuka

Hana teudoh ie mata ro  
Sayang judo aneuk raja  
Keumong mata jimoe bae  
Ie mata ro meulumba-lumba

Bukon paleh kee nyang suang  
Gadoh bintang lam istana

Bukon sayang ulon sidroe  
Ka roh lakoe pande teumpa

Dilee lakoe ureueng meugah  
Nyoel ka roh sah ureueng hina  
Sabab paleh di lon babah  
Hana tuah ngon bahgia

Adat meunan nyoe ka bulueng  
Han lon meutueng laen hana  
Asai ka na di lon lakoe  
Meubek sidroe eh lam tika

Cit ka dilee janji Tuhan  
Meuhad gop nyan lakoe hamba  
Ka lheueh kawen bandua droe  
Seungap 'oh noe Siti Uba

Rakna Bangta lon hareutoe  
Nyang samlakoe aneuk raja  
Lon kisah Bangta Kumari  
Neukeumbali woe u tangga

Abeh utang deungon janji  
Ureueng sufi saleh raya  
Keu deh laju woe u nanggroe  
Bak adoe Cut Lason muda

Ka meusapat nyan banlhee droe  
Putroe-putroe raja-raja  
Bangta Sawangpi di sinan  
Banpeuet droe nyanpi sireuta

Teuduek siat dilee 'oh nan  
Karangan laen lon mula  
Bahle jinoe balek ayat  
Kureueng mangat meunyo sa-sa

Bah lon tuka dilee siat  
Kadang mangat bak lon kira  
Bungong jeumpa sikarang lhee  
Nyang mangat bee bungong rihan

Amma bakdu wahe sampee  
Tadeungo kee bek le kiam  
Rakna Banta lon peuteuntee  
Bungong keumee nyang analan

Padum lawet duek di juree  
Meuteuntee ngon Bangta Sawang  
Bak siuroe Bangta indah  
Ka neupeugan bak cut abang

Sira duek-duek meubeurakah  
Neupeugah bak Bangta Sawang  
He dalem cut cahya mata  
Kakanda aduen lon tuan

Udeh jinoe tajak bungka  
Tajak mita pangkai jalan  
Tajak mita nyang jroh budoe  
Tadeungo nyoe dalem badan

Nyang seunang rot he dalen droe  
Bek jeuet dudoe keurugian  
Taduek sinoe hana guna  
Akhe teuma keusyugolan

Meunan narit Rakna Bangta  
Seuot sigra le cut abang  
He adek cut bungong jeumpa  
Ban nyang suka gata intan

Ulon ikot ban kheun gata  
Hana dawa bak lon tuan  
Bak lon adek hana pike  
Udep mate lon jak sajan

Ulon ikot beumeusampe  
Adat matepi lon paban  
Keumah pakat bandua droe  
Ubak putroe jak peugah ban

Bangta Silah judo putroe  
Jak hareutoe yoh nyan rijang

He adek cut Putroe Lason  
Tadeungo lon adek badan  
Banta Silah parui di lon  
He nyak Lason bungong karang  
Kamoe dua kheundak jak beuet  
Jak tuntut eleumee Tuhan  
Lon duek sinoe han sakon jeuet  
Bah lon jak beuet wahe intan  
Nyanpat nanggroe takeurajeuen  
Intan buleuen beujroh padan

Beugot dalem deungon mideuen  
Dumna ureueng keusukaan  
Ube lon kheun beutaikot  
He adek cut nyang budiman

Buet nyang beuna beutaikot  
Nyang karot bek gata sajan  
Bandua ngon Bangta Silah  
Ulon peugah bek palengan

Meunan haba Bangta peugah  
Putroe indah sajan sinan  
Neutanyong le tuan putroe  
Pajan neuwoe dalem badan

Rakna Bangta seuot meunoe  
Deungo kamoe wahe intan  
Siploh buleuen dua hari  
Lon keumbali keu noe rijang

Meubek mara Tuhan neubri  
Trok keumbali ulon tuan  
Meunan Bangta neupeugah kri  
Seungap cutti bungong rihan

Keumah pakat deungan janji  
Bangta Kumari neubeurjalan  
Me ngon beukai dalam jaroe  
Dua droe aneuk sulutan

Laju neujak singoh uroe  
Bandua droe muda seudang  
Sidroe rakan hana neuba  
Laju sigra neubeurjalan

Leupah Bangta neujak bungka  
Putroe muda jimoe yoh nyan  
Sireuta ngon jikheun meunoe  
Sira jimoe putroe seudang

Jimeusyae jimeunyanyoe  
Tango bunyoe miseue gam bang  
Bukon sayang bungong jeumpa  
Abeh mala sret u bumoe

He cut bang ka neujak bungka  
Pajan masa neuwoe keu noe  
Pajan masa neukeumbali  
Saweue Siti adekteu nyoe

Jipot angen leungo 'arasy  
Lam Baitullah laen nanggroe  
Meutan Gata ulon sosah  
Pakrikeu bah ulonteu nyoe

Jipot angen got meuguncang  
Reuloh subang si nyak putroe  
He dalem cut bukoh alang  
Neuwoe rijang saweue adoe

Sepkeu dumnan haba bae  
Han ek that le ulon padan  
Bangta dua neujak laju  
Bungong meulu neubeurjalan

Got meuikot neujak dua  
Aneuk raja nyang budiman  
Bangta neujak geunap uroe  
Hingga sampoe wahe teelan

Troh le ubak saboh nanggroe  
Samlakoe dua beurialan

Peukan rame hana tara  
Biwan Lawa geurasi nan

Bangta neujak keu nan lanja  
Deyah raya neueu sinan  
'Oh troh keu nan neungieng deyah  
Jroh that indah hana lawan

Neutamong le keu nan pantah  
Hingga leupah u dalam nyan  
Ngon ureueng beuet rame raya  
Bangta muda tahe mandang

Neungieng keu nan ladat mata  
Bandua ate sukaan  
Dalam ate ka teusawo  
Saleh teungku nyoe Beurahman

Ngon ureueng beuet tuha muda  
Teungoh aja beuet Quruan  
Bangta dua teuma tamong  
That bit keunong neueu macam

'Oh troh keu nan di leuen teudong  
Sang jeuneulong dua sajan  
Han soe turi aneuk raja  
Bandua teudong di sinan

Bandua droe teudong di leuen  
Neungieng hireuen keu noe keu nan  
Aneuk miet ngieng meunoe jikheun  
Pane buleuen that analan

Han tom taeu meunan rupa  
Lam syeuruga nyang na meunan  
Saleh aneuk raja raja  
Aneuk bentara khuluk wadan

Hana ureueng meunan rupa  
Keu noe teuka bak Beurahman  
'Oh lheueh jieu di jih rupa  
Bak peundita jipeugah ban

Wahe teungku guree hamba  
Ureueng teuka that analan  
Jehpat di leuen bungong jeumpa  
Hana nyang sa lon eu meunan

Ban neukalon uleh teungku  
Dum bintang hu kulet badan  
Kulet puteh sang keululu  
Marit teungku teuma yoh nyan

He aneuk cut po samlakoe  
Taek keu noe cahya intan  
Bek le tadong dalam uroe  
Samlakoe aneuk budiman

Bungong rubek taek laju  
Taek teungku aneuk bangsawan  
'Oh neudeungo narit teungku  
Neutren laju dalam kulang

Neusrah gaki neukek laju  
Seumbah teungku nyang Beurahman  
'Oh sare troh u seuramoe  
Beudoh jinoe teungku peundita

Meubri saleuen teuma jinoe  
Meumat jaroe silkalian  
Assalam'alaikum he aneuk droe  
Nateu keu noe cahya intan

Bangta seuot teuma laju  
Sapa teungku jroh hana ban  
'Alaikum salam wahe teungku  
Nyang meusyeuhu dalam alam

Bangta seumbah nibak teuot  
Teungku sambot deungon tangan  
Lheueh nyan teungku neujok bungkoh  
Duek piyoh muda bangsawan

Pajoh ranup baro bicah  
Tanyong pantah le Beurahman

He aneuk cut nyang meutuah  
Hubu langkah aneuk badan

Peugah laju ubak kamoe  
He aneuk droe cahya intan  
Peue na napsu bungong uroe  
Peugah jinoe ho beurjalan

Bangta muda laju jawueub  
Lon meung jak beuet hajat meunan  
Tulong Allah Tuhan Makbud  
Nyan meukeusud ulon tuan

Meunan neukheun po Bangta cut  
Teungku jawueub teuma nyoeban  
Meunyo aneuk keumeung jak beuet  
Bak lonpi jeuet he buleuen trang

Tadong sinoe buleuen peunoh  
Seungoh beungoh lon ajaran  
Ulon tanyong puteh leusoh  
He aneuk beh peugah beutrang

Soe nan gata aneuk teungku  
Peugah laju bak lon tuan  
Soe nan ayah deungon ibu  
Pat he teungku gampong laman

Peue nan nanggroe bungong meulu  
Peugah laju aneuk beutrang  
Seuot Bangta nyang samlakoe  
Di lon nanggroe Dusan Yaman

Bangta Sawang dalem kamoe  
Meujak keu noe dua sajan  
Nama ulon Rakna Bangta  
Ayah bunda geurasi nan

Sideh teumpat jeuoh raya  
Teumpat hamba Duson Yaman  
Kamoe dua sang saboh ma  
He syekhuna lan peugah trang

Nama ulon ka neutusoe  
Teungku iem droe bek laheran  
Bek barangpat neuhareutoe  
Malee kamoe hana macam

Bek neupeugah he pangulee  
Bek jithee aneuk sulton  
Meujithee lon aneuk raja  
Malee hamba hana padan

Kon meurakan di lon hana  
Nyang keudua tan beukailan  
Meunan neukheun Bangta indah  
Seuot pantah le Beurahman

Hana patot ulon peugah  
He meuh mirah aneuk badan  
Meunan neukheun uleh teungku  
Bangta laju beuet di sinan

Sinan neubeuet bandua droe  
Samlakoe lisek hana ban  
Limong uroe saboh kitab  
Bangta 'ajab hana lawan

Makna kitab neufam abeh  
Peulareh utoh hana ban  
Ngon peungamai neutueng dudoe  
Hanco beusoe sinan sajan

Neuduek kayem dalam khaluet  
Sinan neubeuet cut bangsawan  
Ayat tujohpi that ragoe  
Afa jinoe sikalian

Isem alam afa abeh  
Cut puteh sangat bijakan  
Sinan neubeuet bintang timu  
Lom deungan su mangat han ban

Teutap sinan neubeuet laju  
Aneuk teungku nyang budiman

Dumna kitab afai laju  
Saraf nahu abeh beufam

Eleumee nu jumpi neutukri  
Taki-maki lam peuprangan  
Dua Bangta sangat ahli  
Bangta Kumari Bangta Sawang

Teutap sinan puteh licen  
Got that malem dua gop nyan  
Ulon kisah jinoe laen  
He po lem neudeungo beutrang

Bungong rom ngon bungong jeumpa  
Abeh mala lam keunarang  
Padum lawet sinan Bangta  
Trok geureuda lam nanggroe nyan

Mita umpeuen dalam laot  
Watee seupot baranggajan  
Manusia han jipajoh  
He teungku beh bak masa nyan

Jijak mita yee ngon paroe  
Nyan jiseudoe wahe teelan  
Padum lawet meunan teutap  
Deungo sahbat lon peugah ban

Bak siuroe pawang pukat  
Eungkot le that han tom meunan  
Dalam euntung eungkot peunoh  
Geupeuteungoh u pasi nyan

Teuma jingieng le geureuda  
Kajisama laju keu nan  
Jicok eungkot wahe adoe  
Bansinaroe abeh simpan

Pukat-pukat abeh sampoe  
Binatang nyoe jipeureulan  
Peue binatang raya leupah  
Abeh sudah pukat simpan

Ureueng bandum abeh sosah  
 Teuhan babah hana kalam  
 Pukat-pukat abeh ji'uet  
 Ka dalam pruet jipeureulan

Meunan sabe geunap uroe  
 Ureueng nanggroe jikheun yoh nyan  
 Singoh beungoh beude taba  
 Han peue kira wahe rakan

Me seunapang meuceureupa  
 Geureuda mangat tasimpan  
 Meukon meunan he adoe jroh  
 Eungkot saboh tateumeung han

Kon meueungkot wahe sahbat  
 Pukat-pukat abeh simpan  
 Peue-peue nyang na dum jiteumee  
 Bubee-bubee abeh jilhan

Kon meububee he syeedara  
 Gisa-gisa bandum meunan  
 Hingga dumpeue wahe po lem  
 Jareng-jareng jipeureulan

Dumpeue ji'uet ha boh ate  
 Kawe-kawe ji'uet sajan  
 Meunan jikheun bandum sare  
 Keumah pike deungon padan

'Oh ban beungoh jak u pasi  
 Jiba beude nyan seunapang  
 Mat bak jaroe beusoe ileue  
 Jijak meujeue lam beurawang

'Oh ban jieu le geureuda  
 Keu nan lanja jiteureubang  
 Bandum ureueng got meupakat  
 Taeu alat simban-simban

Jieu eungkot le sileupah  
Jitren bagah geureuda nyan  
Jitren laju di geureuda  
Troph le sigra jipo keu nan

Na miseue gle badan raya  
Sabe muka deungon badan  
Muka raya he teungku cut  
Tuhan Makbud nyang na tuban

Jisama le laju eungkot  
Teuma jitet beude yoh nyan  
Ngon seunapang jipeukeujot  
Han jitakot binatang nyan

Sion buleepi hana sret  
Di jih eungkot jipeureulan  
Jipeubeude han peue kira  
Roh lam mata binatang nyan

Ban sare roh dalam mata  
Geureuda marit le rijang  
Pane darah dum keulua  
Keunong mata gatai han ban

Di geureuda meunan pike  
Jipeubeude saketjih tan  
Ka jitimbak sabe-sabe  
Di jih ase meuruipi tan

Sigo saho ka jisawiet  
Tinggai euncit eungkot sinan  
Abeh bandum ka jipajoh  
Ma teungku beh bukon sayang

Teuduek 'oh nan saboh leua  
Keu geureuda lon peugah ban  
Nyankeu cicem nan geureuda  
Jimita umpeuen barangjan

Teuma meugah ubak raja  
Teuka bala lam nanggroe nyan  
Le that ureueng ka jipa joh  
Leubeh reutoh nyang ka simpan

Yoh nyan raja neukrah rakyat  
Neumeupakat tanyong padan  
Laju jitren dumna rakyat  
Meusapat ubak sulotan

Geusyik wakil tandi meuntroe  
Dum sinaroe ka troh keu nan  
Uleebalang guntoe-guntoe  
Ureueng nanggroe sikalian

'Oh meusapat dum sinaroe  
Marit sidroe ulee kawan  
Ampon deelat payong nanggroe  
Ka troh kamoe ho surohan

Raja peugah teuma meunoe  
Tango kamoe saboh padan  
Dalam nanggroe ka na banya  
Geureuda jijak peureulan

Meutan ilah ngon bicara  
Bandum gata nyawong simpan  
Dim peutua seuot meunoe  
Nibak lon nyoe ban nyang reumbang

Bak kamoe han peue tanyong  
Ban nyang keunong neuboh padan  
Ban nyang pakat deelat ampon  
Patot ulon neuba sajan

Nyang peutua meunan geukheun  
Seuot bandum teuma yoh nyan  
Wadi meuntroe geusyik imum  
Ka sapeue kheun sikalian

Meunyo meunan he peutua  
Tango hamba saboh padan

Singoh beungoh tame beude  
Tapeuase ngon angkatan

Beusep alat bandum sare  
U pasi tajak meukawan  
Insya Allah tuanku droe  
Singoh uroe tabeurjalan

Meunan jikheun wahe adoe  
Peuase droe dum sibarang  
Nyang geureuda han peue teuoh  
Bunoe suboh ka troh keu nan

Ureueng bandum he teungku beh  
Jipajoh jisangka ikan  
Geureuda jidong bineh riyuek  
Jijingeuk dalam laont nyan

Ban sare troh han peue pike  
Geupeubeude hana renggang  
Meutum meugrum beude geutat  
Teukeujot geureuda suang

Keunong aneuk troh meuribee  
Jikheun gutee dum bak badan  
Pakon meunoe tuboh di kee  
Teuka gutee han meujan-jan

Jideungo su beude raya  
Geureud ajipo that tajam  
Lheueh teukeujot lom jigisa  
Geureuda keu nan jiriwang

Ubak insan keu nan laju  
Meu'u'u sang ujeuen beuklam  
'Oh troh keu nan han peue tanyong  
Limong-lomong jipeureulan

Hana cit troe he adoe beh  
Na sireutoh nyang ka simpan  
Jipubeude hana teudoh  
He teungku beh jitakot tan

Le that insan ka jipajoh  
Limong reutoh nyang ka simpan  
Dumna insan ate kuyu  
Mohon bantu nibak Tuhan

Sang-sang bonya ka troh umu  
Sang laju kiamat datang  
Ya Tuhan ku beuneutulong  
Asoe gampong hamba Tuhan

Kamoe hamba neupeulindong  
Abah dum geureuda kuran  
Meunan jikheun ureueng nanggroe  
Jipeujoh droe ubak Tuhan

Na siteungoh abeh ureueng  
Teuma jiplueng dum jiriwang  
Nyang na tinggai jiwoe bandum  
Jak meuteumeung ngon sulotan

Ubak raja jikheun meunoe  
Deungo kamoe po junjongan  
Geureuda nyan hak ek tapoh  
Tuanku jroh pakri padan

Geutanyoe dum meuhad mate  
Pakri pike he sulotan  
Teuma seuot poteu raja  
Deungo hamba wahe rakan

Takrah rakyat dalam donya  
Bansineuna uleebalang  
Lheueh peurintah nibak raja  
Jikrah sigra dum sibarang

Hingga troh le keu nan teuka  
Poteu raja buka kalam  
Tango kamoe dumna gata  
Raja raja uleebalang

Soe nyang ek poh geureuda nyoe  
Lon bri jinoe peue suaka  
Ulon bri meuh siploh katoe  
Siblah nanggroe keujih pulang

Laen nibak nyan peue nyang suka  
Kubri sigra dum sibarang  
Jiseuot le bandum rata  
**Tan kuasa kamoe tuan**

Bandum kamoe hana daya  
Wahe raja syahi alam  
Raja deungo meunan haba  
Sosah raya hana lawan

Teutap sosah poteu raja  
Nyoe geureuda lon peugah ban  
Cre di laot he adek cut  
Jisujud u nap sulotan

Jicok keubeue na dua ploh  
Jipajoh lheueh nyan jiriwang  
Laju jiwoe lheueh seumajoh  
Teumpat jeuoh jiteureubang

Gunong manyang jiwoe pantah  
Piyoh payah baranggajan  
Nama gunong nyan Buket Kaf  
Gunong meugah hana lawan

Nyankeu gunong manyang leupah  
Teuma lon peugah u gaki nyan  
U Baroh nyan saboh nanggroe  
Teuma rot nor Hindustan

Biwan Lama u Tunong nyoe  
Ujong nanggroe Duson Yaman  
Biwan Lama na tatu'oh  
Roh di teungoh wahe teelan

Geureuda tren Biwan Lama  
Keu nan lanja jibeurjalan  
Watee uroe jak ulaot  
Watee seupot laen padan

Sira jiwoe watee seupot  
Jileugot keubeue meukawan  
Nyang u pasi 'oh meuteumeung  
Ureueng-ureueng abeh jisimpan

Han jeuet sidroe le meudiyeueng  
Jimakeuen han jan tahei wang  
Pruet geureuda jeuet keu kubu  
'Oh ban jieu laju simpan

He ya Allah ya Tuhanku  
Pakri laku kamoe insan  
Nyang u pasi han jeuet jak le  
Meuhad mate nyawong hilang

Sangat sosah ureueng nanggroe  
Han jeuet le toe u pasi nyan  
Nyang geureuda wahe adoe  
Geunap uroe jitren keu nan

Jipajoh bu hana eungkot  
U laot han soe jeuet jalan  
Eungkot lam krueng dum jigrop-grop  
Han jeuet soe drop wahe rakan

Han jeuet tadrop peue tapeugah  
Bu taeumpah mantong meunan  
Aneuk kadra ube jaroe  
Meuseunoh bloe hana macam

Limong ploh pengpi na soe bloe  
Meunankeu pro bak masa nyan  
Aneuk bace ube gitek  
Meuseunoh ek bloe eungkot nyan

Meuseunoh-seunoh wahe akhi  
Yum barangri jibloe rijang

Bak pihak tan nyan di pasi  
Jinoe pakri sayang that nyan

Meuna taeu wahe adoe  
Meuhad tamoe teuka sayang  
Bandum sosah ureueng naggroe  
Jak hareutoe bak sulton

'Oh troh keu nan angkat jaroe  
Ampon kamoe po junjongan  
Pakri laku po meukuta  
Tan bicara bak lakuan

Meunan jikheun dum peutua  
Sosah raya hana lawan  
Uleebalang seuot laju  
Grak Tuhan troh bala nyan

Teuma pakri wahe teungku  
Raja meusu tanyong padan  
Na tadeungo dum peutua  
Toh bicara keu lon tuan

Pakri leumah nibak gata  
Takheun sigra ubak laman  
Teuma seuot sidroe meuntroe  
Nibak kamoe saboh padan

Neukrah rakyat dum sinaroe  
Geusyik meuntroe beuna sajan  
Tayue jitren bandum sigra  
Ka na bala tapeugah ban

Dum beuabeh neuyue ili  
Jih neugasi meutan datang  
Nyang hana troh tayue gasi  
Baranggari ureueng agam

Ureueng agam beuabeh tren  
Deelat ampon bek syugolan  
Tuha muda banda duson  
Deelat ampon meunan reumbang

Sidroe meuntroe meunan peugah  
Raja pantah yue panggelan  
Ubak bujang rajayue krah  
Hina meugah sikalian

Yoh nyan bujang beudoh laju  
Barat Timu jijak rijang  
Tunong Baroh troh meu'u-'u  
Gong jibalu hana reunggang

Timu Barat jitren laju  
Han jeuet taeu rakyat datang  
Hingga sampoe ubak teungku  
Tamong laju keu nan bujang

Di sinan le dum ureueng beuet  
Rayek ngon cut rame han ban  
Bujang peugah laju sigra  
Bak ulam teungku Beurahman

Angkat jaro di jeumala  
Sabda raja jipeugah trang  
Teungku neujak jinoe sigra  
Tinggai bek na sidroe rakan

Teuma seuot teungku syiah  
Insya Allah kamoe datang  
Bujang jijak laju pantah  
Jijak krah ho laen rijang

Abeh jijak jeuep-jeuep nanggroe  
Jeuoh ngon toe sikalian  
Uleebalang dum sinaroe  
Geusyik sagoe dum sibarang

Uleebalang nyang seureuloe  
Ka troh sampoe dum panggelan  
Pahlawannyang ugoh-ugoh  
Uroe suboh jibeurlalan

Jitren rakyat that meuron-ron  
Meuhimpon mideuen sulton  
Di ulamapi ka neujak  
Deungon awak neuba sajan

Rakna Bangta sajan neujak  
Ate galak cut bangsawan  
Bangta Sawangi sireuta  
Neujak lanja ngon Beurahman

Bandum rakyat abeh teuka  
Cut ngon raya beusa seudang  
Rame rakyat hana tara  
Keu nan teuka sikalian

Hingga teuma haba nyang toe  
Rakyat nanggroe abeh datang  
'Oh meuhimpon dum sinaroe  
Marit sidroe ulee kawan

Deelat ampon po meukuta  
Dum lasyeuka abeh datang  
Peue na hajat payong donya  
Peugah teuma laju rijang

Teuma sabda poteu raja  
He sigala uleebalang  
Wahe rakyat dum sineuna  
Cut ngon raya beusa seudang

Dalam nanggroe ka troh bala  
Toh bicara ngon amilan  
Saboh cicem keu noe teuka  
Ka jiseuba dumna insan

Nyang meupayang dalam laot  
Bandum mawot ka jisimpan  
Pakri jinoe nyang meurasa  
Peugah sigra dumna tuan

Uleebalang seuot sigra  
Nibak hamba bicara tan  
Teuma raja lom meusabda  
Rakyat dunma deungo yoh nyan

Baranggasoe ek poh geureuda  
Meunoe haba lon peugah trang  
Ulon bri meuh siploh katoe  
Siblah nanggroe keujih pulang

Meuhan sep nyan wahe adoe  
Lon bri putroe aneuk badan  
Aneuk kamoe putroe indah  
Din Syarifah nyang analan

Meuhad ngonjih lon peunikah  
Hana ubah ban lon kheun nyan  
Hana sidroe ureueng seuot  
Dum teumakot binatang nyan

Taeu mantong ka teukeujot  
Dalam karot tateurajang  
Han soe jeuet poh nyan geureuda  
Badan raya hana macam

Meunan jikheun bandum rata  
Seungap haba 'oh nan diam  
Yoh nyan sosah poteu raja  
Rakyat dumna meunan kalam

Dum pahlawan ugoh-ugoh  
Han jijeuet poh geureuda nyan  
Pakri pike jinoe nyang jroh  
Tan meusaboh nyang na agam

Bak masa nyan Rakna Bar ta  
Bandua ngon Bangta Sawang  
Neudeungo nyan sabda raja  
Bandua ate sukaan

Neumeupakat bandua droe  
Pakri jinoe he cut abang  
Tameungaku le geutanyoe  
Geureuda nyoe tajeuet simpan

Bandum ureueng han jiseuot  
Teuboh mulot di sulotan  
Bah geutanyoe jinoe seuot  
Bek teumakot he cut abang

Bek gli geunta he dalem cut  
Kareuna buet keubajikan  
Deungon tulong Tuhan Makbud  
He dalem cut nakeu jalan

Keumah pakat bandua droe  
Seuot meunoe Bangta Sawang  
Deelat ampon po meukuta  
Bahle hamba poh bala nyan

Meubek ubah he meukuta  
Ban nyang sabda dipeurtuan  
Bek le sosah po meukuta  
Kamoe dua jinoe simpan

Bangta marit di keue rakyat le  
Bandum tahe jideungoran  
Jieu rupa that juhari  
Teukap bibi sikalian

Bangta Sawang marit meunoe  
Tadeungo nyoe dumna tuan  
Teuma marit Rakna Bangta  
He kakanda deungo laman

Cuba tanyong ubak doli  
Na ban janji meutuka han  
Na ban neukheun meunan janji  
Cuba ci neutanyong beutrang

Proe hai mate nyan geureuda  
Han meutuka ban neukheun nyan  
Seuot raja meunyo ubah  
Lon tapinah he budiman

Wahe aneuk meunyo ubah  
Bek taminah dalam midan  
Le that ureueng deungo rata  
Malee raya lon he intan

Meunyo aneuk ubah janji  
Nibak Rabbi lon salahan  
Meuteujalok he boh ate  
Jinoe lon bri surat sajan

Lon bri surat tanda jaroe  
Uroe dudoe bak ubahkan  
Bek meuungki teuma dudoe  
He aneuk droe batee badan

Lom ka neubri euncien putroe  
Neupeujaroe le sulotan  
Yoh nyan raja neutiken cap  
Tanda adat muliaan

Di nap meuntroe nyang beurpangkat  
Di keue rakyat sikalian  
Cap neuteugon nibak surat  
Keu alamat peurjanjian

Na tadeungo wahe meuntroe  
Uroe dudoe bek dawaan  
Nyoakeu tanda nibak kamoe  
Euncien putroe nyang analan

Deungon surat sajan dua  
Rakna Bangta that sukaan  
Neucok surat nibak raja  
Lom sireuta euncien sajan

Teuma neukheun meunoe haba  
Ubak raja nyang sulotan

Deelat ampon po meukuta  
Nyan geureuda kamoe nyang simpan

Kon teukabo deelat payong  
Deungon tulong sidroe Tuhan  
Geureuda nyan kamoe keupong  
Deelat ampon bek sosahan

Meuhan mate geureuda nyan  
Neubalek nan kamoe tuan  
Deungon tulong Tuhan Esa  
Ban lon cinta bri sampoekan

Ngon syafaat Nabi Muhammad  
Pangulee umat Rasul Tuhan  
Lon poh mate geureuda laknat  
Beuseulamat dumna insan

Gata Tuhan nyang kuasa  
Beutroh pinta ulon tuan  
Beureukat ayah deungon bunda  
Dan eelia sikalian

Bangta Sawang Rakna Bangta  
Meusempeuna ubak Tuhan  
'Oh neudeungo uleh raja  
Ate suka po junjongan

Rakyat laen bandum tahe  
Jingo tuto Bangta seudang  
Han sigeutu na teukabo  
Bungong kundo that bijakan

Jimeukheun-kheun ureueng dumna  
Aneuk raja bak lakuan  
Kadang saleh aneuk raja  
Bak meuhaba jroh meulumbang

Rupapi jroh putik rambot  
Sang patot aneuk sulotan  
Jimeututo leumah-leumbot  
Jroh meusambot tadeungoran

Meunan jikheun dum jipeugah  
Jimeusah-sah sabe rakan  
Bangta dua pakat keumah  
Geukheun pantah bak sulotan

Ampon deelat kamoe meuwoe  
Neuleueng jaroe po junjongan  
Han peue salah he aneuk droe  
Idin kamoe wahe intan

Rakyat laenpi ka jiwoe  
Tinggai meuntroe sidroe sajan  
Teuma marit teungku meuntroe  
Geupeugah proe bak sulotan

Ulonteu nyoe silap raya  
Wahe raja po junjongan  
Peue na silap tanyong raja  
Peugah sigra bak lon tuan

Na neutupeue tuanku droe  
Ka rugoe peurmata intan  
Raja tanyong pakon rugoe  
Seuot meuntroe teuma rijang

Kadang gop nyanuroe dudoe  
Geuiem droe wahe sulotan  
Hana jitem poh geureuda  
Teulah raya di junjongan

Adat meudeh po meukuta  
Neuteuntee ka tandatangan  
Di geutanyoe euncien putroe  
Jigantoe teuma miseue nyan

Teuma di jih hana jibri  
Wahe doli pakri padan  
Raja seuot teuma meunoe  
Silap kamoe nyobit meunan

Jinoe pakri buet ka leupah  
Tapaban bah kheundak Tuhan

Bahle gadoh han le kira  
Seungap gata bandum diam

Bak masa nyan ureueng nanggroe  
Jikheun meunoe sikalian  
Keunong tipee raja nanggroe  
Euncien putroe ka jitawan

Kadang ureueng that beurakah  
Jeuep-jeuep babah jikheun meunan  
Teuduek 'on nan saboh ulah  
Ulon kisah Bangta seudang

Jinoe ayat ulon tuka  
Ban nyang gura wahe rakan  
Meuwoe kisah Rakna Bangta  
Bandua ngon Bangta Sawang

Angen Barat jipot laju  
Angen Timu meukutika  
Sinoe ka lom amma bakdu  
Bek le karu ngo beurata

Bangta dua neuwoe laju  
Deungon teungku guree Bangta  
Sira neuwoe bungong meulu  
Seun sigeutu peugah haba

Teungku guree neuteumanyong  
Pakri keunong he aneukda  
Han ek tapoh aneuk bungong  
Ban gunong cicem geureuda

Badan raya hana macam  
Ube talam aneuk mata  
Limong keubeue sigo jilhan  
Geureuda nyan sangat raya

Pakri jinoe nyak meutuah  
Bukon teulah gata lon ba  
Dumna le pahlawan meugah  
Meubabah han jijeuet buka

Pakri gata nyak meutuah  
Tapeugah meung poh geureuda  
Bangta seuot insya Allah  
Bek that sosah guree hamba

Deungon tulong nibak Allah  
Neubri mudah barang pinta  
Wahe guree bek le sosah  
Poteu Allah Maha Kaya

Hadih Nabi Rasulullah  
Meunoe surah lafai makna  
Man talaba teuma syai'an  
Bak ujung nyan jidda wa jada

Ban fireuman nibak Tuhan  
Neupeutren nyan bak anbia  
Bit talakee deungon sunggoh  
Tuhan peutroh hajat pinta

Meunan Bangta neupeugah proe  
Ka neuiem droe di ulama  
Troh u deyah keu deh neuwoe  
Banlhee droe teungku ngon Bangta

Hingga teuma malam uroe  
Dum sinaroe meuseunia  
Bak malam nyan po samlakoe  
Bandua droe lam meujaga

Neumeulakee ubak Allah  
Beuleupah neupoh geureuda  
Sira neueh mita ilah  
Bak Allah neulakee do'a

Bandua droe wahe akhi  
Ubak Rabbi mohon pinta  
Ya Ilahi wa ya Rabbi  
Ya Ghani Po lon Nyang Esa

Pinta ulon jinoe neubri  
Gata Ghani that kuasa

Tan pat laen lon peugah ban  
Meulayenkan ngon tulong gata

Neübri mate geureuda nyan  
Sayang insan dum binasa  
Meunan do'a neukheun sabe  
Neulafai le man talaba

Sikhan malam meunan sabe  
Ka teupike Rakna Bangta  
Tren eleuham dalam ate  
Leumah pike nyang sijahtra

Nyang jeuet meunan leumah pike  
Sungoh ate neumeupinta  
Ubak aduen ka neukheun le  
Jinoe pakri he kakanda

Nyang na leumah dalam ate  
Dalam pike ulon kira  
Jinoe dalem mita kabat  
Nak taikat nyan geureuda

Meunam reutoh tabloe kabat  
Tapeugot jrat dudoe teuma  
Nak tapeugot bubebee balot  
Bineh laot tattheun lanja

Ragam bangon ulon seubot  
Miseue balot tulo rimba  
Taikat 'oh leupah badan  
Meunan macam he kakanda

Cit di lua sikhan badan  
Mangat tacang culek mata  
Babah teuma ban krong pade  
Raya ube lot geureuda

Meunan neukheun Bangta Kumari  
Bangta ahli le bicara  
Bangta Sawang teuma seuot  
Meunan patot ban kheun gata

Meukon meunan he adek cut  
Han mawot cicem geureuda  
Nyang jeuet adek meunan lon kheun  
Cicem bajeung bueh lagoina

Watee jitren su meuhuet-huet  
Jisujud bagoe geulawa  
Meujitem roh han peue pike  
Bit-bit mate hilang nyawa

Meunan neukheun Bangta Sawang  
Seuot rijang Rakna Bangta  
Meunyo meunan he dalem droe  
Kabat tabloe uba nyang na

Singoh beungoh tabloe kabat  
Meunan pakat ureueng dua  
Yoh nyan geueh wahe adoe  
Beungoh uroe teuma jaga

Ban teukeujot po samlakoe  
Bandua droe jak meumita  
Teuma neujak le u keude  
Kawat dawe neubloe sigra

Abeh neubloe jeuep-jeuep keude  
Kawat dawe nyang raya-raya  
Bangta dua cit utoh that  
Neupeugot jrat sangat raya

Uroe malam peugot leugat  
Neutakat 'oh lot geureuda  
Rupa bangon he adek cut  
Miseue balot cicem rimba

Lam neupeugot beungoh seupot  
Bungong rambot sunggoh raya  
Hingga teuma ka lheueh balot  
Bineh laot keu deh neuba

Bineh pasi neuba leugat  
Bak teumpat jitren geureuda

Bak teumpat nyan ka neutheun jrat  
Neutakat neukira-kira

Bangta dua neutheun balot  
Dumpeue cukop dianika  
Teuma uroepi ka seupot  
Po Bangta cut ka neugisa

Singoh beungoh uroe suboh  
Po Bangta jroh lom neuteuka  
Teungoh malam Bangta beudoh  
Meucuh-coh u pasi lanja

Nyang mangat bee ukheue usi  
Ureueng tari dum jak mita  
Amma bakdu wahe nyak ti  
Jak u pasi Rakna Bangta

Neuleueng jaroe po juhari  
Ubak Rabbi meusempeuna  
Ya Ilahi wa ya Rabbi  
Poku neubri ban loq pinta

Gata Tuhan nyang that Ghani  
Beumate lon poh geureuda  
Meunan do'a po samlakoe  
Bandua droe Bangta muda

Oh lheueh meudo'a bandua droe  
Rahop jaroe ubak muka  
Sireuta neukheun ngon sunggoh that  
Deungon ayat man talaba

Bak malam nyan sinan teutap  
Neupreh troh had uroe faja  
Uroe suboh ka rab beungoh  
Bangta beudoh le bandua

Uroe beungoh han that peungeuh  
Goh lom deuh takalon rupa  
Troph geureuda bak masa nyan  
Jidong sinan rab ngon Bangta

Sinan jidong si geunireng  
Got sampeng ngon ureueng dua  
'Oh ban neungieng han peue pike  
Neupeubeude pantah sigra

Keutam-keutam neupeubeude  
Kreueh that ate hana tara  
'Oh neutimbak cit keunong le  
Boh beude lampang ceureupa

'Oh ban keunong han peue pike  
Beungeh le cicem geureuda  
Badan raya na miseue gle  
Jisujud le ateueh Bangta

Bak jisama Bangta seudang  
Roh u dalam bubeey raya  
Jisujud sang boh meuriam  
U dalam bubeey Cut Bangta

Roh u dalam he adoe cut  
Sayeuep-sayeuep ka bandua  
Meusak keu nan bandum abeh  
Sikhan beuteh nyang di luar

Got that arat wahe adoe  
Miseue bajoe keunong nuga  
Dua gaki jiglueng anoe  
Leungo bumoe miseue geumpa

Ureueng nanggroe dum teumakot  
Teukeujot ka teuka bala  
Bandum ureueng that teukeujot  
Ulon seubot Bangta dua

'Oh ban neueu tinggai gaki  
Neutajo le keu nan sigra  
Deungan kawat cit ka ase  
Neukat le gaki dua

'Oh ban keunong taloe kabat  
Gadoh kuat di geureuda

Han that ek le jigeuriwat  
Ka dalam jrat sayeuep dua

Bak masa nyan muntah darah  
Dalam babah dum keulua  
Teubiet sinan saboh kubah  
Peutoe indah hana tara

Ureueng peugot areh billah  
Poteu Allah nyang kuasa  
Dalam dada na eleuham  
Peuntoe nyan asoejih ka na

Masa ji'uet lon peugah ban  
Bak masa nyan goh lom lama  
Nyang po peutoe ngo lon rawi  
Nyan gogasi po areuta

Di gogasi lakoe binoe  
Dua droe aneuk goh raya  
Jimeuduek-duek rab ngon peutoe  
Banpeuet droe sinan sireuta

Teutap jiduek sinan peuet droe  
Troph sampoe inong geureuda  
Ban jikalon ka rab keu noe  
Lam peutoe jiboh aneukda

Jiduek di jih ateueh peutoe  
Lakoe binoe dua saja  
Troph geureuda keu nan sujud  
Laju ji'uet le geureuda

Peutoe-peutoe abeh ji'uet  
Ureueng nyan peuet ka seureupha  
Nyankeu peutoe nyang jimuntah  
He meutuah le geureuda

Dumnan di jih gaseh aneuk  
Jitem duek di jih di lua  
Beutaingat wahe adoe  
Baranggasoe tuha muda

Hak bak Tuhan jinoe pakri  
Keu nan neubri aneuk dua  
Rakna Bangta ureueng sufi  
Allah Rabbi nyang karonya

'Oh nan teuduek lem gogasi  
Bangta ahli lon calitra  
Neungieng geureuda nyan ka mate  
Neupeurab le keu nan dua

Ucap syuko pujoe Rabbi  
Hana sakri ate suka  
'Oh troh keu nan wahe adoe  
Leumah peutoe neue rupa

Neucok laju yoh nyan peutoe  
Po samlakoe laju buka  
Peutoe jroh that hana peue kheun  
Adoe aduen kalon rupa

Ban neubuka tahe hireuen  
Leumah ureueng neueu dua  
Bandua droe mantong udep  
Moe meurep-rep ro ie mata

Ma deungon dujih ka han le  
Ka mate lam pruet geureuda  
Kheundak Tuhan Rabbon Kade  
Ka mate ayah ngon bunda

Po Bangta cok teuma yoh nyan  
Bri makapan peue mudah na  
Baro jeuet plueng wahe adoe  
Ureueng lakoe jih bandua

Bangta dua teuduek 'oh noe  
Ureueng nanggroe lon calitra  
Jieu geureuda ka roh lam jrat  
Dalam kabat bubeen Bangta

Jiplueng laju le jikarat  
Jiwoe leugat ubak raja  
Teungoh jiplueng taeu reubah  
Apoh-apah hana tara

Han jikira adat reubah  
Jiplueng bagah miseue guda  
Luka gaki teubiet darah  
Ka mirah lagee keusumba

Jiplueng sabe meuhah-meuhah  
Teusuet lidah sang meurua  
Nyang jeuet jiplueng beuthat reubah  
Mita syabah nibak raja

Soe meurumpok tanyong pantah  
Taplueng bagah peue kareuna  
Pakon taplueng meuhah-meuhah  
Cuba peugah soe let gata

Hana jeuet le jiseumeugah  
Meuhah-meuhah ban bui buta  
Na sang bangon ureueng geulet  
That meusaket sang ka jiwa

Hana macam taeu meugriet  
Jiplueng bit-bit troh bak raja  
Soe nyang tanyong han jipakoe  
Sosah han soe ureueng donya

Ureueng gampong pike meunoe  
Kadang dop nyoe han jeuet basa  
Tatanyong basa Meulayu  
Apa itu lari gata

Apa sabab lari teungku  
Siapa buru apa kareuna  
Nyanpi hana jitem meusu  
Di jih laju plueng meutaga

Ka teupike ureueng nyang eu  
Sang bak laku pungo gila

Tan jipiyoh jiplueng laju  
Trok watee bu ubak raja

'Oh sare troh keu nan u leuen  
Jiek rinyeun seun-seun dua  
Poteu raja teungoh makeuen  
Neueu ureueng keu nan teuka

Miseue ureueng woe lam ujeuen  
Reoh rureuen basah ija  
Di ureueng nyan laju jikheun  
Deelat ampon po meukuta

Han jan jipreh meujan lheueh bu  
Jimeusu jideelat raja  
Jikheun deelat ka roh bulat  
Bak meukarat hek lagoina

Jipeugah geureuda ka mate  
Ka roh mate jikheun raja  
Sosah raja hana lagee  
Piyoh dilee bek that kubra

Teuma piyoh puleh payah  
Jipeugah keunong lagoina  
Geureuda jikheun hana le  
Ka mate he po meukuta

Hana payah jipeubeude  
Buet rante kabat teumaga  
Di geutanyoe han troh pike  
Ngon beude tapoh geureuda

Meunyo meunan pane mate  
He doli meukuta donya  
Ban neudeungo jihareutoe  
Neucok jinoe peudeueng raya

Neuplueng laju yoh nyan lhee droe  
Dua meuntroe lhee ngon raja  
Ureueng gampong tahe hireueng  
Pakon neuplueng peu kareuna

Bunoe jieupi ureueng plueng  
Jinoe ka lom neuplueng raja  
Nyang bunoe plueng u Tunong  
Tatanyong jiseuot hata

Jinoepi ka plueng u Baroh  
He rakan beh peue ka bala  
Jimeung tanyong hana jijeuet  
Neuplueng ban buet miseue guda

Jingieng mantong mata teusuet  
Tanyong han jeuet sabab raja  
Sira neuplueng tanyong meunoe  
Ubak meuntroe tanyong raja

Pane ureueng na katusoe  
Seuot meuntroe he meukuta  
Ureueng nyang tueng euncien putroe  
Bandua droe sama juga

Miseue Bangta bandua droe  
Neungo kamoe wahe raja  
Gop nyan nyang poh deelat ampon  
Beuhareuem lon bukon seunda

Meunan meuntroe jiseumeugah  
Beumeutuah seuot raja  
Neuplueng sabe bukon neujak  
Ka troh ubak Rakna Bangta

Ban Bangta ngieng han peue pike  
Gaki doli neucom lanja  
Poteu raja tahe bacut  
Neukalon buet Rakna Bangta

Teuma sabda raja nanggroe  
He samlakoe deungo hamba  
Beudoh aneuk jinoe tawoe  
Ubak adoeteu he Bangta

Han peue salah tuanku droe  
Ho cit lon woe po meukuta

Bek ho-ho cit he samlakoe  
Tango kamoe bijeh mata

Nyoe tadeungo samlakoe jroh  
Meuseunoh poh wahe Bangta  
Meuseunoh poh bak jipeugah  
Keu nasabah bijeh mata

Mangat jitueneng keujih putroe  
He samlakoe Bangta muda  
Poteu raja meunan peugah  
Seuot pantah Rakna Bangta

Bahle meunan han peue salah  
Manga' mirah ie kuala  
Ban jipeugah deelat pateh  
Ban nyang kheunjih beuneurela

Seuot raja pane meunan  
Meukon seunang pane gura  
Bek meudawa po samlakoe  
Beudoh jinoe bijeh mata

Teuma Bangta ka neubeudoh  
Han neujinoh le meudawa  
Aneuk gogasi na dua boh  
Neujak ka troh ubak raja

Bujang meuntroepi jak sajan  
Neubeurjalan yoh nyan sigra  
Ka troh keu nan u meuligoe  
Bandua droe Bangta muda

Rakna Bangta di seuramoe  
Jitren putroe indah ruap  
Yoh nyan jitren Din Syarifah  
Jiseumbah bak teuot Bangta

Bangta dua putroe seumbah  
Jipeuindah hana tara  
Bak seumeumah putroe lisek  
Miseue itek kalon paya

Han jan leumah ulee teuot  
Jroh patot jiseumbah Bangta  
Hana reuda putroe seumbah  
Allah Allah he kakanda

Jjok ranup dalam bate  
Neusambot le Bangta muda  
Pajoh ranup na sigapu  
Jibeudoh hu cahya muka

Lheueh nibak nyan geupeujamee  
Ban patot mee aneuk raja  
Tuan putroe rumeh teukhem  
Lam baten judojih ka na

Leumah gigoe putroe jikhem  
Jingieng dalem jroh that rupa  
Watee jijak putroe linteng  
Meukeureuleng ngon iku mata

'Oh jipandang rupa cut lem  
Putroe canden ate suka  
'Oh jijak meukeunyot-keunyot  
Putroe got atejih gila

Nyum-nyum ate ka na judo  
Dara baro aneuk raja  
Deungon euncien yum meuribee  
Ngon boh bajee yum meulaksa

'Oh roh subang bak geulunyueng  
Cahya jiplueng ubak muka  
'Oh roh subang nibak baho  
Sang meuto-to miseue geumpa

Din Syarifah that sambinoe  
Dalam nanggroe hana ngon sa  
Abeh lon eu dalam nanggroe  
Hana sidroe meunan rupa

Kulet puteh jampu mirah  
Siulah aneuk syeuruga

Rupa jroh that han peue peugah  
Dim Syarifah aneuk raja

Soe nyang pandang ate rindu  
Meucahya hu ngon ie muka  
Sepkeu dumnan lon kheun laku  
Bungong meulon aneuk raja

Bahle laen ulon peugah  
Din Syarifah teuduek haba  
Jinoe teuma lom lon peugah  
Nyoe lon kisah rakyat dumna

'OH ban meuthee geureuda mate  
Ka jitren le tuha muda  
Timu Barat Baroh Tunong  
Agam inong jitren lanja

Jeuep-jeuep nanggroe abeh jitren  
Meuron-ron jak eu geureuda  
Ube jithee ka troh jijak  
Meusak-sak u pasi lanja

Taeu rakyat that meubalak  
Nyang teungoh jak han ek kira  
Di peurdana saboh lagee  
Cok bulee inong geureuda

Ubak raja baplueng teuntee  
Geupeugah kee poh geureuda  
Ciem geureuda ka ulon poh  
Bunoe suboh po meukuta

Ka lheueh mate bunoe lon poh  
Cut putroe jroh keu lon jeumba  
Raja deungo jikheun lagee  
Pangulee teukhem that raya

Bit nyoe gata ka ulon thee  
Nyang poh gутee pijet dumna  
Got that meugah keu noe bak kee  
Trok meuribee nyang ka fana

Jamokpi na nyang ka padée  
Laen gutee lon ngon seuma  
Troph meuribee nyang ka mate  
Tinggai bangke dalam ija

Teungoh malampi na mate  
Bek peugah le sep dum nyang ka  
Bek le marit hana ase  
Bek le syawe he peurdana

Peurdana ngo narit doli  
Seungap han le sapeue haba  
Lem peurdana meunoe pike  
Dalam ate meunoe kira

Bah sigoe treuk lon kheun lagee  
Beuthat malee sabab hawa  
Kadang geubri putroe keu kee  
Bah dilee kutamah haba

Bit tuanku ulonteu poh  
Cut putroe jroh bri keu hamba  
Bunoe mate 'oh lheueh suboh  
He raja jroh kon doseuta

Seuot raja nyang pangulee  
Nyan pat asee cok keu gata  
Sabab gata nyang poh gutee  
Meuhad asee lon bri jeumba

Peurdana ngon sangat malee  
Sret meuree-ree ngon ie mata  
Peurdana woe le u juree  
'Ayeb malee peue takira

'Oh nan teutap saboh lagee  
Lon peuteuntee Bangta dua  
Rakna Bangta di rumoh nyan  
Bak junjongan raja raya

Bandua droe neuduek sinan  
Adoe aduen laen hana

Rakna Bangta neumeuteuoh  
He dalem hroh deungo hamba

Soe meukawen ngon putroe jroh  
Putroe saboh geutanyo dua  
Bangta Sawang laju jawueub  
He adoe cut bah keu gata

Rakna Bangta lom neuseuot  
He dalem cut bah keu gata  
Bek adekda bri keu kamoe  
Si nyak putroe judo gata

Bah keu gata puteh licen  
Tameukawen he adekda  
Bek keu kamoe he cut abang  
Bangta Sawang bah keu gata

Bah keu gata he cut abang  
Putroe seudang hukom gata  
Meunan sabé meutulak deungki  
Kheun Kumari dudoe teuma

Wahe dalem deungo kamoe  
Adekteu nyoe buka haba  
Beukit putroe lon meukawen  
Meuhad dalem gata bungka

Han neujeueh woe ubak kamoe  
Si nyak putroe parui gata  
Sabab gata sangat malee  
Bungong keumee judo hamba

Meuneumaritpi han neujeuet  
He dalem cut Bangta muda  
Beukit cut bang neumeukawen  
Deungo dalem lon peuhaba

Ulonteu woe beungoh seupot  
Ri cit patot bak teumuda  
Han lon malee han lon takot  
Cit meupatot bak syeedara

Lon meukawen han meuteunte  
Bit malee neuwoe kakanda  
Cuba pike wahe aduen  
Bit ban lon kheun cuba kira

Rakna Bangta meunan neukheun  
Bungong sumpueng le bicara  
Bangta Sawang rumeh teukhem  
Bungong usen deungo hamba

Nyang putroe nyan lon meukawen  
Toh laen teuma di gata  
Rakna Bangta seuot bagah  
Bek that sosah he kakanda

Deungon tulong nibak Allah  
Neupeumudah barang pinta  
Nyang putroe nyoe neumeukawen  
Di lon laen lon jak mita

Rakna Bangta meunan kalam  
Bangta Sawang jaweueb sigra  
Meinjo meunan adek badan  
Ulon sajan jak meumita

'Oh meuteumeung putroe laen  
Keu noe tatren he adekda  
Hareuem putroe lon meukawen  
Meutan laen nyan di gata

Di lon adek ngo lon peugah  
Han lom nikah meutan gata  
Bangta Sawang meunan peugah  
Seungap pantah Rakna Bangta

Rakna Bangta neukheun meunoe  
Deungo kamoe he kakanda  
Meunanpi jeuet he dalem droe  
Udeh tawoe bak ulama

Nyang cut putroe bahle sinoe  
Uroe dudoe tabicara

Teuma beudoh bandua droe  
Neujak sampoe ubak raja

Deelat ampon kamoe jak woe  
Neuleueng jaro po meukuta  
Raja seuot neukheun meunoe  
Bek tawoe dilee aneukda

Piyoh siat he boh ate  
Lon meuase bijeh mata  
Sabab gata le that rugoe  
Tajak keu noe he aneukda

Tabloe kabat le that rugoe  
Rakyat nanggroe lon seuranta  
Ulon yue me bungong jaro  
Lon meung gantoe rugoe gata

Meukon meunan malee kamoe  
Sang ulon nyoe bukan raja  
Bangta muda jaweub meunoe  
Bahle lon woe po meukuta

Seuot raja neukheun meunoe  
Mangat kamoe tatueng nyawa  
Mangat tapoh ulon sidroe  
Meunyo tawoe wahe Bangta

Meunan neukheun raja nanggroe  
Po samlakoe han le haba  
Teuma uroepi ka seupot  
Po Bangta cut di istana

Tuan putroe panyot jitet  
Lheueh nyan jibet idang raya  
Di keue Bangta peuduek laju  
Jaroe buju di jeumala

Teungku makeuen meusigeutu  
He tuanku bu ngon sira  
Kru seumangat wahe putroe  
Nibak kamoe that mulia

Nibak gata na cit dumnoe  
Di kamoe meusapeue hana  
Bangta dua makeuen rijang  
Pinah idang lheueh nyan sigra

'Oh lheueh makeuen jula malam  
Lael ragam putroe muda  
Bangta neueh di seuramoe  
Cut putroe dalam istana

Bangta dua cit neuiem droe  
Di putroe atejih rugha  
Sabab euncien di cut putroe  
Ka lam jaroe Bangta dua

Bakjisangka jeuet keu lakoe  
Meuhad sidroe dalam dua  
Meunan pike po sambinoe  
Deungo jinoe lon calitra

Neuploh bungkoh di seuramoe  
Cut putroe keuting ceurana  
Rakna Bangta wahe adoe  
Kon ngon putroe neumeuseunda

Neukue bungkoh di seuramoe  
Cut putroe keuting ceurana  
Neupoh jamok di seuramoe  
Cut putroe neugaro tika

Rakna Bangta ube buet droe  
Kon ngon putroe neumeucakra  
Ureueng dua neuduek keudroe  
Si nyak putroe lawan seunda

Tuan putroe ulon peugah  
Bit that sosah hana tara  
Ate mabok bungong kawet  
Sang beuneujep ie syeuruga

Leumah pike putroe bungong  
Bah lon tanyong ubak Bangta

Nibak ate meunan keunong  
Cut bungong le that bicara

Meunan leumah puteh lumat  
Jiingat hekeumat donya  
'Oh ban putroe boh hekeumat  
Teungeut mangat bandum rata

Nyang han teungeut ureueng lhee droe  
Sidroe putroe Bangta dua  
'Oh ban teungeut ureueng laen  
Puteh licen ate suka

Teuma jikheun syae panton  
Su meualon hana tara  
Mirapati sikawan tujoh  
Beurapalah itu hatinya sunggoh

Kalee tiada hatinya sunggoh  
Lamanlah itu beurseunda-seunda  
Satu inong laman beurcari  
Cicem nuri agam bandua

Ayam puteh jikeupong abee  
Meusalop bulee deungon lihenya  
Mantonglah teungku janji dilee  
Ulon teuntee apa gunanya

Burong teureubang di atueuh hawa  
Aneuk geureuda mate di bumi  
Apalah hajat janji nyang ka  
Ulonlah cinta malam dan hari

Meunan jikheun buleuen peunoh  
Ka mehmoh lam ate Bangta  
Ka teupike po samlakoe  
Roh meupaloe akhe masa

Bitpi meunan bah lon seuot  
Ban nyang patot ngon meumada  
Leukek bangguna meulot di bumoe  
Puyoh manoe di dalam cintra

Han lon jeuet ek po sambinoe  
Kareuna kamoe jamee teuka  
Meunan neukheun Bangta Kumari  
Bak cutti dalam isatana

Seuot putroe teuma meunoe  
Istana nyoe po di gata  
Meunan jikheun puteh licen  
He po lem keu noe bandua

Bek he adek tameuayang  
Meujantang narit di gata  
Uroe budee cit troh keu nan  
Janji laman na ngon raja

Narit lon nyoe bukon wayang  
E hai bintang mayen mata  
Seuot putroe cahya bungong  
That meukeunong panton jiba

Bayek-bayek urot sirahet  
Meusingklet bak kayee raya  
Apalah takot teungkunya sabet  
Tidak peunyaket dalam istana

Pula geureutoe keu umpeuen ulat  
Meuna hajat siluweue sutra  
Keu noe neuke tuanku siat  
Meuna hajat keu bungong jeumpa

Meunan jikheun putik rambot  
Teuma seuot Rakna Bangta  
Aneuk seumantung jibawa pijet  
Aneuk sirindet jigisa cintra

Tidak kutakot akan peunyaket  
Kuarong buket masa kubungka  
Bak beurunyong timoh di gunong  
Hanyot bungong u kuala

Ulon po cut hajat teumanyong  
Tren he bungong siat gata

Lom sikrak treuk Bangta tindeh  
He cut puteh deungo hamba

Boh durian teumon bu leukat  
Boh pisang klat makan anaknya  
Tren he po cut keu noe siat  
Bek lambat meusiklep mata

Meunan neukheun po samlakoe  
Seuot putroe nyang jroh rupa  
Pakon tuanku neumeuayang  
Han tom kubang keubeue jimita

Ube nyang ka ulon kalon  
Maon han tom jimita tima  
Di tuanku meunan neukheun  
Sang-sang ulon neupeuseunda

Kru seumangat Bangta seuot  
He putroe cut tanglong donya  
Hana patot lon meuayang  
Gata intan kamoe raja

Cit ka lon thee he buleuen trang  
Nyang kubang keubeue jak mita  
Bitpi meunan cut ma ubon  
Adek tatren siklep mata

Na tadeungo po cut ampon  
Nibak ulon adek raja  
Cicem pala cut po meulinggang  
Cicem subang po meugisa

Meunyo hajat ureueng meudagang  
Beugot taidang bek leupah bungka  
Meunan neukheun po samlakoe  
Bahle kamoe peumulia

Ri cit patot tameuteumee  
Deungon jamee pusaka kaya  
Meunan jikheun bungong keumee  
Ija bajee laju jimita

'Oh ban cukop ngui u asoe  
Jitren putroe ubak Bangta  
Putroe jitren u seuramoe  
Po sambinoe jak seumapa

Ban sare troh babah pinto  
Tadengo sye ngon suara  
Nibak jaroe putroe seudang  
Jitatang puan meucintra

Deungon ranup cit ka ase  
Hana peue le lon calitra  
Bungong jeumpa jroh that indah  
Geukeubah dalam ceurana

Masa dilee lon deungo gah  
Malam nyoe sah lon eu rupa  
Meunan nikheun si nyak putroe  
Deungo kamoe he kakanda

Puteh-puteh bungong murong  
Sret meukeupong a teueh donya  
Naneu keu noe teungku ampon  
Jak saweue lon adek hina

Kru seumangat po cut intan  
Lonpi saban hina dina  
Meunan neukheun Bangta Kumari  
Bak Siti nyang cidah rupa

Gata po cut ulon seuon  
Ateueh ubon bak jeumala  
Kamoe dua bagoe ie mbon  
Angen peutren dalam donya

Adat tatem tapeusayang  
Kamoe dagang ureueng hina  
Miseue daruet nyan beulalang  
Di teungoh blang mahajana

Kru seumangat putroe seuot  
He dalem cut Bangta muda

Na tadeungo dalem payong  
Siri gampong keu noe teuku

Neujak keu noe peue neu hajat  
Kheun beuteupat he kakanda  
Bangta seuot teuma meunoe  
Wahe adoe soe nan gata

Soe nan geuheu uleh ayah  
Beutapeugah he adekda  
Meunan tanyong Bangta indah  
Putroe peugah teuma sigra

Putroe seuot laju pantah  
Uroe 'Arafah lon geuboh geula  
Nyang ayah hei Din Syarifah  
Di ma lon sah Ti Bungong La

Dalem tanyong ka lon peugah  
Lon tanyong sah nan di gata  
Bangta seuot teuma meunoe  
Wahe adoe deungo hamba

Gampong jarak bek tatanyong  
Nanggroe Tunong jeuoh banda  
Lok jak keu noe he adek cut  
Lon meung jak beuet niet lam dada

Ngon troh keu noe hana meukri  
Lon Putroe Ti keunong deesya  
Meunan neukheun po samlakoe  
Teuma putroe tanyong sigra

Peue na deesya tuanku jroh  
Meuseunoh poh nyan geureuda  
Geureuda nyan saleh soe poh  
He putroe jroh ka jidawa

Putroe seuot teuma pantah  
Bah jipeugah po meukuta  
Peue na neukheun uleh ayah  
He deelat syah han peue mara

Tuanku dua nyang meupayah  
Peue lon balah jinoe guna  
Nyang meupatot he khalifah  
Badan lon sah neupeuhamba

Meunan patot ulon balah  
Keu upah neupoh geureuda  
Neutueng ulon namiet nyang sah  
Seuot pantah Bangta muda

Kru seumangat wahe intan  
Han patot nyan ban kheun gata  
Lonpi adek hamba Tuhan  
Saban-saban deungon gata

Lom jiseuot putroe canden  
Rumeh teukhem taeu muka  
Bek le panyang wahe dalem  
Neumeukawen deungon hamba

Han peue salah wahe adoe  
Tango kamoe tanglong donya  
Lon woe dilee he boh ate  
Teulangke ulon yue teuka

Ubak teungku ulonteu woe  
Wahe putroe cahya mata  
Teuma seuot Putroe Siti  
Beukong janji lon ngon gata

Di lon teungku han soe laen  
Hana lon tem he kakanda  
Deungon deelat lon meukawen  
Ri nyang neutem droneu dua

Seuot teuma Bangta Kumari  
He Putroe Ti bek le rugha  
Bek that sosah he boh ate  
Trok teulangke ubak gata

Meunan Bangta neumeuteuoh  
Uroe suboh ka cuaca

Si nyak putroe laju beudoh  
Cut putroe jroh eh lam kama

Hingga teuma beungoh uroe  
Ureueng nanggroe ka troh teuka  
Bandum jiba bungong jaroe  
Jibri jinoe keu Cut Bangta

Meunan neuyue raja nanggroe  
Bek le rugoe Rakna Bangta  
Nyang di wadi me sikatoe  
Nyang di meuntroe me sibara

Na sibuleuen jitren rakyat  
Areuta le that keu nan jiba  
Bandum ureueng tren bak deelat  
Jak horeumat Rakna Bangta

Sabab payah hana bagoe  
Neupoh nyoe inong geureuda  
Lagi areuta nyang ka rugoe  
Tagantoe talipat dua

Nam reutoh pangkai saboh roe  
Siribee jinoe taboh laba  
Bandum ase wahe rakan  
Siribee nam bak calitra

Sare cukop sikalian  
Raja yoh nyan neumeusabda  
Yoh nyan sabda raja nanggroe  
Tango kamoe he aneukda

Meunyo aneuk jadeh tawoe  
Saweue kamoe bijeh mata  
Beutaingat he aneuk jroh  
Bungong sijaloh lon ka tuha

Nyan pat guda na dua boh  
He aneuk jroh bak ayahda  
Laen aneuk han ek lon bri  
Ulon faki ureueng hina

Rakna Bangta seuot meunoe  
Areuta nyoe ho ulon ba  
Keu areuta hana sosah  
Meuna ayah lon nyang raja

Beuthat meunan he aneuk droe  
Ureueng nanggroe bri keu gata  
Peudieng dumpeue aneuk badan  
Sikalian atueuh guda

Teuma beudoh Bangta indah  
Ka neuseumbah poteu raja  
Idin tuanku lon meulangkah  
Han peue salah seuot raja

Teuma Bangta neubeurangkat  
Ngon guda brat sajan dua  
Ngon gogasi neuba sajan  
Sampoe tuan bak ulama

Ulama kheun tanyong meunoe  
Pane dum nyoe wahe Bangta  
Pane guda nyan dua boh  
Lon eu peunoh dum areuta

Neupeugah le po Bangta jroh  
Upah poh cicem geureuda  
Abeh bandum neupeugah proe  
Ka neuiem droe teungku ulama

Hingga teuma haba nyang toe  
Teutap sinoe Bangta dua  
Bak ulama neuduek jinoe  
Neumeurunoe dum peukara

Padum lawet Bangta sinan  
Gogasi nyan neuboh nama  
Nan nyang tuha Silasiman  
Nyang adoe nyan Silanaga

Rayek laju deungon badan  
Meusambot nan deungon rupa

Padum lawet teutap sinan  
Silasiman Silanaga

Ubak teungku jibeuet sinan  
Bandua nyan malem raya  
Rayek laju bandua droe  
Lagee beusoe kreueh uram pha

Sibak bak u ek jigulam  
Salang badan goh lom raya  
'Oh rayek jih saleh pakri  
Ek jiungki gunong raya

Puteh-puteh bungong panjoe  
Angen tampoe hana reuda  
Amma bakdu teuma dudoe  
Po samlakoe kheundak bungka

Neukeumeung jak laen nanggroe  
Bandua droe ngon syeedara  
'Oh lheueh idin teungku syiah  
Neutren pantah le bandua

Silasiman ate sosah  
Bangta indah keumeung bungka  
Silanagapi ka jimoe  
Neuba kamoe po meukuta

Bangta neukheun teuma meunoe  
Bek le tamoe adoe raja  
Tinggai gata dilee siat  
Han trep lambat ulon gisa

Bek that sosah kamoe meujak  
Nyan meuh pirak hukom gata  
Bangta cok le limong katoe  
Neubri jinoe le bandua

Keu beulanjajih dua droe  
Laen keudroe nyan neubawa  
Laen nibak nyan neume keudroe  
Neujak woe dilee bak raja

Neujak ubak Batukiah  
Neujak peugah keumeung bungka  
Na sikhan rot neucok langkah  
Ulon peugah putroe muda

Nyoe lon seobot Din Syarifah  
Deungon ayah jimeuhaba  
Putroe tanyong ubak ayah  
Jipeugah keu Bangta dua

Wahe deelat du meutuah  
Bangta indah saleh ho ka  
'Oh lheueh sinoe dilee neutren  
Teungku lem hana neugisa

Ulon ngon soe neupeukawen  
Ureueng laen han lon rela  
Meusoe laen he du payong  
Hareuem di lon tuboh nyawa

Meukon gop nyan di lon lakoe  
Lon duek keudroe bahle tuha  
Han lon rela baranggasoe  
Judo kamoe Bangta dua

Meunan jikheun si nyak putroe  
Bak ayah droe raja raya  
Teungoh putroe jiseumeugah  
Ka troh langkah Rakna Bangta

'Oh ban jieu le cut indah  
Jiseumbah bak teuot lanja  
Bangta sambot laju pantah  
Beumeutuah he adekda

Lheueh nyan Bangta neujak bagah  
Neuseunbah bak teuot raja  
Lheueh nibak nyan Bangta indah  
Ka neupeugah hajat bungka

Neubri idin he deelat syah  
Ulon leupah sikutika

Raja tanyong hobu langkah  
He meuh mirah ho tahala

Neutanyong le pajan tawoe  
Jeh pat adoe lam istana  
Meunyo tan le gata sinoe  
Si nyak putroe pungo gila

Meunan neukheun uleh doli  
Bangta Kumari seuot sigra  
Ampon deelat bawah doli  
Akan teutapi han troh juga

Meuna tulong nibak Rabbi  
Han trep lawi ulon gisa  
Ban jideungo le Putroe Ti  
Ka jikheun le ubak raja

Wahe deelat payong nanggroe  
Deungo kamoe he du raja  
Cut bang neujak bak uroe nyoe  
Pakri kamoe sajan neuba

Nyan he ayah ulon teuntee  
Cut bang dilee likot hamba  
Ulon sajan seutot langkah  
Wahe ayah idin gata

Meunyo goh lom neumeunikah  
Hana leupah cut neubungka  
Gatib mantongpi ulon tem  
Meunyo cut lem khundak bungka

Meukon meunan han lon bri jak  
Bek sitapak cre ngon hamba  
Ho nyang neujak lon beusajan  
He du badan deungo hamba

Sabab gop ryan sangat lon syen  
Payah dalem poh geureuda  
Nyankeu he du tanda lon syen  
Neupeukawen deungon hamba

Meukon meunan he ayah droe  
Peukeu jinoe balah guna  
'Oh lheueh kawen teuma dudoe  
Boh neupeubloe le kakanda

Meunan jikheun Din Syarifah  
Putroe indah aneuk raja  
ngon ie mata peunoh limpah  
Din Syarifah jimoe rugha

Rakna Bangta ate sosah  
Marit pantah poteu raja  
Wahe aneuk po samlakoe  
Pakri jinoe nyang meurasa

Ka tadeungo narit putroe  
He samlakoe Bangta muda  
Meukon aneuk tameunikah  
Han leupah aneuk tabungka

Meunan neukheun Batukiah  
Ka sosah lam ate Bangta  
Alah pakon roh tapeugah  
Bukon teulah silagoina

Rakna Bangta marit pantah  
Ka neupeugah bak syeedara  
Jinoe cut bang gatib mantong  
Bek le tadong nak tabungka

Rakna Bangta marit keunong  
Neutanyong bak raja raya  
He tuanku ngo lon peugah  
'Oh lheueh nikah kamoe bungka

Raja seuot han peue salah  
Meusyarat sah jeumba gata

Beudoh raja teuma laju  
Neuyue jak eu teungku peundita

Na limong droe ka troh teungku  
Gatib laju putroe muda  
Bangta Sawang geupeunikah  
Ngon bismillah phon neumula

Yoh nyan neukheun teungku syiah  
Lon peunikah Bangta muda  
Deungon Putroe Din Syarifah  
Ngon wakilah nibak raja

Bangta Sawang seuot pantah  
Insya Allah lon teurima  
'Oh sare lheueh neupeunikah  
Teungku syiah baca do'a

'Oh lheueh do'a rahop jaroe  
Teuma neuwoe teungku peundita  
Lheueh nibak nyan wahe adoe  
Samlakoe laju neubungka

Abeh teukhem bandum ureueng  
Gatib puntong putroe raya  
Putroe gatib mantong-mantong  
Keu tanda kong judo Bangta

Ureueng bandum jemeusah-sah  
Jipeugah putroe ka raya  
Meunan-meunan dum jipeugah  
Bangta leupah laju bungka

Bangta Sawang neujalk laju  
Deungon Teungku Rakna Bangta  
Bak Tuhan neumohon bantu  
Ya Tuhanku tulong hamba

Dua Bangta bungka laju  
Sayang taeu aneuk raja  
Neuek sampan adoe teungku  
Bungka laju ureueng dua

Padum lawet peulayaran  
Troh sampan u nanggroe raja  
Troh bak nanggroe nan Hindustan  
Tamong keu nan u kuala

Bangta teungoh laju yoh nyan  
Bri numpangan keu nahuda  
Neujak laju wahe teelan  
Troh u peukan nanggroe raja

Nyankeu nanggroe nan Hindustan  
Raja sinan Sakda Lila  
Nama geuheu Raja Sakdan  
Bak nanggroe nyan meukeumala

Raja neuaneukpi na sidroe  
Raja na<sup>n</sup>ggroe meugah raya  
Ureueng binoe that juhari  
Nan geurasi Rakna Keumala

Kulet puteh jroh han sakri  
Aneuk Cutti Lela Indra  
Rakna Bangta ka troh keu nan  
Bak peukan nyan ngon syeedara

Ureueng dua akai ragoe  
Neupeutoe bak ureueng tuha  
Ureueng tuha neueu sidroe  
Tanyong jinoe dum peukara

'Oh troh keu nan neukheun meunoe  
Meuah kamoe wahe duha  
'Oh lheueh saleuem meumat jaroe  
Tanyong meunoe Bangta muda

Soe nan raja lam nanggroe nyoe  
Kheun bak kamoe wahe kuya  
Ureueng tuha seuot meunoe  
Tango kamoe bijeh mata

Nama raja na taturi  
Nan geurasi Sakdan Lila

Judo raja Pütroe Siti  
Nan geurasi Lela Indra

Aneuk sidroe that juhari  
Nan geurasi Rakna Keumala  
Rupa jroh that Cut Putroe Ti  
Ngon umupi mantong dara

Deungon peukan hana jarak  
Beukit tajak ubak raja  
Beukit tajak aneuk teungku  
'Oh watee bu troh tagisa

Abeh dumpeue geupeugah proe  
Teuma geuwoe ureueng tuha  
Rakna Bangta hana laloe  
Mita jinoe keude siwa

'Oh meuteumeung wahe adoe  
Neuduek sinoe Bangta dua  
Bandua ngon Bangta Sawang  
Neuduek sinan dalam banda

Na sibuleuen neuduek sinan  
Hana jalan nyang meulaba  
Beungoh seupot neupajoh bu  
Han sigeutu hareukat na

Hana teuka beulanjaan  
Tohkeu jalan he kakanda  
Rakna Bangta ka teupike  
Dalam ate leumah keunira

Teuma neukheun bak cut abang  
Siri jalan nyang meulaba  
Yoh nyan seuot Bangta Sawang  
Ban nyang reumbang nibak gata

Rakna Bangta neupeugah le  
Lem boh ate deungo hamba  
Jinoe dalem tameupande  
Meunan pike lon kakanda

Bangta Sawang seuot pantah  
Han peue salah he adekda  
Meunyo meunan nyak meutuah  
Palee landah tajak mita

Meuna alat adek badan  
Sikalian ase pinta  
Landah palee tan meusaket  
Ngon siat sep tajak mita

Teuma geubloe dum peukakah  
Palee landah alat dumna  
Abeh cukop dumpeue ase  
Alat pande Bangta muda

Jipande meuh deungon pirak  
Peue nyang galak gleueng suasa  
Rakna Bangta sangat utoh  
Ie seuneupoh that meucayha

Uroe malam hana teudoh  
Teungku utoh neukeurija  
Hingga meugah ho-ho laen  
Puteh licen utoh lagoina

Bak peugot meuh deungon euncien  
Dan laen unggah deurama  
Peugot euntuek deungon peundeng  
Nyang laen euncien peurmata

Peuneugot jroh haloh licen  
Bungong usen utoh raya  
Peugot ikai deungon subang  
Dum sibarang han ek kira

Peugot ganceng mata intan  
Sikalian jeuet keurija  
Bangta dua that juhari  
Bak meupande hana nyang sa

Sigala dum peuriasan  
Na di sinan nibak Bangta

Peuneugot jroh hana lawan  
Ureueng pandang ate suka

Bangta Sawang Bangta Kumari  
Aneuk doli raja raya  
Bak meupande that juhari  
'Oh noe lanti siat haba

Jinoe laen ulon rawi  
Deungo akhi bek le kubra  
Amma bakdu wahe teelan  
Raja Sakdan lon calitra

Nama nanggroe nyan Hindustan  
Lila sakdan nama raja  
Keurajeuen luah hana macam  
Ade juhan hana tara

Aneuk sidroe that analan  
Geurasi nan Rakna Keumala  
Nyankeu putroe that juhari  
Aneuk Cutti Lela Indra

Lela Indra nama umi  
Judo doli Sakdan Lila  
Raja kalon aneuk cidah  
Rakyat neukrah dalam donya

'Oh troh keu nan dum barollah  
Suroh titah nibak raja  
Neuyue peugot saboh meuligoe  
Keu Cut Putroe Rakna Keumala

Neuhei utoh dum sinaroe  
Peugot jinoe laju sigra  
Ladom jak koh kayee jatoe  
Jigogajoe papeuen sigra

Le that rakyat teungoh u gle  
Koh meurante meudang ara  
Padum na trep sinan lam gle  
Jipeuwpe le teuma sigra

Kayee ase ka jipeuwoe  
Utoh jinoe jak keurija  
Jipeugot saboh meuligoe  
Keu Putroe Rakna Keumala

Padum na trep teuma dudoe  
Lheueh meuligoe putroe muda  
'Oh ban teudong han peue teuoh  
Ureueng kheun jroh silagoina

Rupa indah hana sakri  
Cawareudi geuboh lingka  
Bak ceureumen leukek meunari  
Bak peuneupi cicem pala

Bue meuanjak nibak binteh  
Jimeueh-eh saleuek rupa  
Han peue panyang ulon tuleh  
Cidah abeh hana ngon sa

Lheueh meuligoe geukhanduri  
Teuma lagi geubeuet do'a  
Keu nan neuwoe Putroe Siti  
Nyang juhari Rakna Keumala

Ngon dendayang teuma geubri  
Tari-tari lagi muda  
Khadam putroe aneuk doli  
Nyang juhari Rakna Keumala

Muda-muda sama sikali  
Khadam Cutti aneuk raja  
Meugleueng jaroe meugleueng gaki  
Dan lagi subang meucintra

Nyang leubeh jroh ngon beurani  
Putroe Ti Rakna Keumala  
Ngon dendayang lhee seun tujoh  
Sampoh reuoh putroe muda

Meunan sabe he adoe beh  
Puteh leusoh ate suka  
Lam ibadat hana teudoh  
Cit that sunggoh bak agama

Bak ibadat that tawajoh  
Quruan lhee ploh afai dumna  
Padum lawet teuma dudoe  
Meugah putroe jeuep-jeuep donya

Meugah rupa that sambinoe  
Si nyak Putroe Rakna Keumala  
Trok teulangke geunap uroe  
Aneuk meuntroe aneuk panglima

Aneuk keujruen kadi nanggroe  
Sibarang proe aneuk bentara  
Aneuk raja laen nanggroe  
Si nyak putroe le soe hawa

Hana jitem baranggasoe  
Cut Putroe Rakna Keumala  
Aneuk raja dum sinaroe  
Nyang mat nanggroe luah raya

Hana neutueng baranggasoe  
Si nyak putroe hana rela  
Dawok neubeuet sinan keudroe  
Geunap uroe neupuasa

Ngon dendayang dum sinaroe  
Sajan putroe aneuk raja  
Han tom jarak meusiuroe  
Ngon Putroe Rakna Keumala

Padum lawet meunan sabe  
Hana tom cre meusideupa  
Teukeudi Po Rabbon Kade  
Ngo boh ate lon calitra

Bak siuroe dendayang jak  
Suroh cut nyak jak bloe sutra  
Troh u peukan keu deh jijak  
Jipeutoe bak keude Bangta

Jieu barang meuh ngon pirak  
That lagak subang meucintra  
Subang euncien hu meubhak-bhak  
Laen he nyak gleueng suasa

Cukop barang dumpeue bagoe  
Bansinaroe jroh that rupa  
Jieu utoh teuma dudoe  
Bandua droe muda-muda

Rupa jroh that hana bagoe  
Tamse uroe cahya muka  
Di dendayang hireuen laloe  
Jieu bagoe ureueng dua

'Oh lheueh jieu laju jiwoe  
Bak Putroe Rakna Keumala  
Ban sare troh u meuligoe  
Jihei putroe sigra-sigra

Ho saleh ka po cut ampon  
Cot ma ubon lam istana  
Teuma seot putik sukcon  
Nyoe pat ulon wahe cutda

Jiek laju u meuligoe  
Jikheun meunoe Siti Jeumpa  
Ka jipeugah dum sinaroe  
Tango kamoe tanglong donya

Bunoe ulon troh u peukan  
Lon kalon nyan po cut raja  
Lon eu pande that analan  
Utoh han ban bak teumeumpa

Jipeugot gleueng bayek-bayek  
Euncien gitek meuh suasa

'Oh takalon that meunarek  
Jroh lagoe ek hana nyang sa

Rupapi jroh bungong rubek  
That ceureudek lagi muda  
U meuligoe tajeuet peuek  
Patot adek judo gata

Meunan po cut 'oh lon tilek  
He adek Rakna Keumala  
Beukit po cut hana bayek  
Lon neuculek aneuk mata

Abeh dumpeue ulon.tilek  
Ceureudek hana saboh sa  
Teuma seuot putroe cantek  
Bit that lisek gata cutda

Tapeugah keunong lagoe ek  
Miseue itek langue paya  
Han sigeutu na meubalek  
Jilangue ek ho nyang hawa

Narit gata sang meubalek  
Taci adek wahe cutda  
Han tapateh po cut ampon  
Jak ngon ulon taeu rupa

Neujak po cut kalon jinoe  
Sulet kamoe bah neusula  
Meunyo hana ban lon peugah  
Neuplah babah culek mata

Lon neupeubloe jinoe beusah  
Meunyo salah deungan gata  
Seuot putroe teuma pantah  
Lon meulangkah kalon rupa

Meunyo beungeh teuma ayah  
Tapeugah tajak bloe sutra  
Meunoe jikheun putroe indah  
Deungan ayah jeuet hai cutda

Jinoe nyang pueh bak lon pike  
Deungon pande pakri daya  
Jak han meuho buet han meuban  
Siri padan toh bicara

Dendayang lom teuma peugah  
Bek that sosah he Cut Rakna  
Beutame meuh deungon pirak  
Singoh tajak po cut raja

Neuyue peugot peue nyang galak  
Taloe sikrak gleueng teuputa  
Teuma seuot putroe rancak  
Bit nyo hai kak ban kheun gata

Singoh uroe jadéh lon jak  
Keunong sigak padan gata  
Teuduek haba putroe bijak  
Meuriwang bak Rakna Bangta

Rakna Bangta lon hareutoe  
Tango adoe dum beurata  
Bak malam nyan wahe adoe  
Leumah lumpoe Bangta muda

Neulumpoe bungong saboh tangke  
Jroh han sabe indah rupa  
Bakjih sibak bungong saboh  
Rupa that jroh hana tara

Rakna Bangta bungong neupot  
Sabab got galak di mata  
Ban troh bungong ubak jaroe  
Teuka sidroe manusia

Cok tangkulok Bangta seudang  
Jime rijang hana haba  
Rakna Bangta sangat malee  
Tan jilakee yoh jihila

Meunan leumah dalam lumpoe  
Po samlakoe teuma jaga

'Oh ban jaga wahe adoe  
Beungoh uroe ka cuaca

Bangta beudoh ulee mumang  
Tahe mandang hana haba  
Neuingat le makna lumpoe  
Po samlakoe ate rugha

Hana sapat Bangta peugah  
Ate sosah hana tara  
Ubak Tuhan neupeugah droe  
Samlakoe cut Rakna Bangta

Allah Tuhan Po Nyang Ghani  
Saleh pakri lumpoe hamba  
Teuduek haba Bangta Kumari  
Laen lagi lon calitra

Rakna Keumala ate sosah  
Meuwoe kisah Rakna Keumala  
'Oh ban beungoh le ngon uroe  
Beudoh putroe jak srah muka

Putroe marit ngon dendayang  
Cok peukayan wahe cutda  
Jinoe tangui gleueng ngon subang  
Sawak pinggang nyang jroh rupa

Mangat tajak cutda badan  
U peukan tajak eu banda  
Meunan narit putroe intan  
Keunong padan tuha muda

Baranggasoe hana lawan  
Cut intan Rakna Keumala  
Jiyue meungui dum dendayang  
Seudang-seudang hana ngon sa

Nejok ija sawak pinggang  
Keu dendayang yue ngui sigra  
Teuma laen dum sibarang  
Sawek subang meuh suasa

Subang meuh mata itek  
Laen adek han peue kira  
Baranggasoe 'oh jitilek  
Meunarek ate lam dada

'Oh lheueh meungui putroe indah  
Jijak peugah bak ayahda  
Neubri idin wahe ayah  
Lon meulangkah jak bloe sutra

Raja seuot han peue salah  
He meutuah cahya mata  
'Oh lheueh idin nibak ayah  
Putroe indah laju gisa

Putroe peugah bak dendayang  
Beudoh rijang jak udeh ta  
Ka jitren le jijak rijang  
Dendayang ngon putroe muda

Tujoh droe bandum dendayang  
Jeuet lapan ngoa putroe muda  
Putroe jijak taloe ateueng  
Jikeuting gleueng Rakna Keumala

Gleueng suasa uleejih meuh  
Taeu peungeuh jiplueng cahya  
Dendayang tujoh jijak sajan  
Cut intan Rakna Keumala

Putroe jijak hana lale  
Troh bak keude Rakna Bangta  
Rakna Bangta dalam keude  
Bungong seuke neungieng teuka

'Oh ban leumah putroe canden  
Puteh licen tanyong sigra  
Neutanyong bak ureueng laen  
Bungong usen lisek raya

Wahe teungku deungo kamoe  
Soe ureueng nyoe keu noe teuka

Ureueng laen seuot meunoe  
Nyankeu putroe aneuk raja

Ngon dendayang dum sinaroe  
Nyankeu Putroe Rakna Keumala  
Bangta deungo geukheun putroe  
Ban sare toe ka neusapa

Nateu keu noe po cut ampon  
Ka troh bak lon adoe raja  
Nabu kamoe teungku utoh  
Neubri bungkoh uleh Bangta

Sideh puan sinoe bungkoh  
Duek cut haloh rab ngon raja  
Putroe kalon Bangta cidah  
Teuhah babah Rakna Keumala

Tuan putroe yoh nyan tahe  
Neungieng Teungku Rakna Bangta  
Bangta kalon putroe tahe  
Dara baro peue tamita

Meunan tanyong Bangta seudang  
Peue tapandang he adekda  
Tuan putroe seuot rijang  
Teungeut lon sang dalem raja

Sang neupeugoe lon rab reubah  
Allah Allah po meukuta  
Teuma putroe mata layoh  
Jingieng utoh jroh that rupa

Sangka jiboh dalam reugam  
Putroe ajam aneuk raja  
Ureueng laen bandum wawoe  
Jieu Putroe Rakna Keumala

Bak seumudi nyan dum jipeutoe  
Jijak meubloe pura-pura  
Bek leumah ri jak eu putroe  
Pura jak bloe gleueng suasa

Meunan-meunan dum he adoe  
Ateueh putroe keu nan mata  
Ladom pura jak bloe euncien  
Maseng-maseng le bicara

'Oh troh keu nan kon peue laen  
Putroe canden jieu rupa  
Le that ureueng keu nan jijak  
Meusak-sak bak keude Bangta

Pura bloe nyoe pura bloe jeh  
Bak cut puteh keu nan mata  
Bahkeu dumnan ulon tuleh  
Han ek abeh lon calitra

Ulon peugah meusilapeh  
Han ek abeh panyang raya  
Ulon peugah tuan putroe  
Ngon samlakoe Bangta muda

Meusapat leukat deungon jatoe  
Putroe-putroe Bangta-Bangta  
Phon lon seobot bak seumagah  
Putroe indah Rakna Keumala

Yoh nyan marit putroe cidah  
Jikheun pantah ubak raja  
Wahe dalem deungo kamoe  
Pajan keu noe po meukuta

Jeh 'oh lawet teuka keu noe  
Bak uroe nyoe lon ngieng mata  
Udeh dalem tamong bak lon  
U gampong he dalem raja

Bangta seuot he cut ubon  
Tango ulon putroe muda  
Pakri lon jak bungong sukon  
Soe turi lon ureueng hina

Kru seumangat teungku ampon  
Nibak ulon that mulia

Meunyo meunan buleuen peunoh  
Malam singoh ulon teuka

Watee seupot ulon langkah  
Cut indah keu deh bak gata  
Meunan neukheun Bangta Kumari  
Seuot Siti Rakna Keumala

Bek han neujak wahe doli  
Ubak kami ureueng hina  
Meuhan neujak dalem teungku  
Lon pajoh bu han meurasa

Bangta seuot insya Allah  
Lon meulangkah ubak gata  
Bangta marit deungon putroe  
Bandua droe han that raya

Han jideungo baranggasoe  
Marit putroe deungon Bangta  
Banta seuot ngon isyarah  
Putroe indah tupeue basa

Nyang na taeu leungo bibi  
Dan lagi leungo keupala  
Ureueng laen han jitukri  
Marit Cutti deungon Bangta

Keumah pakat dum sinaroe  
Neulakee droe putroe muda  
Teuma jiwoe putroe indah  
Ubak ayah dujih raja

Ngon dendayang jiwoe laju  
Troh u leupu rumoh raya  
Si nyak putroe ate rindu  
'Oh lheueh jieu Bangta muda

Han le mangat jipajoh bu  
'Oh lheueh teungku jieu rupa  
Jimeulakee bak Tuhanku  
Beujeuet judo deungon Bangta

Nyang utoh totok beuragoe  
Jigeurudoe kayee dumna  
Teiduek siat si nyak putroe  
Lon hareutoe Bangta muda

'Oh ban leupah jiwoe putroe  
Po samlakoe ate rugha  
Bangta Kumari ate wawoe  
Ingam Putroe Rakna Keumala

Hana jeuet le neumeupande  
Sosah ate hana tara  
Keu cut putroe ingat sabé  
Dalam ate hana lupa

Hingga malam le ngon uroe  
Po samlakoe ate rugha  
Bu neupajoh sang-sang duroe  
Teugoe-goe ate lam dada

Ulee mumang eh han teungeut  
Sang putroe cut nyum di mata  
Sang-sang jiduek di geunireng  
Jikeureuleng atueh Bangta

Mat di jaroe kipah gadeng  
Cut linteng galak meuseunda  
Rakna Bangta teuma pandang  
Cut bintang hana meuho ka

Teuma neueh lom neuiem droe  
Leumah putroe lom di mata  
Sang-sang jimat nibak jaroe  
Beudoh ja k woe po meukuta

'Oh ban neungieng han le meuho  
Sosah he po hana tara  
Teuma Bangta beudoh rijang  
Deungon cut bang peugah haba

Neukheun ubak Bangta Sawang  
He cut abang deungo hamba

Nyoe lon peugah ube seunang  
Bek neusagang he kakanda

Ubak putroe lon jak siat  
Hana lambat ulon gisa  
Teuma seuot Bangta Sawang  
Neukheun rijang bak adekda

Adat tajak bek that lambat  
Beuingat that adek raja  
Lon keumeung tham gata adoe  
Deungon kamoe lisek gata

Meunan neukheun Bangta Sawang  
Beudoh rijang Rakna Bangta  
Me ngon bungkoh tapak cato  
Ateueh baho peudeueng raya

Bangta meungui bangon linto  
Puteh hijo ija sutra  
Neujak laju Bangta Kumari  
Bak Siti Rakna Keumala

Dendayang eh di seuramoe  
Cut putroe dalam istana  
Goh lom teungeut nyan sinaroe  
Jih tujoh droe mantong jaga  
Rakna Bangta beuet hekeumat  
Teungeut mangat bandum rata  
Nyang har teungeut putroe seudang  
Dendayang miseue ka fana

Neukek laju po samlakoe  
Sang judo droe meunan rupa  
Tan neusidek ngon neutanyong  
Rumoh inong ka troh Bangta

'Oh ban jieu le putroe cut  
Bak teuot jiseumbah lanja  
Bak seumeumah tuan putroe  
Saban ragoe leukek bangguna

Na miseue leuek nyang ka ragoe  
Geunap uroe jitem kua  
'Oh lheueh seumbah han peue pike  
Jicok bate putroe muda

Jicok ranup jikoh tangke  
Jipasoe le lam ceurana  
Bungong lawangpi ka ase  
Lom gambe bakong Manila

Lom jeumuju han peue pike  
Ka ase deungon boh pala  
Gapu naga han peue peugah  
Putroe indah jok keu Bangta

Sira jijok jikheun pantah  
Putroe indah jiseumapa  
Bukon jroh that taeu sukong  
Barangjan thon aneukjih na

Bukon jroh that titek ie mbon  
Keu noe jitren di antara  
Lon meukalam teungku ampon  
Malam nyoe phon he meukuta

Ie di laot meugulung-gulung  
Jimeulampong aneuk kadra  
Nateu keu noe deelat ampon  
Jak saweue lon ureueng hina

Seuot Bangta su meualon  
Akhe ngon phon mameh raya  
Kru seumangat po cut ampon  
Ulon seuon di jeumala

Kamoe titek bagoe ie mbon  
Angen peutren troh bak gata  
Teuma marit si nyak putroe  
Beuet jaroe di jeumala

Nyoe tuanku ranup jatoe  
Jiek keudroe u cong buga  
Kon lon pula deungon jaroe  
Jiek keudroe po meukuta

Bek neupeugah bak barang soé  
Malee kamoe adek hina  
Kru seumangat wahe putroe  
Nibak kamoe that mulia

Nibak gata na cit dumnoe  
Bak lon adoe han sapeue na  
Nyoe pat nyang na ranup layee  
Peureudee jeuoh lagoina

Nyang jeuet po cut ulon lakee  
Pangkai padée lon adekda  
Bek takheun-kheun bungong keumee  
Bek jithee le ureueng donya

Tango pu cut nyang jeuet layee  
Lon lakee sideh baroe sa  
Kru seumangat putroe seuot  
Bek ceumarot po meukuta

Di tuanku neutem lakee  
Jibri teuntee teuma sigra  
Di lon teungku lon peuteuntee  
Peng sisukepi han tom na

Teungku ampon neudeungo nyoe  
Riyeue jinoepi han ek na  
Ringget dileepi han jibri  
Lon cuba ci po meukuta

Bangta seuot kru seumangat  
Puteh lumat lon meuseunda  
Bek kheun meunan po cut ampon  
Tacarot lon di keue mata

Tuan putroe sangat lisek  
That ceureudek Rakna Bangta

Rakna Bangta teuma sidek  
Tango adek narit hamba

Neutanyong le nama putroe  
Po samlakoe le bicara  
Rakna Bagnta ka neutusoe  
Neutanyong proe pura-pura

Wahe adek nyang juhari  
Soe geurasi nama gata  
Teuma seuot Putroe Siti  
Narit doli Rakna Bangta

Deungo dalem ulon peugah  
Bak Po tallah bek meudeesya  
Ube seunang he deelat syah  
Bek beurakah deungon seunda

Ma lon meuhei uroe Seunayan  
Du geuboh nan uroe Seulasa  
Di ma neuhei Siti Sanan  
Ayah boh nan Rakna Keumala

Meunan jikheun putroe indah  
Teuhah babah Rakna Bangta  
Tuan putroe tanyong balah  
Cuba peugah nyang di gata

Rakna Bangta ka teupike  
Dalam ate kira-mira  
Nyoepi utoh deungon cidah  
Bandua blah sama juga

Meunoe neukheun ubak putroe  
Wahe adoe deungo hamba  
Nyoe lon peugah wahe adoe  
Nak tatusoe nan kakanda

Teutapi lon hana lisek  
Tan ceureudek lagee gata  
Ma boh nan lon buleuen Haji  
He Putroe Ti Rakna Keumala

Sibuleuen lheueng teuma lagi  
Ayah rasi buleuen Safa  
Di ma geuheu Bangta Kumari  
Du geurasi Rakna Bangta

Meunan neukheun Bangta sidi  
Tahe Cutti Rakna Keumala  
Hana tuto bungong rubek  
Putroe cantek iem droe saja

Bandua droe that ceureudek  
Saban lisek deungon Bangta  
Tuan putroe lom teumanyong  
Cut bungong laju pareksa

Na neudeungo dalem payong  
Siri gampong nanggroe gata  
Banta seuot laju pantah  
Ngo lon peugah he adekda

Duson Yaman nan teupeugah  
He cut indah Rakna Keumala  
Nanggroe ulon ka tatanyong  
He cut bungong tajak gata

Gampong ulon jarak tunong  
Lungkiek gunong raya-ray  
Putroe deungo narit meunan  
Neukheun yoh nyan di nap mata

teuma jikheun syae panton  
Su meualon sang biula  
Leukek bangguna dong di cong u  
Jimeusu jiboh guk dua

'Oh tadeungo ate rindu  
Bak jikutru leupah gura  
Neuboh gampong tinggai ma ku  
Peue he teungku neujak mita

Meunan jikheun bungong meulu  
Seuot Teungku Rakna Bangta

Bek he putroe tameupanton  
Hana jeuet lon malam jula

Teuma seuot nyak putroe cut  
Bek kheun han jeuet po meukuta  
Bangta seuot pakon han jeuet  
He putroe cut meusikada

Adat meujeuet teungku ampon  
Cuba ngon lon gadoh bisa  
Meunan jikheun bungong pade  
Ka teupike Rakna Bangta

Jinoe bahle ulon seuot  
Ban nyang patot meusikada  
Tadeungo he po cut putroe  
Lon kheun jinoe pura-pura

Nyang puteh breueh pade meulu  
Nyang mangat bu pade aga  
Lon boh gampong tinggai ma ku  
Ate tunu bungong jeumpa

Raya hajat han peue tanyong  
Abeh nyawong napsu hawa  
Boh pisang klat makeuen budak  
Ulon hai nyak bek takira

Laot Silah riyeuke meu'u-'u  
Jimeusu lon sangka naga  
Malam hari ate tunu  
Lon pajoh bu han meurasa

Di langet bintang meutabu  
Soe nyang eu seumilu mata  
Meunyo goh lom troh ban napsu  
Barat Timu lon jak mita

Meunan neukheun po samlakoe  
Seuot Putroe Rakna Keumala  
Puteh-puteh bungong meulu  
Meujampu bungong keupula

Peue he cut bang neumeunapsu  
Peugah teungku lon jak mita  
Boh sukon tamakeuen ngon u  
Boh labu lawanjih saka

Nyoe peugah lon wahe teungku  
Nyang teumon bu eungkot raya  
Cuba dalem jinoe peugah  
Lon suleuan lon usaha

Meunan jikheun putroe cidah  
Seuot pantah Rakna Bangta  
Ie mawo lon sangka arak  
Meuhayak-hayak lam piala

Lam sejrahi meuhayak-hayak  
Nyan miseue bak cut abang gata  
Meunan neukheun po samlakoe  
Beudoh jinoe keumeung jak tren

Pura-pura peubeungeh droe  
Po samlakoe puteh licen  
Muka pucat sang keululu  
Han jeuet taeu bintang canden

Neupura tren pantah rijang  
Putroe peugang mat di kayen  
Jicok bungkoh Bangta Kumari  
Le Cutti nyang puteh licen

Jicok le Rakna Keumala  
Bungkoh sutra rupa canden  
Bungkoh jroh that rupa ie meuh  
Takalon deuh haloh licen

Bangta lakee han jipulang  
Cut meusubang ate ngeuren  
Teuma neukheun Rkana Bangta  
Bek meuseunda bintang canden

Bek meuayang puteh lumat  
Hana mangat ate po lem

He adek cut po sambinoe  
Taba keu noe pulang kayen

Wahe putroe tadeungo nyoe  
Ulonteu nyoe pura jak tren  
Pajoh ranup bungkoh pulang  
Bek meujantang puteh licen

Bek he adek bungkoh tacok  
Gop teujalok watee lon tren  
'Oh ulon woe bungkoh tan le  
Ulon mate puteh licen

Aneuk rambideuen umpeuenjin bang-bang  
Daruet beulalang umpeuen cempala  
Ranup pajoh bungkoh pulang  
Bek le wayang malam jula

Meunan neukheun Bangta seudang  
Seuot bintang Rakna Keumala  
Leuek bangguna di cong meudang  
Siwah datang keu nan teuka

Hana tuanku lon meuayang  
Nyang na cut bang lon meuseunda  
Pakon beungeh tuanku ampon  
Neukheun keu lon han neukira

Neusrom ulon deungon bajoe  
Ulon srom droe deungon nuga  
Beukit neudrom deungon tumpoe  
Ulon srom droe deungon bada

Neubri keu lon ija Bumboe  
Lon bri keu droe ija sutra  
Meunan jikheun si nyak putroe  
Teukhem jinoe Rakna Bangta

Neumeututo deungon putroe  
Beungoh uroe ka cuaca  
Neutren Bangta laju neuwoe  
Tinggai putroe lam istana

Rakna Bangta teuduek 'oh noe  
Tuan putroe lon calitra  
Hingga seupot le ngon uroe  
Neukheun meunoe putroe muda

Takeubah bu saboh idang  
Euntrek malam deuekku raya  
Beuklam deuek lon he dendayang  
Salang-salang lon jak raba

Peudeh ate lon han macam  
Ka lhee malam watee jula  
Meunan neukheun putroe sedang  
Bak dendayang neusom basa

Lon peugoe gata teungoh malam  
Meusidroe han jitem jaga  
Meunan neukheun putroe seudang  
Bak dendayang neusom basa

Kheun dendayang teuma meunoe  
Teungeut kamoe hana tara  
Jikeubak bu teuma jinoe  
Ban yue putroe han meutuka

'Oh lheueh 'isya uroe malam  
Bangta seudang keu nan teuka  
Ngon hekeumat neubeuet rijang  
Dendayang teungeut lagoina

Bangta neukek u meuligoe  
Ubak Putroe Rakna Keumala  
'Oh ban jie uleh putroe  
Seumbah jinoe teuot Bangta

Lheueh jiseumbah han peue pike  
Jijok bate nyang jroh rupa  
Lheueh nyan beudoh bungong pade  
Jicok le dalong suasa

Jiboh laju bu lam idang  
Putroe intan utoh raya

Lam cawan lhok jiboh gule  
Cawan lande jiboh sira

Saboh cawan gule leumak  
Buet Si Nyak Rakna Keumala  
Dalam.cipe adoe teungku  
Sie teubalu han ek kira

Cawan mirah eungkot reundang  
Lam cawan plang eungkot peuda  
Saboh cipe boh itek jruek  
Jipeuduek boh manok dua

Saboh cawan eungkot tok-tok  
Eungkot bagok udeueng tima  
Meuna taeu roh bak tacok  
Teuka harok sabab hawa

Sangat utoh si nyak putroe  
Le that bagoe jipeurupa  
Ase idang ka jipasoe  
Jibet jinoe.keu Cut Bangta

Teuma jikheun uleh putroe  
Neusrah jaroe dalem raja  
Tabeue masen bak neukheun-kheun  
Ulon maguen tan biasa

Kru seumangat he cut buleuen  
Beudoh makeuen sapat dua  
Putroe seuot jikheun meunoe  
Ban sijak nyoe po meukuta

Rakna Bangta jawueub meunoe  
Deungo kamoe po cut raja  
Meuhan makeuen cut sambinoe  
Pinah jinoe idang raya

Putroe deungo haba meunan  
Beudoh yoh nyan makeuen sama

Rakna Bangta makeuen rijang  
Sajan-sajan putroe muda

'Oh lheueh makeuen pinah idang  
Putroe tatang le ceurana  
Pajoh ranup na sigapu  
Teuma meusu Rakna Keumala

Na neudeungo he tuanku  
Nyoe sigeutu lon meuhaba  
Putroe peugah rumah teukhem  
Tameuhiem geutanyoe dua

Nyoe hiem ulon teungku peugah  
Masalah rab keumeung sa  
Bangta seuot han peue salah  
Hiem cut indah uleh gata

Putro jihiem teuma meunoe  
Deungo kamoe dalem raja  
Saboh binatangdua gaki  
Pagi hari jak u paya

'Oh jiteungoh wahe doli  
Jisak gaki u bawahnya  
Jieh uroe jiberdiri  
Siblah gaki gantung saja

Meunyo jidong gaki kiri,  
Ulee heunti u kanannya  
Watee jidong gaki kanan  
Uleejih nyan wie meugisa

Cuba peugah narit adek  
Gata lisek he kakanda  
Seuot Bangta nyang ceureudek  
Nyankeu itek he adekda

Nyang na meunan wahe adoe  
Geunap uroe jak u paya  
Meunan nyang le wahe putroe  
Singoh uroe taeu rupa

Meunan neukheun Bangta Kumari  
Tahe Siti Rakna Keumala  
Tanyong balah Bangta sidi  
He Putroe Ti nyoe hiem hamba

Saboh binatang he Putroe Ti  
Nibak gaki na tandoknya  
'Oh troh watee teungoh malam  
That kiam jimeusuara

Cuba peugah he buleuen trang  
Peue binatang he adekda  
Teuma seuot putroe ajam  
Nyankeu ayam he kakanda

Tuan putroe lom jimeusu  
Tanyong laju ubak Bangta  
Saboh binatang wahe teungku  
Gadoh iku gaki ka na

'Oh keunong sa wahe teungku  
Jimeusu han ek tapeubla  
Banta seuot neukheun cangguek  
Jeh pat jiduek dalam paya

Teuma putroe tanyong meunoe  
Jeuet ka dumnoe po meukuta  
Rakna Bangta neukheun meunoe  
Rijang lagoe putroe muda

Nyoe saboh treuk wahe-adoe  
Peugah putroe uleh gata  
Saboh binatang wahe putroe  
Tango jinoe lon peuhaba

Sayeuepjih peuet gakijih nam  
Binatang nyan peuebu nama  
Teuma seuot putroe canden  
Jikheun den-den ubak Bangta

Putroe tanyong teuma lagi  
Jisudi dalam juh 'amma  
Peue bismillah nyang hana mim  
Peugah dalem uleh gata

Nyang hana mim peue bismillah  
Dalem peugah ubak hamba  
Bangta seuot neukheun pantah  
Neupeugah inna a'tainaka

Lheueh nyan neukheun ubak putroe  
Wahe adoe nyang jroh rupa  
Nyang geukheun ma bukon ibu  
Nyang geukheun ku bukon bapa

Nyang geukheun da bukon aneuk ku  
Nyang geukheundu bukon lakoe ma  
Cuba peugah cut ma ubon  
Nibak ulon he adekda

Teuma seuot putroe canden  
Ngo he dalem ngon saksama  
Nyang geukheun ma nyan harah mim  
Bukon dalem ibu gata

Nyang geukheun ku nyan harah kah  
Bukon ayahteu di gata  
Nyang harah dai kon aneuk du  
Kon saboh ku sisyeedara

Meunan jikheun si nyak putroe  
Areh ragoe bijaksana  
bandua droe sabe lisek  
Ceureudek hana saboh sa

Nyoe lon tanyong wahe deelat  
Nyang gura that nibak nyang ka  
Sidroe raja dalam nanggroe  
Jroh that budoe hana tara

Tujoh lapeh kuta meuligoe  
Jeuep-jeuep sagoe ureueng jaga

Tujoh lapeh tujoh pinto  
Tuanku e deungo lanja

Sidroe ureueng dalam nanggroe  
Geupeutoe meung jak bak raja  
Geuba sajan bungong jaroe  
Boh mamplam nyoe dalam raga

Bak pinto phon jok siteungoh  
Hana meu'oh bak takira  
Tujok pinto jijok sabe  
Cuba pike he kakanda

Siteungoh-siteungoh sabe jijok  
Saboh cit trok me keu raja  
Cuba peugah teungku ampon  
Nibak ulon nyang adekda

Padum ase he sulton  
Boh mamplam masa phon geuba  
Nyoe lon peugah wahe putroe  
Nak taujoe uleh gata

Bandum ase he adoe beh  
Sireutoh dua ploh lapan teuma  
Cuba ingat wahe adoe  
Troph sampoe ban napsu gata

Ulon he nyak han peue ujoe  
Abangteu nyoe na sikula  
Peue laen lom tanyong jinoe  
He Putroe Rakna Keumala

Ka dua boh ulon peugah  
Nyoe lon balah nyak keu gata  
Sibak pineung di teungoh krueng  
Boh jirayueng u daratnya

Teuma teuka sidroe ureueng  
Jiek pineung jipot bohnya  
Abeh bandum ka jipot boh  
Jibeudoh bak pineung raya

Pakri jitren he adeo jroh  
Krueng nyan saboh le that buya  
Le that buya di dalam krueng  
Ho rot jiplueng ureueng gila

Teutap di jih di cong pineung  
Uram lam krueng toh bicara  
Nyan he putroe cuba peugah  
Pakri ilah rot jidaya

Teuma seuot putroe cidah  
Ka jipeunah ubak Bangta  
Jicop tima na limong boh  
Taloe jiboh panyang raya

Jipluek situek bak pineung nyan  
Jicop rijang yoh nyan tima  
Jitarek ie teuma rijang  
Jiriwang bak pineung lanja

Lagee jiek meunan jitren  
Deelat ampon han meutuka  
Cuba ingat wahe doli  
Narit Siti saleh beuna

Nyoe saboh treuk ulon tanyong  
Ngo beukeunong adek raja  
Sidroe ureueng ka tuha that  
Geumeuhajat keu boh mangga

Bakjih sibak bohpi saboh  
Ingar beuroh he adekda  
Hana leumah di dalam on  
Pakri untong ureueng tuha

Sabab gop ka bungkok that  
Pakri geumat reunong ka na  
Ureueng tuha han jeuet dong cot  
He putroe got peugah lanja

Tuan putroe teuma seuot  
Ban nyang patot jawueub haba

Ngo lon peugah syahi alam  
Akai ajam ureueng tuha

Geupasoe ie saboh talam  
Boh mamplam leumah meucahya  
Sinoe geungieng sideh geucet  
Sret meuleubub teuma sigra

Nyan tuanku ka lon peugah  
Beuna salah cuba dawa  
Rakna Bangta seuot pantah  
Sibeuna sah ban kheun gata

Nyoe saboh treuk ulon tanyong  
He bungong Rakna Keumala  
Sidroe ureueng jak seumbahyang  
Meuteumeung krueng luah raya

Hana tutue phon dilee kon  
Pakri untong leupah saja  
Nyang na bak u sibak sinan  
Bak watee nyan han le bungka

Nyang bunoe kon sabe reubah  
Abeh leupah bansineuna  
Nyoe sidroe treuk hana leupah  
Ka jibeudoh bak u raya

Manoh saboh na di sinan  
Kuantan manok meubaka  
Meujimeusu manok agam  
Reubah yoh nyan bak u lanja

Pakri jinoe tapeumeusu  
Bungong meulu kheun le gata  
Di ureueng nyan meukarat that  
Ka rab troh had watee 'isya

Tameung peulet hana lawan  
Peugah intan uleh gata  
Seuot putroe bungong keumee  
Tadeungo kee po meukuta

Ulon peugah miseue dilee  
Beumeuteuntee wahe raja  
Cok ceureumen mat u jaroe  
Meusu keudroe manok lanja

'Oh ban jingieng bak ceureumen  
Got that ingen lawan ka na  
'Oh jimeusu manok agam  
Reubah sinan bak u raya

Geujak laju teuma pantah  
Ka leupah di ureueng tuha  
Nyan tuanku ka lon peugah  
Beuna salah bak meukuta

Bangta seuot teuma meunoe  
He putroe hana meutuka  
Tuan putroe sangat lisek  
Ceureudek hana saboh sa

Bandua droe sabe tarek  
Putroe cantek deungon Bangta  
Rakna Bangta kheun bak adek  
Di lon han ek le poh cakra

Tabri idin bungong rubek  
Lon kubalek ka rab faja  
'Oh lheueh idin nibak putroe  
Po samlakoe laju gisa

Ka rab beungoh banta neuwoe  
Tinggai putroe lam istana  
Rakna Bangta jak bak putroe  
Ureueng nanggroe jithee hana

Sabab geujak watee malam  
Wahe teelan sabe teuka  
Watee troh had geujak keu nan  
Bak putroe nyan Rakna Keumala

Nyang buet salah keubit cit tan  
Meunan teelan lam calitra  
Hana roh buet keujeuhatan  
Putroe seudang deungon Bangta

Bak bineh blang pula panjoe  
Bineh nanggroe pula asan  
Padum lawet teuma dudoe  
Deungo adoe lon peugah ban

Bangta neujak hana padoe  
Ubak putroe watee malam  
Hingga meugah teuma dudoe  
Bak du putroe Lila Sakdan

Silama goh neumeunikah  
Nyang buet salah keubit cit tan  
Dalam nanggroe got that meugah  
Putroe cidah jeuheut han ban

Raja meuhei ureueng dua droe  
Nyang sapai droe di sulotan  
Keubai teuga hana bagoe  
Bandua droe that pahlawan

Lon peugah nan teuma jinoe  
Nak tatusoe wahe rakan  
Nan nyang tuha Datok Meuntroe  
Nyang adoe Tok Labala nan

Ka troh keu nan bandua droe  
Aduen adoe that analan  
Teuma sabda raja nanggroe  
He Tok Meuntroe tango laman

Pakri pike keu lon sidroe  
Si nyak putroe nyang bangsawan  
Han lon tune agam sidroe  
Ubak putroe sabe datang

Pakri tapoh agam mantong  
Kheun beukeunong lon ngo padan

Datok Meuntroe seuot yoh nyan  
Nibak laman ban nyang reumbang

Agam mantong han jeuet tapoh  
Abeh teuboh sikalian  
Hukom dilee tuanku jroh  
Bandua boh neuyue simpan

Uleebalang dilee jameun  
Tinggai inong jipoh agam  
Teuma dudoe tuanku kheun  
Dua siseun neuyue tupang

Bandua droe neupoh mate  
uleh boli nyang sulutan  
Bandua droe neupoh mate  
Jinoe pakri laen padan

Jinoe pakri tapoh sidroe  
Reuloh nanggroe sikalian  
Jikheun han got po meukuta  
Ade hana bri hukoman

Teuma seuot poteu raja  
Dilee masa bit na meunan  
Sabet beuna ban kheuh gata  
Han lon dawa tutoteu nyan

Pakri kaman tapoh jinoe  
Si nyak putroe jroh analan  
Sayang rupa that sambinoe  
Pakri jinoe na pikeran

Datok Meuntroe seuot sigra  
Bak hamba na saboh padan  
Deungo jinoe po meukuta  
Na bicara bak lon tuan

Tadawajih nyan pancuri  
Cut Putroe Ti tan salaham  
Kon meudina ngon Putroe Ti  
Meunan doli bak lon tuan

Raja tanyong toh bicara  
Peugah sigra pakri padan  
Datok Meuntroe peugah lanja  
Po meukuta deungo laman

Takheun putroe neupeukawen  
Dalām baten bek laheran  
Bak rot jilop taboh geutah  
Meunan ulah he junjongan

Ubak putroepi tapeugah  
Rakyat takrah sikalian  
Ureueng nanggroe ngon peutua  
Tacalitra haba meunan

Bandum rakyat neuyue teuka  
Putroe muda bri tunangan  
Neuyue kalon ubak putroe  
Nyang galak droe that sukaan

Soe nyang galak tuan putroe  
Jingieng lakoe nyang budiman  
Jingieng keudroe cut ma ubon  
Sinan meufom he junjongan

Meunan neukheun deelat ampon  
Cahya ie mbon toh sukaan  
Keu ureueng nyang putroe galak  
Teuntee jijak singoh keu nan

Nyang di agampi cit galak  
Meuhad jijak hana jeuet han  
Datok Meuntroe nyang seumeugah  
Khalifah sangat sukaan

Raja seuot seunang leupah  
Ban tapeugah meutuka han  
Jinoe tajak mita geutah  
Peue nyang mudah peuwoe rijang

Tok Labala mita geutah  
Beudoh pantah geubeurjalan  
Meuteumee le geutah panah  
Peuwoe pantah bak sulotan

Troh bak raja geupeuleumah  
Geutah panah lon cok sinan  
Wahe raja nyoekeu geutah  
Leukiet leupah hana macam

Raja seuot han peue salah  
Meuka geutah jeuetkeu nyang nyan  
Neucok geutah ubak jaroe  
Ubak putroe neubeurjalan

Neukek laju u meuligoe  
Bak Putroe Rakna analan  
Ban jikalon uleh putroe  
Seumbah jinoe laju rijang

Raja marit teuma meunoe  
He aneuk droe ngo lon tuan  
Lon peukawen gata jinoe  
He sambinoe aneuk badan

Bek meudawa bungong geutoe  
Tangieng keudroe toh sukaan  
Lon krah rakyat dum sinaroe  
Aneuk meuntroe aneuk sulotan

Aneuk keujruen imum sagee  
Bandum keu noe lon yeu datang  
Bentara blang ngon peutua  
Aneuk bangta sikalian

Singoh bandum keu noe teuka  
He aneukda nak tapandang  
Mangat tangieng aneuk keudroe  
Baranggasoe nyang sukaan

Nyang meukeunong bak ate droe  
Nyankeu lakoe aneuk badan

Tangieng lakoe he boh ate  
Nyang meusampe judo intan

Meuka seunang bungong pade  
Bak ulonpi that sukaan  
Putroe seuot insya Allah  
Ban nyang titah lon ikotkan

Meunan jikheun putroe cidah  
Teuma ayah lom peugah ban  
Nyang jeuet aneuk lon kheun meunoe  
Nyang galak droe aneuk badan

Soe nyang galak po sambinoe  
Taeu keudroe sikalian  
Putroe galak Rakna Bangta  
Laen hana nyang sipadan

Keu samlakoe Rakna Bangta  
Janji ada dua gop nyan  
Abeh haba ngon khalifah  
Neuwoe pantah teuma yoh nyan

Bak rot lop-lop geuboh geutah  
Ngo lon peugah wahe rakan  
Geutah panah nyang that licen  
Lagee lilen leukiet han ban

'Oh nan mantong wahe po lem  
Han peue laen ulon peutrang  
Bungong yueng-yueng bee meupeuah  
Puteh mirah bungong jeumpa

Teuduek 'oh noe saboh ulah  
Ulon kisah Rakna Bangta  
'Oh lheueh 'isyah wahe adoe  
Ubak putroe neujak lanja

Miseue nyang ka dilee baroe  
Meunan cit nyoe he syeedara  
'Oh sore troh po samiakoe  
U meuligoe neuek lanja

'Oh troh keu nan han peue pike  
Jiseumbah le putroe muda  
Putroe seumbah nibak teuot  
Bangta sambot peumulia

Jicok ranup bungong rambot  
Laju jibet jok keu Bangta  
Bangta pajoh ranup sigapu  
Teuma meusu Rakna Keumala

Na neudeungo he tuanku  
Di lon rindu meuhiem pula  
Boh tameuhiem lon geutanyoe  
Bandua dröe nak biasa

Ulon tanyong laen bagoe  
Gura that nyoe he kakanda  
Saboh cicem he deelat syah  
Bandua blah mata buta

Sinan jidong di teungoh blang  
Hana kawan sidroe saja  
Na sikeujap jidong sinan  
Jideungo nyan laen teuka

Ka jipo na saboh kawan  
Jideungoran le kuek buta  
Jitanyong le teuma yoh nyan  
Ubak kawan nyang po lanja

Padumna le kah sinaroe  
Peugah jinoe kungo nyata  
Jiseuot le teuma meunoe  
Nyoekeu dumnoe peue kah kira

Na di likot siteungoh nyoe  
Kango jinoe kucalitra  
Lom di likot sisukee nyoe  
Kureueng sidroe cukop hana

Kapo kah-kah keu noe sidroe  
Nak cukop nyoe sireutoh ka

Di kuek buta jipikeran  
Ka lhee kawan jipo lanja

Padum-padum saboh kawan  
Lhee pasokan bak tahiingga  
Cuba peugah wahe dalem  
Nyankeu cicem buta mata

Cuba kira padum ase  
He doli meukuta donya  
Peugah laju tuanku droe  
Ubak kamoe neucalitra

Lhee go jipo tuanku beh  
Trok sireutoh ngon kuek buta  
Siteungoh-siteungoh jipo sabe  
Cuba pike po meukuta

Rakna Bangta neuseuot le  
He Putroe Ti ngo lon kata  
Nyang phon po limong ploh nam  
Saboh kawan he adekda

Di likot nyan dua ploh lapan  
Nyankeu kawan nyang keudua  
Lom likot nyan na limong blah  
Saboh tamah ngon kuek buta

Lhee go jipo he cut indah  
Ka sudah ban napsu gata  
Cuba ingat na sireutoh  
He adoe beh nyang jroh rupa

Seuot putroe puteh leusoh  
Tuanku beh han meutuka  
Nyoe lon tanyong keu nan saboh  
Putroe jroh peugah le gata

Sibak pineung di lampoh soh  
Ka jimeuboh jai lagoina  
Siuroe buleuen sret le saboh  
Fam adoe jroh uleh gata

Jeuep-jeuep uroe meunan sabe  
Padum ase he adekda  
Phon siuroe sampoe lhee ploh  
Saboh jatoh hana reuda

Cuba kira padum reutoh  
Nyang ka jatoh pineung muda  
Tuan putroe seuot rijang  
Sangat ajam Rakna Keumala

Deungo jinoe syahi alam  
Boh pineung nyan ulon kira  
Na lhee reutoh nam ploh limong  
Meunan keunong he kakanda

Beutoi meunan wahe doli  
Narit Siti nyang adekda  
Rakna Bangta teuma seuot  
Bungong rambot that sibeuna

Narit gata hana karot  
He adek cut putroe muda  
Nyoe lon tanyong keu nan balah  
Beuneupeugah he meukuta

Ulon tanyong sibak bak u  
Sikureueng mu bohjih saja  
Nyang saboh mu bohjih saboh  
Nyang dua boh mu keudua

Mu nyang keulhee bohjih lhee boh  
Neufam beujroh po meukuta  
Mu nyang keupeuet bohjih peuet boh  
Nyang limong boh mu keulima

Mu nyang keunam bohjih nam boh  
Nyang keutujoh meunan juga  
Nyang keulapan bohpi lapan  
Nyang sikureueng meunan sama

Mu sikureueng wahe doli  
Cuba bagi lhee-lhee saja

Mu beusadum boh beusadum  
Cuba bulueng he kakanda

Cuba peugah tuanku beh  
Droeneu utoh po meukuta  
Peugah rijang he teungku jroh  
Padum ploh boh saboh jeumba

Weuek beusadum tuanku droe  
Siat jinoe uleh gata  
Rakna Bangta seuot meunoe  
Deungo kamoe ngon saksama

Nyoe lon peugah wahe adoe  
Taduek keu noe tabileueng sa  
Nak lon bagi lhee bagian  
Putroe intan taeu sigra

Meunyo han jeuet aduenteu nyoe  
Tapeurunoe uleh gata  
Bak lon ingat sang han leupah  
Putroe indah pueh lagoina

Bitpi meunan he Putroe Ti  
Ulonteu ci meusikada  
Nyoe tadeungo bungong sukcon  
Lon peugah phon ubak gata

Mu nyang saboh ngon sikureueng  
Tamah limong he adekda  
Banlhee boh mu ka limong blah  
Bak jumeulah 'oh takira

Mu nyang tujoh deungan mu nam  
Tatamah lom mu keudua  
Nyanpi teuma tajumeulah  
Na limong blah he adekda

Mu nyang lapan tatamah peuet  
Padum na jeuet ngon mu tiga  
Banlhee boh mupi limong blah  
Ka sudah lon bagi rata

Nyan he po cut ka lon peugah  
Beuna salah nibak gata  
Ase mujih jeuet sikureueng  
Cuba bileueng uleh gata

Bohjih bandum he cut bungong  
Peuet ploh limong bak tatingga  
Tabagi lhee he nyak bungong  
Meuteumeung limong blah saja

Peue lom laen cuba tanyong  
Meuna mantong tanyong lanja  
Putroe seuot teuma yoh nyan  
Ka jeuet dumnan po meukuta

Jeuet singoh-ngoh lom tapeugah  
Panyang leupah nibak hamba  
Lagi malam ka troh watee  
Ka poh lhee bak jeuem teumaga

Jak udeh eh he pangulee  
U juree lam kaso sutra  
Han jeuet lon eh cut meutuah  
Malam sudah ka rab faja

Lagi goh lom tameunikah  
Nibak Allah ka meudeesya  
Han peue salah wahe deelat  
Bek eh sapat tanyoe dua

Beuthat meunan pirak lipat  
Nibak adat han got rupa  
'Oh jitupeue le barangsoe  
Jikheun tanyoe tameudina

Meunyo meunan tuanku droe  
Singoh uroe beutroh teuka  
Bunoe ayah neujak keu noe  
Neukheun kamoe neubri jeumba

Neukheun ulon neupeukawen  
Wahe dalem ri nyang suka

Singoh uroe beutroh neutren  
Meunyo neutem neutueng hamba

Aneuk keujruen uleebalang  
Dum sibarang keu noe teuka  
Soe nyang galak bak lon tuan  
Meunan peusan poteu raja

Soe nyang galak bak mata lon  
Meunan neukheun le ayahda  
Nyankeu lon kheun dalem payong  
Beutroh neutren keu noe teuka

Meuhad dalem laju lon kheun  
Han lon tueng laen han suka  
Singoh neujak dalem badan  
Peukayan bek na meutuka

Nyang jeuet meunan dalem lon kheun  
Sabab ureueng jai lagoina  
Peukayan nyan bek neukeubah  
Lon turi sah dalem gata

Bangta seuot insya Allah  
Han lon ubah ban kheun gata  
Meunan teukeudi Tuhan sidroe  
Samlakoe kheundak meubala

Abeh pakat deungon putroe  
Neutren neuwoe Bangta muda  
Geutah keunong nibak bajee  
Hana neuthee Rakna Bangta

Neuwoe laju troh u keude  
Sinan lale sikutika  
Neupreh meusu nyan meuriam  
Di dalam sideh bak raja

Teuduek Bangta siat diam  
Raja Sakdan lon calitra  
Beungoh uroe yue tet nubat  
Teuka rakyat dalam donya

Jithee putroe neupeukawen  
Rakyat jitren han ek kira  
Ngon peukayan nyang that canden  
Kaya gasien abeh teuka

Jimeujroh-jroh bak peukayan  
Hana lawan ureueng kaya  
?Oh sep peukayan nibak asoe  
Ladom meunoe jimeuhaba

Adat neutueng lon keu lakoe  
Bu seueh putroe kutem seuba  
Meunan-meunan dum jimeupro  
Ureueng nanggroe dum sineuna

Sabab galakjih keu putroe  
Le that bagoe peugah cakra  
Teiduek haba ureueng nanggroe  
Raja jinoe lon calitra

Geutah geubohpi hana le  
Mangat ate hana tara  
Soe nyang teuka wahe adoe  
Bansinaroe geungieng rupa

Toh Labala ngon Tok Meuntroe  
Di jaroe rante teumaga  
Geungieng ureueng nyang meugeutah  
Hana leumah jeuep-jeuep raja

Na sikeujap he meutuah  
Bangta indah keu nan teuka  
Ban troh keu nan Bangta canden  
Yoh nyan teukhem Rakna Keumala

Rakna Bangtapi ka teukhem  
Meunan kayem sama dua  
Na sikeujap teuma dudoe  
Datok Meuntroe keu nan teuka

Deungon rakan na siploh droe  
Jipeutoe bak Rakna Bangta  
Leumah jieu teuma hitam  
Geutah beuklam han meutuka

Jijak laju pantah rijang  
Bangta seudang jidrop sigra  
Laju jidrop jibeureukah  
Allah Allah Bangta muda

Boh bak gaki rante beusoe  
Bak jaroe rante teumaga  
Bangta tanyong teuma meunoe  
Tadrop kamoe peue kareuna

Teuma seuot Datok meuntroe  
Kapalha peutoe areuta raja  
Nyan alamat nibak sapai  
Geutah tinggai he ceulaka

Geutah panah geutheun tikoh  
Bek jipajoh pade aga  
Raja keubah sinan baroe  
Ateueh peutoe lam istana

Rakna Bangta keunong geutah  
Boh panah hana neurasa  
Nyang boh panah adoe teungku  
Tan meuneueu pakri rupa

Hana meukon keunong geutah  
Kheundak Allah ateueh hamba  
Ka meunan grak nibak Allah  
Bangta indah keunong bala

Meunan teukeudi nibak Allah  
Tapaban bah ka troh masa  
Teuduek 'oh noe saboh ulah  
Meuwoe kisah Rakna Bangta

Timoh di gle naleueng lakoe  
Lam nanggroe neleueng Beulanda

Amma bakdu teuma dudoe  
Lon hareutoe Rakna Bangta

Rakna Bangta geuboh rante  
Sabe-sabe keunong bala  
Jaroe gaki ka geurante  
Bungong pade sayang raya

Nibak gaki rante beusoe  
Bak jaroe rante teumaga  
Bangta Sawang kalon bagoe  
Beungeh han soe hu ngon mata

Ulee peudeueng ka neugeucai  
Hana sagai le suara  
Rakna Bangta neukalon hai  
Deungon akai ka neubasa

Wahe dalem bek tameucang  
Gata cut bang sidroe saja  
Sabab ulon ka lam rante  
Gata mate he kakanda

Rakna Bangta neukheun meunan  
Bangta Sawang han le haba  
Ka neumarit le sigeutu  
Dalem teungku deungo hamba

Jinoe tawoe gata cut bang  
Watee malam beutroh teuka  
Bamnta Sawang deungo meunan  
Teuma yoh nyan neuwoe sigra

Sret ie mata hana teudoh  
Han ek sampoh basah ija  
Bangta Sawang ka leupah woe  
Lon hareutoe Rakna Bangta

Putroe ngieng Bangta lam rante  
Jimoe sabe Rakna Keumala  
Ka meuguncang ngon meuligoe  
Jipoh-poh droe hana reuda

Jimoe sabé si nyak putroe  
Jitumbok droe ro ie mata  
Ka jiwiet gleueng bukon sayang  
Jipeh subang deungon nuga

Dawok jimoe bungong kundo  
Tadeungo sye ngon suara  
Syaе panton han soe tukri  
Putroe Ti Rakna Keumala

Bukon sayang lon eu labu  
Teungoh lon sibu ka ulat seuba  
Bukan sayang lon eu teungku  
Grak Tuhanku ka teuka bala

Putroe seudang jimoe sabé  
Ka teuka le keu nan raja  
'Oh rab raja jjiem siat  
Jarak meuhad jomoe subra

Meunankeu hai putroe ubat  
Lon riwayat Rakna Bangta  
Lheueh geurante jaroe gaki  
Bangta Kumari aneuk raja

Dalam neunoh geusrong gaki  
Ka jitadi jidong lingka  
Ladom jikheun bek le tapoh  
Sabab that jroh lon eu rupa

Ladom jikheun he teungku beh  
Pakon utoh peue kareuna  
Di ureueng poh jikheun meunoe  
Jiplah peutoe rumoh raja

Hana patot geupalh peutoe  
Areuta droe jai lagoina  
Hana patot geupancuri  
Dan lagi ngon ureueng kaya

Me'unan jikheun jeuep-jeuep bibi  
Han ek rawi panyang raya  
Haba Bangta teuduek siat  
Lon riwayat bayeuen rimba

Cicem bayeuen sosahjih that  
Hana mangat jeuep anggeeta  
Sang na bala bak jipeunyum  
Teuma jikheun meunoe haba

Ngon Cut Lason marit bayeuen  
He cut buleuen deungo hamba  
Ulon sosah hana bagoe  
Idin kamoe siat bungka

Rakna Bangta lon jak saweue  
Kadang peue-peue teuka banya  
Putroe Lason seuot pantah  
Han peue salah jeuet tabungka

Bayeuen bungka laju pantah  
Ngo lon peugah he syeedara  
Na lhee uroe jipo sunggoh  
Hana piyoh jipo lanja

Ubak Bangta teuma ka troh  
Bayeuen utoh jitren sigra  
Jingieng Bangta dalam rante  
Ka jimoe le bayeuen rimba

Rakna Bangtapi ka neumoe  
Neukalon nyoe bayeuen teuka  
Bayeuen tanyong teuma laju  
Pakon teungku dalam singkla

Bangta peugah awai akhe  
Phon bak pande neucalitra  
Abeh bandum neuhareutoe  
Bayeuen jimoe hana tara

Teuma jikheun narit meunoe  
Idin lon woe po meukuta

Bangta seuot han peue salah  
Jipo pantah bayeuen rimba

Teutap bayeuen jiwoe leupah  
Ulon peugah lom keu Bangta  
Rakna Bangta dalam rante  
Tadeungo he adoe raja

Watee malam baranggajan  
Bangta Sawang keu nan teuka  
Neume ruti baranggajan  
Laen nibak nyan jabet keuruma

Meusimalam hana neulheueng  
Nyankeu ureueng that seutia  
Laen nibak nyan dum sibarang  
Neume pisang deungon bada

Le that bagoe neuba keu nan  
Keu makanan Rakna Bangta  
Meunan sabé baranggajan  
Bangta Sawang keu nan teuka

Rante beusoe abeh hanco  
Teupeuro ngon siklep mata  
Nyang teumaga han ek hanco  
Bungong kundo hana do'a

Sabab hana nibak guree  
Pakri lagee rot neudaya  
Neupuleh lom teuma beusoe  
Rante meuwoe miseue nyang ka

Teuduek siat dilee 'oh noe  
Tuan putroe lon calitra  
Teutap Bangta dalam rante  
Jimoe sabé putroe muda

Teuma jikheun bungong pade  
Panton syae hana reuda  
Bukon sayang aneuk beulalang  
Siwah datang ka jisama

Keu soe lon bri sie teupanggang  
Dalam idang putroe muda  
Aneuk sirindet lingka buket  
Kayee meuapat umpung cempala

Han ek lon ngieng ate saket  
Soe lom piret hana raja  
E hai teungku uleebalang  
Bukon sayang lon eu gata

Gata teungku tamse subang  
Bak lon pandang luroh mata  
Teungoh galak bak lon pandang  
Gata cut bang roh lam singkla

Bukon sayang rumoh reuloh  
Abeh tijoh rungka han le  
'Oh lon pike ate reuloh  
He dalem jroh bungong pade

Wahe teungku nyawong badan  
Siri jalan nyang meusampe  
Pat lon tanyong pat lon peusan  
He bangsawan ulon pike

Toh amilan rot lon daya  
Beuglah gata bek sinan le  
Jimoe sabe putroe muda  
Hana nyang sa reuloh ate

Bahle lon jak kaman jinoe  
Lon peutoe bak ureueng rante  
Meunan pike di putroe cut  
Mata teubleut han teungeut la

Ngon hekeumat teuma jibeuet  
Abeh teungeut dum barangri  
Abeh tengeut bansimua  
Lam isatana sangat sunyi

Beudoh putroe jijak lanja  
Ubak Rakna Bangta Kumari

'Oh troh keu nan po sambinoe  
Taeu jimoet tan beureunti

Putroe marit teuma meunoe  
Dengo kamoe wahe doli  
Aneuk gunci na bak kamoe  
Tuanku droe jinoe pakri

Saleh jeuet ngui saho-saho  
Tan teungku po ulonteu ci  
Teuma putroe laju buka  
Teuhan sigra nyang bak jari

Ka teuhah rante teumaga  
Hana daya laen lagi  
Rante beusoe han ek teuhah  
Lom ka sosah cut Putroe Ti

Han ek teuhah rante beusoe  
Pakri jinoe wahe doli  
Bangta Sawang bak malam nyan  
Hana datang bak Kumari

Nyang jeuet jitren putroe indah  
Bak deelat syah jipeureugi  
Bangta seuot insya Allah  
Bek le sosah Cut Putroe Ti

Rante beusoe jeuet lon hanco  
Beuteupeuro bungong giri  
Nyang teumaga ka buet gata  
Nyang meulila ka buet kami

Neuhanco le Rakna Bangta  
Jeuet keu sira nyang bak gaki  
Malam nyan lheueh po samlakoe  
Buet cut putroe nyang padoli

Rakna Bangta woe u peukan  
Putroe intan u meuligi  
Bangta peugah ubak cut bang  
Sibarang abeh neurawi

Abeh dumpeue neuhareutoe  
Buet cut putroe teuhah gunci  
Beungoh uroe puteh Timu  
Ureueng 'a-'u ulee ili

Ho pancuri dalam taloe  
Soe jak keu noe buka kunci  
Teuma Ladom jikheun meunoe  
Sang buet putroe nyang juhari

Jeuet keu dumnan ureueng nanggroe  
Bayeuen nyang woe lon peugah kri  
Bayeuen rimba laju jiwoe  
Jipo tanggoe hana lanti

Bayeuen jipo hana teudoh  
Hana piyoh malam hari  
Na lhee uroe jipo sunggoh  
Hingga troh bak putroe ahli

Bak Cut Lason keu nan jiwoe  
Taeu jimoe hana sakri  
Sira jimoe jikheun meunoe  
Wahe putroe nyang juhari

Tadeungo lon putroe muda  
Rakna Bangta ka jirante  
Bek le neuduek po jroh rupa  
Lam singkla Bangta Kumari

Jaroe gaki rante beusoe  
Nibak nanggroe Sakdan doli  
Putroe Lason deungo meunan  
Reubah pangsan bungong giri

Bangta Silahpi ka pangsan  
Putroe intanpi ka rudi  
Puleh pangsan bandua droe  
Beungeh han soe Bangta sidi

Bandua droe beungehneu that  
Neukrah rakyat meuntroe wadi

**Neutet laju beude nubat  
Teuka rakyat dum jiili**

'Oh troh keu nan ngo lon peugah  
Bangta Silah peugah rawi  
Ná tadeungo bandum gata  
Jak lam rimba ini hari

Takoh kayee dum ube-be  
Bák meurante tajak cari  
Nak tapeugot sampan gurap  
Paujap-jap kuangkang lagi

Kapai bahtra beulheueh siat  
Lon meukarat hana sakri  
Lon meung bungka jinoe leugat  
Ka jiikat Bangta Kumari

Nibak nanggroe Hindustan  
Pakri jalan tapeureugi  
Meunan neukheun Bangta Silah  
Rakyat pantah tcungoh u gle

Jikoh kayee han peue peugah  
Dum barollah bak meurante  
Koh teurawoh ngon tualang  
Peugot tongkang kapai beusi

Kayee di gle goh lom tho on  
Ka jisuson u bineh pasi  
Ka jipeugot kapai bahtra  
Jikeurija malam hari

Ase bahtra dum sinaroe  
Peudieng jinoe peue nyang jadi  
Geupeudieng ie deungon rujee  
Meuteuntee deungon sipai

Ubat beude dum sibarang  
Sinapang bangsa Turuki  
Phon goupeuek sampoh ratee  
Ampeueng Jamee ureueng Cati

Laen nibak nyan han peue peugah  
Peukakah banyak sikali  
'Oh ban ase dum kafilah  
Bungka pantah dum sipai

Putroe Lason Bangta Silah  
Bungka pantah han le lanti  
Phon-phon kapai Bangta Silah  
Jitujah hana beureunti

Dilikot nyan kapai putroe  
Meuadoe taeu meuriti  
Le that kapai dum sinaroe  
Malam uroe jipeureugi

Umu lhee buleuen peulayaran  
U Hindustan troh peureugi  
Troph ubak nanggroe Hindustan  
Piyoh sinan bineh pasi

Geuteungoh le dum u darat  
Meusapat sama sikali  
Ureueng nanggroe tanyong leugat  
Siri teumpat gampong neugri

Geuseuot le meunoe geukheun  
Kamoe bandum ureueng lari  
Kamoe jiprang areuta jitueng  
Nyang jeuet meuplueng baranggari

Pakri laku teuma dudoe  
Jiprang keu noe kadang lagi  
Beukit talawan teuma jinoe  
Bahle sinoe meubeureunti

Meunan neukheun Bangta Silah  
Le that ilah bungong giri  
Ureueng nanggroe seuot leugat  
Meupakat sama sikali

Ka jipeugot le ngon kuta  
Got meubanja bineh pasi  
Geubri upah ban sikada  
Ureueng teuka laen neugri

Sabab gop nyan tan beulanja  
Talo kuta geupeureugi  
Ureueng teuka mangat ate  
Bandum sare hana sakri

Di ureueng nyan han troh pike  
Geupeugot le kuta pasi  
'Oh ban ase deungon kuta  
Marit sigra Putroe Siti

Wahe bayeuen deungo kamoe  
Kajak jinoe bak Kumari  
Kajak eu mantong jiikat  
Jinoe leugat kapeureugi

Teungoh putroe neupeugah nyan  
Ka troh keu nan Bangta Kumari  
Bandua ngon Bangta Sawang  
Putroe seudang kalon doli

'Oh ban jieu han peue peugah  
Putroe seumbah le bak gaki  
Bangta Sawang Bangta Silah  
Putroe indah Bangta Kumari

Putroe Lason tanyong pantah  
Cuba peugah wahe akhi  
Wahe dalem cuba peugah  
Peue na salah geudrop doli

Rakna Bangta laju peugah  
Beuna salah ka neurawi  
Abeh dumpeue ka neupeugah  
Bak cut indah Lason Siti

Rakna Bangta lom kheun meunoe  
Deungo kamoe baranggari  
Raya hajat lon he adoe  
Keu putroe nyang aneuk doli

Meuhan geutueng keu meulintee  
Beuhareuem kee kuprang neugri

Lagi ulonpi ka malee  
Beumeuteumee aneuk doli

Di lon he nyak beupueh ate  
Udep matepi lon rali  
Meunan neukheun po samlakoe  
Ubak adoe Lason Siti

Insya Allah tuanku droe  
Meutawoe malee han sakri  
Meunyo hana neuprang nanggroe  
Malee kamoe nyang peureugi

Sang geutanyoe geusuen raya  
He meukuta tanglong neugri  
Hana soe bloe sagai lada  
Meutagisa wahe doli

Jinoe dalem peugot surat  
Yue intat keu raja sini  
Ulon lakee jinoe leugat  
Bek kaikat le pancuri

Meunan narit putroe indah  
Cok keureutah Bangta Kumari  
Rakna Bangta cok keureutah  
Surat pantah le neurawi

Meunoe haba dalam surat  
Deungo sahbat lon peugah kri  
Bahwa ini haba surat  
Keu deelat lam nanggroe ini

Ulon lakee nibak deelat  
Nyang lam ikat dalem kami  
Beuneupulang jinoe leugat  
Wahe deelat nyang beustari

Wahe raja ampon deelat  
Bek taikat Bangta kumari  
Adat mate tapeugah jeurat  
Wahe deelat nyang juhari

Gata raja pakon jeungkat  
Tajak ikat aduen kami  
Gata sang kon aneuk bak ku  
Tapeulaku baranggakri

Teugo taeu ureueng meudagang  
Han tasayang meusihari  
Peulheueh laju bak uroe nyoe  
Dalem kamoe nyang lam rante

Adat udep bek taikat  
Peue nyang haiat ulon teubri  
Areuta gata nibak cut bang  
Ulon pulang ini hari

Aduen ulon got tapulang  
Bek meuutang wahe doli  
Gata raja hana malee  
dalem kee takheun pancuri

Ulon teubri peue talakee  
Siploh ribeepi ulon bri  
Dum talakee lon bri rijang  
Beutapulang aduen kami

Meuhan pulang ingat keudroe  
Kuprang nanggroe ini hari  
Pisang kucah monteu kudoe  
Kutueng putroe lam meuligi

Meuhan meunan raja nanggroe  
Tatueng kamoe lakoe cutti  
Meutatueng lon judo putroe  
Aduenku nyoe han padoli

Meuhan meunan kuprang nanggroe  
Ingar keudroe wahe doli  
Meunan haba dalam surat  
Neuyue intat bak sipai

Ban sare troh ubak jaroe  
Datok Meuntroe eu hei lagi

Datok Meuntroe neubeuet surat  
Di nap deelat raja neugri

Ban neudeungo haba lam surat  
Lisek that ureueng di pasi  
Jipeugahjih talo nanggroe  
Bak geutanyoe jijak rawi

Kuta ka lheueh di jih jinoe  
Di geutanyoe han padoli  
Geutanyoe dum keunong tipee  
Le eleumee hana sakri

Meunan neukheun raja nanggroe  
Bak Tok Meuntroe neupeugah kri  
Datok Meuntroe marit meunoe  
Deungo kamoe wahe doli

Nyang kirem nyoe bak lon pike  
Nyang lam rante dilee sini  
Jipura kheun bak geutanyoe  
Nyang sinoe han jipadoli

Nyang napsujih keu cut putroe  
Malam uroe jijak cari  
Meunyo neutueng keu meulintee  
Jeuet keu malee wahe doli

Got tuanku neukrah rakyat  
Neuyue leugat dum sipai  
Meuureueng nyan ek talawan  
Bek sosahan ampon doli

Tatkala nyan Raja Sakdan  
Yue krah rijang dum sipai  
Troph le keu nan dumna rakyat  
Timu Barat ka jiili

Teuma seuot raja deelat  
Peugot leugat kuta meuligi  
Ase kuta dum sinaroe  
Suda beusoe jroh meuriti

Peudeueng cokma leumbeng cakcoe  
Han peue adoe ulon rawi  
Ngon meuriam bak pupaleh  
Ka geupreh ureueng di pasi

Raja raja meuntroe bujang  
Uleebalang bangsa pari  
Ka meusapat bandum keu nan  
Surat yoh nyan geuyue rawi

Meunoe haba dalam surat  
Deungo sahbat lon peugah kri  
Peue lom taduek teungku linto  
Dara baro na di sini

Nak lon ampeueng beumeusampe  
Deungon beude biek Turuki  
Bek na beungeh wahe teungku  
'Oh tamaju lon ampeueng le

Meunan haba dalam surat  
Juintat keu Bangta Kumari  
'Oh troh keu nan teuma surat  
Geuploh lipat kulon isi

Abeh baca dum sinaroe  
Narit seungkoe nibak doli  
Yoh nyan beungeh po samlakoe  
Neukap gigoe leungo bibi

Bangta Sawangpi ka beungeh  
Han le rumeh takalon hi  
Bak ie muka taeu hiram  
Hana macam wahe akhi

Teuma beungeh Bangta Silah  
Neukheun pantah bak Kumari  
He tuanku uleebalang  
Peubeuedoh parang ini hari

Meunan neukheun Bangta Silah  
Lom neupeugah bak sipai

Reumbang uroe deungon buleuen  
Hana peue kheun jroh sikali

Rakna Bangta peubeudoh prang  
Bangta Sawang nyang phon nari  
Ka geutarek alam hitam  
Meunan macam prang mulai

Deungon geundrang ka geupleh le  
Peulheueh beude phon di pasi  
Got that maju bak geumeuprang  
Ureueng datang bacut tan gli

Peulheueh bude hana teudoh  
Prang meugeucoh hana sakri  
Rot noe rot deh meuprang sunggoh  
Beude jicoh tan beureunti

Siploh uroe meuprang sabé  
Le that mate sukee pasi  
Nyang rot raja mate laju  
Beungeh Datu sapai doli

Tok Labala ngon Tok Meuntroe  
Bandua droe that beurani  
Geusuet peudeueng geugrop u blang  
Geulinggang lagee keudidi

Bandua droe sangat girang  
Geuk prang Kuta Kumari  
'Oh troh keu deh Datok Meuntroe  
Geukheun meunoe narit cakri

Soe nyang beuhe lam kuta nyoe  
Teubiet keu noe lon kalon hi  
Datok Meuntroe meunan kalam  
Hana lawan that beurani

Teubiet keu noe laju u blang  
Bek guransang lam meuligi  
Teuma beungeh Bangta Sawang  
Peudeueng panyang nibak jari

Rakna Bangta han peue pike  
Kreueh that ate hana sakri  
Soe saleh nyan that guransang  
Bangta Sawang kacuba ci

Datok Meuntroe laju seuot  
Lon hai nyak cut na katuri  
Nyang got he nyak bah tasurot  
Meuhad mawot han peue taci

Bangta Sawang peudeueng neusuet  
Tok Meuntroe grop hana lanti  
Hana keunong Datuk Meuntroe  
Jiriwang nyoe bak Kumari

Bangta Sawang han peue peugah  
Banta Silah sang keudidi  
Ka lhee ureueng meucang sabé  
Han piyoh le siat lanti

Rakna Bangta bak uroe nyan  
Troh idang lam kuta pasi  
Datok Meuntroe nyang ka deuek that  
Han le kuat nibak gaki

Jiplueng laju dum sibarang  
Jiriwang sama sikali  
Rakna Bangtapi neuyue woe  
Teuduek 'oh noe siat lanti

Tamat jiled kensa



PN BALAI PUSTAKA — JAKARTA

Perpustakaan  
Jenderal Keb

899.22

RAM

h

